

Glasgow
University Library




G9 - L.2.

D.T. 6.11

Glasgow
University Library



Hunterian
Add. 317



Digitized by the Internet Archive
in 2016

<https://archive.org/details/b24935621>





JOSEPHI QUAREN.

SACRÆ CÆS. REG. APOST. MAJEST.
CONSIL. AULIC. ET ARCHIAT. IN
NOSOCOM. GENERAL. VINDOBON.
DIRECTORIS SUPREMI

ANIMADVERSIONES

PRACTICÆ

IN

DIVERSOS MORBOS.



BRUXELLIS

Typis MATTHÆI LEMAIRE.

M. DCC. LXXXVII.

Nec deerat materiæ pompa, si quidquam aliud
intveri liberet, quam fidem operis. C. Plin.
Natv. Hist. L. XXIX. C. I.

IMPERATORI. CÆS.

JOSEPHO II.

P. F. AVG. P. P.

QVOD. INTER. GRAVISSIMAS. IMMENSI.
IMPERII. CURAS. ÆGRORVM QVOQVE.
CIVIVM. SORTEM. BENIGNE RESPEXIT.
MISERTVSQUE. EORVM. ET CÅLAMITA-
TIS. ET. INOPIÆ. VT. COMMVNE. QVOD-
DAM. ADVERSVS. QUOTIDIANAS. PES-
TES. AC MORBOS. PERFVGIVM. MISERIS.
PATERET. PVBLICVM. VIENNÆ. MAXI-
MVMQVE. NOSODOCHIVM. SVA. INPENSÀ.
DVCTV. SVO. CONSTITVIT. QVOD. VTI.
AMPLITVDINE SVA. DESCRIPTIONE. CON-
CINNITATE ET. MVNDITIÆ. PLERISQVE.
FERE. ORBIS. TERRARVM. NOSOCOMIIS.
ANTECELLIT. ITA. OB. COPIAM SVBSIDIO-
RV. DELECTVM. APPARATVVM. COM-
MODORVM. OMNIS. GENERIS. VARIETA-
TEM. TVM. MEDENTIVM. ÆGRIS. AVT.
INSERVIENTIVM. PERITIAM. AC SOLER-
TIAM. PLVRIMVM. HACTENV. OPIS. AT-
QVE. AVXILII. QVOCVNQVE MORBORVM.
GENERE. AFFLICTIS. ATTVLIT.

QVOD. ITEM. VT. LVCVLENTISSIMVM.
 BENEFICIUM. LABORANTI. HOMINVM. NA-
 TVRÆ. IMPENSVM. AD QVAM. PLVRI-
 MOS. PERTINERET. ALIA QVOQVE. AD.
 HVIVS. NORMAM. EXCITARE. PER. PRO-
 VINCIAS. NOSODOCHIA. DECREVIT. SIC-
 QVE. CIVIBVS SERVANDIS. ET. MEDICIS.
 VTILISSIMIS. IN. HAC. ÆGROTATIONUM
 AC MORBORVM. PALÆSTRA. FINGENDIS.
 DE. VNIVERSO. HOMINVM. GENERE.
 OPTIME. MERITVS. EST.

HASCE. OBSERVATIONES. PRACTICAS.
 VT. EIDEM. MAXIMO. NOSOCOMIO. VSVI.
 ESSENT. SCRIPTAS. A SE. VVLGATASQVE.

D. D.

JOSEPHVS QUARIN

P R Æ F A T I O.

EQuidem ante complures annos receperam, editurum me propediem quosdam in morbos chronicos observationes; verum, ne præstare, quæ promiseram, illico possem, cum alia multa, tum morbi etiam, in quos identidem incideram, in causâ fuere. Huc accedit, quod adversaria, in quæ observata mea conieceram, mutando forte domicilio, magnam partem aut distracta, aut dilapsa perierint; verebar deinde, ea, quæ hîc, illic nova ac pene singularia animadverteram, continuò in lucem prodere, cum probe scirem, ut aphorismum condas, non uno alterove factò, sed plurium annorum certâ ac luculentâ experienciâ opus esse; denique propterea quoque diu anceps hærebam, num observationes hæc meas publici juris facerem, quod tam multa eorum, quæ olim vidissem, notassimque, nunc apud alios quoque auctores hinc inde sparsa reperirentur.

At postquam Augustus supremam generalis Nosodochii Vindobonensis præfecturam mihi demandasset, junioribus, & in arte minus exercitatis prodesse me posse arbitrabar, si, quæ apud præstan-

tissimos scriptores dispersa inveniuntur, in unum aliquod opusculum congererem, eaque novis nonnullis usûs mei monitis vel augerem, vel confirmarem. Id quod mihi jam antea quoque feliciter sane evenit, cum privatis prælectionibus ac clinicis, quas vocant, demonstrationibus in Fratrum Misericordiæ nosocomio habitis, & medicos effinxissem, qui per vastissimas austriaci imperii ditiones distributi, cum laude ac fructu in ægris curandis versantur, & ipse apud exteros complures, artis peritos, qui tum forte Viennæ aderant, meque audiebant, non minimam existimationem mihi comparassem.

Cœterùm in hoc opere non de chronicis solum, sed de aliis quoque morbis, qui occurrere quam frequentissimè solent, agere constitui; multa nihilominus, quæ ad theoriam spectant, omnino non attingi, quod ea fusius pertractata apud Ill. van Swieten, aliosque inveniuntur. Nonnunquam tamen de morborum causis prolixius differui, cum teste Celso, (a) nescire vulgo credantur, quomodo tractare morbos oporteat, qui, unde ii orti sint, ignorant.

(a) L. I. p. 2.

Ad morbos venereos quod attinet; quædam solum velut fragmenta concinnavi; nonnulla etiam admiscui, ad alios morbos spectantia, quorum singula sua sibi capita vindicarent; neque enim de illis fusiùs, neque de his singillatim agere placuit, ne aut libri moles nimium cresceret, aut quamplurima, quæ vulgò apud auctores reperias, denuò pertractanda essent.

Nonnulla, quæ olim laudabantur, nunc verò ab aliis improbantur, in medium attuli, quamvis ipse quoque damnarem; cum fieri possit, ut quæ hodie rejicimus, laudentur impofterum, eademque sorte medicaminum sit ratio, quæ vocabulorum, quorum.

Multa renascentur, quæ jam cecidere; cadentque.

Quæ nunc sunt in honore.

Non pauca, quæ nuper commendata fuère, medicamenta tentavi, quòd, uti Hippocrates ait, inventa absque ratione calumniari, vel ignominiose rejicere aut maligni sit, aut ignorantis; multa tamen in usum non adhibui, cum, (quæ Mortoni sententia est, de cortice peruviano agentis) minime deceat, experiundi cau-

sâ, probata remedia incertis, minùsque exploratis posthabere.

Cæterùm cum Olao Borrichio (b) non reformido iudices, quin etiam opto; sed æquos, sed omnibus artis præceptis, usuque diuturno eruditos; sed ejusmodi, qui locum in subselliis diu ante occupaverint, quam e tribunali pronuncient. Quodsi deinceps quædam aliter se habere in numerosissimâ generalis Nosodochii turbâ ægrorum deprehendero; nova quæpiam, & memoratu digna occurrerint, candidè fatebor, candidèque impertiar; quippe qui in frequentissimâ hâc amplissimâque urbe triginta & amplius annos ingenui nomen medici, & ab omni fuce longe remoti obtinuerim.

(b) In præfat. de med. hermet.




INDEX CAPITUM.

	Pag.
CAPUT I.	
<i>De Apoplexiâ.</i>	1
CAPUT II.	
<i>De Epilepsiâ.</i>	11
CAPUT III.	
<i>De Tussi.</i>	20
CAPUT IV.	
<i>De Hæmoptysi.</i>	31
CAPUT V.	
<i>De Phthisi.</i>	42
CAPUT VI.	
<i>De Asthmate.</i>	65
CAPUT VII.	
<i>De Hydrops Pectoris.</i>	76
CAPUT VIII.	
<i>De Ascitâ.</i>	90
CAPUT IX.	
<i>De Vomitu cruento.</i>	121
CAPUT X.	
<i>De Cholera.</i>	127
CAPUT XI.	
<i>De Dysenteria.</i>	130
CAPUT XII.	
<i>De Ictero.</i>	147
CAPUT XIII.	
<i>De Hæmorrhoidibus.</i>	159

INDEX CAPITUM.

	C A P U T XIV.	
<i>De Arthritide.</i>		167
	C A P U T XV.	
<i>De Podagrâ.</i>		177
	C P P U T XVI.	
<i>De Morbis Venereis.</i>		187
<i>Formulae.</i>		199



C A P U T I.

DE

A P O P L E X I A.

Apoplexiæ rure quam in urbibus rariores, viros crebrius, quàm fæminas corripunt. An ob menstrua, an ob vitam istarum magis sobriam? Fossiores metallorum non adeo frequenter apoplexiæ obnoxii sunt, ut Ramazzini notat.

Plures maniacos apoplexia interiisse novi.

Hæreditarius hic quibusdam in familiis est morbus; passim circa æquinoctia & solstitia crebrior observatur. Unde natæ fortassis majales curæ, & venæ sectiones. Immortali vir memoria dignus Morgagnius juvenum apoplexias citò lethales evadere ait, senum in diuturnas resolutiones abire. Quæ nullis antegressis signis, veluti gravedine capitis, vertigine &c. apoplexia ingruit, ea periculi plurimum habet, cum aut polypum internum, aut vasa rupta indicet; illa vero lethalis, cum uno corporis latere paralyti correpto alterum vehementius convellitur.

Neminem unquam vidi, qui, si manum eidem capitis parti crebriùs admoveret, mortem effugisset, etsi cætera symptomata non ita gravia viderentur.

Laudant quidam largum urinæ profluvium, sed è reliquis symptomatibus intelligendum, an non ex resolutione hæc evacuatio orta sit.

Sudorem copiosum ac validum è toto corpore manantem multi salutarem esse censent : ego eum lethalem reperi, ubi in principio morbi absque febris imminutione animadvertitur.

Superveniens apoplexiæ frigidæ febris eam quandoque solvit; si respiratio levetur; ast ubi hæc gravior evadit pessimum denotat.

Hinc rectè Piquerius regis hispaniarum archia-
ter monet : solvi apoplexiam febre, illicò super-
veniente; nequaquam verò, ubi aliquanto post,
& confirmato jam morbo accesserit. (a)

Quidam nullis functionibus corporis læsis per complures annos pulsum habent perpetuo inter-
mittentem; hi frequenter repentè extinguuntur,
uti illi quoque secundum Hippocratem qui sæpe
absque manifesta causa animo linquuntur. Ho-
rum cadavera aut polypos aut vas ruptum in
præcordiis exhibent.

In apoplecticis post annosas cæphalalgias, &
vertigines in capite potissimum tumores, aut ex-
crescentiæ reperiuntur.

Ubi a vi externa apoplexia orta est, etiamsi
symptomata emendentur, si rigor accedat, cita
mors sequitur.

Omnia, quæ cerebrum comprimere possunt,
in causis apoplexiæ numeranda esse censet van
Swieten : sed & vulnera cerebelli sanata fuisse
accepimus, & puerum quemdam, qui scirrhum
cerebelli diuturnum circumferret, vidit Halle-
rus. (b)

(a) Prax. med. T. I. p. 46.

(b) Physiol. corp. hum. T. I. p. 477.

Interdum ex ingluvie apoplexia oritur. Sæpe in cadaveribus nihil repertum est, quod afferre mortem potuisset, uti Willisus, Morgagnius, & Ballonius (c) observarunt, velut si cum anima causa quoque mortis fugisset. Videtur in apoplexia quandoque adesse spasmus, qui ad totum systema nervorum se extendit, & congestiones in encephalo creat; ut ex apoplexia à terrore nata paret.

Nonnunquam in aëre quidquam in esse probabile est, quo fons & principium vitæ deleri possit. Hinc animadvertente Weikardo (d) certis temporibus apoplexiæ & paralyfes grassantur, quarum nulla satis certa causa appareat.

Inter apoplexiæ causas referenda quoque est salivatio mercurialis frigore interrupta. A dormitoriis recenti calce illitis, ac præcipue plus æquo calefactis Lancisius apoplexias, van Swieten hemiplegias ortas vidit, prorsus insanabiles. Refert quoque Plinius lege apud romanos cautum fuisse ne quis intra triennium in ædificiis recens exstructis habitaret. Cum senes, tum alii quoque ex nimia venere ob virium vitalium defectum apoplexia pereunt.

Divisio in sanguineam, & serosam, quæ tamen rarissima occurrit, ad praxim sufficit, nam quæ à polypis, aut atrabile mota nascitur, immedicabilis est.

In apoplexia sanguinea æger erecto trunco, declivibus cruribus, nudo capite, tecto parum reliquo corpore collocandus est, arcenda turba hominum à conclavi, cavendum item à frictione corporis, ab odoriferis, & spirituosiss.

(c) Conf. med. L. III. Conf. 71 T. III. p. 339.

(d) *Bermischte mediz. Schriften.*

Hic venæ sectiones institui, & reputi debent, sed uti Lieutaud præcipit, (e) ne athleticis quidem tantum sanguinis detrahendum, ut calor nativus solvendo morbo necessarius extinguatur.

E jugularibus nonnisi post prævias phlebotomias sanguis mittendus, ne collo fascia constricto vasorum encephali plenitudo augeatur.

Hirudines ponè aures, si vero hæmorrhoides tumeant, ano applicandæ sunt. Quæ si nil proficiant, Aræteus cucurbitulas occipiti affigi, sanguinemque largiter educi jubet, unde præsens auxilium natum esse vidit Sennertus.

Si inter sanguinis missiones pulsus fortior evadat, & intermittat nonnunquam, quin symptomata imminuantur, mors imminet.

Sinapismi pedibus applicari possunt, vesicantia nocent; nisi sanguine quantum opus est detracto, & humorum orgasmo minuto.

Clysmata solum antiphlogistica injicere convenit.

Tres item quatuorve unciae aceti aqua dilutano injici possunt. Absint purgantia drastica. Sed nimis meticulosi sunt, qui leniora timent. Hinc propinare licet mixturam è sale medio & roob sambuci (N. 1.) ut corpus sæpius purgetur, facta purgatione eidem mixturæ extractum arnicæ ad gr. viii---xii. & amplius addendum est. Ubi sanguine misso æger levatus est, & pulsu in debilem mutato facies pallidior evadit, spiritus Mindereri, camphora cum nitro locum habet. (N. 2.)

Suadent nonnulli ut frigida capiti fomenta applicentur, quod sperant fore, ut lacerum hinc vas contrahatur, effususque sanguis insue-

gatur, cum hic aliquando sponte dissipari videatur teste Wepfero, (f) sed si consideremus ex aspersa improvise ad nucham & caput frigida cecitatem & immedicabiles paralyses extitisse, facile patet, quam infidum hoc remedium sit, quamque inimicum famæ medicorum vix alia re, quam Celsi effato excusabile: melius est anceps remedium experiri, quam nullum.

Commendantur emetica, præcipue si ventriculi repletio præcessit. Neque successu hæc methodus interdum caruit, verum cum vomentibus fere omnibus facies turgeat, oculi cum tumore rubeant, ancephali vasa inflentur, & nonnunquam in sanguineis sumpto emetico apoplexia successerit, facile intelligi potest, quam periculi plenum hocce remedium sit.

Pessimè errant, qui ob solum materiæ biliosæ vomitum propinant emeticum, cum e plethora caput obturbante nausea & vomitus biliosus oriri possit.

Cel. Murray (g) minus favet emeticis, dum clysmata ex decocto foliorum tabaci parata improbat propterea, quod vomitum cient.

Emeticum, uti Nicolai (h) monet, incertum est remedium, nec profuturum, nisi malum in ventriculo hæreat.

Vix cienda emesis videtur, nisi constet, ægrum paullo ante morbum nimis replevisse ventriculum. A pluribus vitriolum album à granis XV--XXX & ultra exhibetur ad vomitum citò movendum, sed nativum præsertim Goslariensè non omnino tutum remedium esse videtur, cum de zincò,

(f) Hist. apop. observ. Illustr.

(g) Mat. med. T. I. p. 472.

(h) *Recept und Rurarten.*

ferro, cupro, & plumbo participare soleat.

Præstat penna fauces irritare, quàm emetica violenta propinare.

Neque tepido aut mellito potu promovenda vomitio est, ne ventriculus magis distendatur.

Ne in malum recidat sanatus æger, juverit interdum sanguinem mittere, quamquam id solum non sufficiat, cum phlebotomia corpus ad novam generandam plethoram disponat. Itaque lenia purgantia; ut aquam angelicæ, sal mirabile, amarum quandoque exhibere oportet, & diæta tenuior observanda est, quæ tamen raro obtinetur, cum hi ægri duplum ejus, quod sani solebant, & comedant, & digerant.

Abstinendum pomeridiano somno, qui plethoram augeat. Cavendum à nimia collaris adstrictione, cum ex ea & in recte valentibus hæmorrhagia narium, & pertinax cæphalalgia sæpius nascatur.

In apoplexia serosa clysmata acriora è sale amaro (N. 3.) aut tartaro emetico (N. 4.) injicienda sunt.

A decocto tabaci in clistere exhibito præcordiorum anxietates lipothymias, & frigidum circa frontem sudorem extitisse practici observarunt.

Purgantia validiora in apoplexia frigida minori volumine præscribenda sunt, ut eò facilius deglutiantur.

℞. Resin. jalapp. ʒ j.
tere cum jv. nucleis pini, adde

Syr. rosar. solut. dr. vj. Sumat omni quartæ horæ parte dr. jß. donec purgetur.

℞. Extract. jalapp. aquos. dr. jß.

Aquæ fœnic. unc. jjß,

Syrup. de duab. unc. ʒ.

Sumat omni quartæ horæ parte unciam dimidiam.

Odorifera è spiritu cornu cervi aut salis ammoniaci naribus admoventur Sed vix quidquam proderunt : nisi purgantibus, & clysmatis acrioribus causa comprimens derivata fuerit.

Cucuphæ ex herbis cephalicis; velut rore marino, lavendula &c. compositæ conveniunt.

Vesicantia artubus ipsique capiti apponenda sunt.

Tentari item sialagoga possunt, quæ humores educunt, & ad externarum carotidum ramos determinant.

Sternutatoria haud omni periculo vacant.

Sæpe, multumque quæsitum est, an venæ sectio in apoplexia serosa locum habeat.

Ill. van Swieten levem sanguinis detractationem concedit, ut medici samæ consulatur, & stimulantia tutius adhiberi possint. Morgagnius eam necessariam esse judicat, ubi & in apoplexia serosa sanguis vasa distendit.

Hac in re pulsus, vires & vitæ ratio ante actæ lucem præbebunt; nam qui male nutriti, aut mœrore diuturno confecti sunt, aut intentis meditationibus adsveti, damnum inde acciperent

Depletionibus factis ad stimulantia & incidentia fortiora confugere licet; hinc pro diversitate symptomatum & causæ camphora, spiritus cornu cervi succinatus, sapo Starkeianus, pilulæ ex extracto enulæ, myrrhæ, galbano & aloe, vel infusum ex ruta cum hellebore conveniunt, nonnunquam etiam ad setacea confugere oportet.

Ubi ulcera diuturniora citius consolidata fuerunt, ad fonticulos, aut setacea recurrendum est.

Quandoque apoplexiæ tussis accedit cum sibilo, & difficili materiæ crassæ ac pituitosæ excretionem, suffocationem minitante. Tum vero incidentibus, & expectorantibus opus est, ut ermes minerali, mixtura ex gummi ammoniaco,

extracto enulæ, & oxymelle scillitico, (N. 5.) sed sæpe malum, quod paralyfi nervorum in pectore ortum debet, non levatur.

Haud assentior Cl. Sauvages asserenti, apoplexiam ex arthritide ortam eodem, quo sanguineam, modo tractandam esse.

Si enim inflammatoriæ morbus naturæ est, venæ sectionibus, leniter revellentibus, enematis antiphlogisticis, sinapismis quidem &c. impugnandus est; si vero languida humorum circulatio, pallida facies, pulsusque mollior, tum vesicantia partibus affectis applicita, camphora, moschus, enula, sulphur, antimonium locum habent.

Est & febris apoplectica. Sic vetustissimi medici Diocles, & Aesclepiades febrium periodicarum cum accessibus lethargicis meminerunt.

De his in tractatu de febribus egi.

Nonnunquam veræ apoplexiæ jungitur febris biliosa remittens. In similibus ut plurimum contra diætæ regulas antea peccatum est. Ægri sub initium paroxyfmi vomunt, certis temporibus levantur, nunquam tamen ad se redeunt (unde hæc à febre apoplectica distinguitur) urinam, siqua colligi potest, jumentosam mittunt, dum exacerbatione redeunte in pejus ruunt; plerumque oscitant, pulsus est celerior, quandoque inæqualis, aut intermittens, qui accessu finito magis naturalis evadit. Hic clysmata antiphlogistica injicienda sunt, & alvus mixtura salina (N. 6.) egregie ducenda: tum brevi intervallo ad corticem peruvianam confugiendum, isque per os & anum (N. 7.), cum æger remissius habet, ingerendus, non intermissis vesicantibus, moscho aut camphora, (N. 8.) dum pulsus debilis, aut inæqualis tangitur.

Convalescentibus ex apoplexia ægris cavenda

est ani obstructio ; nam multi in sella pertusa, dum nimio opere niterentur, apoplexia extincti sunt.

In sanguineis vitanda quævis major seu animi, eu corporis commotio, cum primis ira.

Aquæ minerales iis qui apoplexia levati sunt, vix concedendæ, etsi antea iis usi fuerint, cum teste Willisio eæ largius haustæ nec per urinas satis ejectæ lethargum inducant.

Bergius potum coffeæ apoplecticis & lethargicis noxium esse declarat, idem tamen (i) asserit, vim quamdam coffeæ inesse excitantem, quod apud arabes quosdam evidentissime compertum fuit, qui, cum opio abusi sunt, potu coffeæ iterum eriguntur.

Tabaci usus apoplecticis minus conducit ; sed si post longiorem usum ab eo repente abstinentes temulenti evadant, redire ad consuetudinem debent, eoque moderatè uti.

Constat apoplexiam sæpe in hemiplegiam aut paralysem desinere ; remedia cum calida, tum stimulantia, quæ nullo discrimine à multis propinantur, sanguineis nocent, rectissimeque Traillianus ait, calidioribus, ac siccioribus curandis refrigerantia & humectantia convenire.

Hinc ea in memoriam revocanda sunt, quæ superiùs de diversa calidæ & frigidæ apoplexiæ curatione præcepi.

Nec senibus paralyticis purgantia aut clysmata acriora, nec siccis atque exhaustis sudorifera conveniunt.

Qui ex apoplexia sanguinea hemiplectici evasere, iis electrificatio perniciosa est, namque &

(i) p. 113. Mat. med.

pulsum celeriores reddit, & hæmorrhagias movet, & humores majore impetu versus caput agit.

De Haen exemplum adfert paralytici inter electricos ictus apoplexia correpti, & quarta post hora extincti.

Neque balnea sulphurea ejusmodi ægris prosunt, quæ tamen in frigidioribus juvandis magnam vim habent.

Quare Mead minus recte asserit, immersiones calidas omnibus omnino paralyticis obesse, quin imo diuturnus eorum usus quandoque necessarius est: Nec bene Duretus pronuntiavit, paralyticos, nisi brevi sanentur, balneis sulphureis insanabiles reddi. Si vero inter balnei usum vertigo, temulentia, aut tensio capitis major percipiatur, vel vires deficient, aut somnus arceatur, cibive appetentia langueat, ab ulteriore usu cessandum est.

Malo prorsus consilio debilioribus, antequam balneo uti cœperint, vena tunditur, aut purgantia exhibentur, nisi certa plethoræ aut saburræ, in primis viis latentis signa deprehendantur. Sæpe vesicantia prosunt, paralyticis illi spinæ dorsi loco apposita, unde nervi ad partem affectam egrediuntur. In frigida paralyfi linguæ collutoria ex radice pyrethri cum sale ammoniacâ, vel pastilli masticatorii ex radice imperatoris, aliisque acrioribus tentari possunt.

℞. Pulv. rad. pyreth. dr. i. β.

Salis ammon. dr. ij.

Aq. salviæ ℥β.

Spirit. cochl. dr. vi.

Mista stent per noctem, mane cola; & adde Mell. unc. β.

Exhibe.

℞. Rad. imperator. dr. iij.

Sem. sinap. dr. j.

Pulverata excipe melle rosato, ut fiat massa solidior, ex qua formentur pastilli rite exsiccandi.

Egregiam in paralyfi curanda vim habent herba anthos & arnica, jam à Junkero in hoc morbo laudata, cujus flores efficaciores herba deprehenduntur. Ewers in hemiplegia serosa beladonnâ cum successu adhibuit, & quandoque à x granis ad xx ascendit. Mirabar equidem, rem ei semper è sententia cessisse, cum sciam, magna in præbendo hoc remedio circumspeditione opus esse propterea, quod sæpius ab ejus usu mentis obtenebratio, & balbuties linguæ enata sit.

Frigidis, qui pastaceo erant habitu, quandoque sequens pulvis, præter alia remedia, profuit.

℞. Colocynth. gr. j.

Sacch. unc. β. Divide in octo doses.

Sumat tertia, aut quarta quavis hora ejusmodi pulverem.

Hiscæ ægris quandoque & fonticuli, & setacea conducunt.

C A P U T II.

DE

EPILEPSIA.

Viris, quam fæminis familiarior hic morbus est; junioribus item præ adultis infestus.

Quin & hæreditarius nonnumquam, ab avo ad nepotem transit, silens in filio.

Multiplices sunt epilepsiæ causæ: vermes,

terror, nimia nervorum irritabilitas, exostoses, caries ossium cranii &c.

Duæ hoc anno fæminæ sub insultu epileptico ad nosocomium deportabantur quæ omnibus frustra adhibitis in paroxysmo periëre, una harum topium, altera exostosim in cranio ex lue venerea neglecta exhibuit.

Sæpe in cadaveribus eorum, qui ex epilepsia decessere, nihil detectum fuit, quod culpari posset.

III. van Swieten mulierem norat, quæ cum marem utero gereret, epilepticiis insultibus vexabatur: minime verò dum fæminam gestaret.

Inde patet, quam vana sit specificorum prædicatio, cum causa mali sæpe incognita sit, neque cognita semper tolli possit.

Epilepsia, quæ absque signo præmonente ingruit, fere incurabilis est.

Morbus hic, ut apud quosdam auctores legitur, quartana interdum, hæmorrhoidibus, diarrhæa, ulceribus, mutatione denique cæli sublatus est: at mihi hujusmodi felices eventus nondum observare contigit.

Quandoque in puellis circa pubertatis tempus solvitur, sed hoc de plethoricis solum valet.

Rarò paroxysmo faviente pereunt epileptici, sæpius apoplexia enecantur. Hinc si oculi rubeant, major calor, & tensivus capitis dolor animadvertatur, vena secanda est.

Inter paroxysmum ægros liberiore in aere, & capite elevato collocare oportet, cavereque ne lapsu, aut morsu lædantur.

Neque acriora sunt eorum naribus admovenda, ne sternutatione excitata rumpantur vasa encephali, sanguine distenta.

Opium à veterano Practico in ipso epilepsie æstu propinatum non modo nihil levamenti

adtulit, sed soporem apoplecticum, me spectante, induxit.

Extra paroxysmum abstinendum ab omnibus, quibus eum accelerari compertum est; præcipuè a venere, in quam proniores epileptici sunt.

Quandoque in externis corporis partibus paroxysmi orientis vestigia apparent. Tum eæ fascia tortili ligari, aut cauteriis, vesicantibus, opiatibus urgeri poterunt, quamquam hæc omnia incassum tentata vidi.

Infantes quandoque epilepsia propterea corripuntur, quod manantia capitis ulcera arte siccata fuere. Hinc recte Dolæus & Kleinius animadvertunt, achores, & tineas saluti pueris esse, cum gravioribus eos malis liberent; neque facile epilepsia laborare eos, quibus scabiosæ in capite crustæ nascuntur.

Hæc cum sunt, flores sulphuris, spiritum fuliginis, athiopem antimoniam, decoctum antimonij cum sarsaparilla, interpositis purgantibus tentare licuerit. Semel in malo recenti emplastrum meliloti profuit cum quinta parte vesicatorij capiti adplicitum.

Quandoque etsi rariùs ex obstructione viscerum, & dispositione atrabiliaria epilepsia nascitur, uti jam Hippocrates observavit.

Tum decoctum solvens è saponaria & taraxaco, addito quandoque helleboro nigro profuerit; debilioribus pilulæ tonicæ Beccheri conducere possunt. Prosper Alpinus auctor est, sacerdotes quosdam helleboro, sub specie olei sancti cum fructu usos esse ad morbos, qui pro dæmoniis haberi solent, abigendos, inter quos epilepsia numeranda est. Cavendum ne pro radice hellebori nigri rad. adonid. vernalis L. substituatur.

Diversa epilepsiæ remedia à diversis laudantur:

veluti phosphorus, viscum quercinum, folia aurantiorum, hyosciamus, stramonium, belladonna, sulphur venereum.

Phosphorus à gr. j. ad. iij. ter, quaterve per diem, vel in quodam solutus liquido, vel cum conserva datur, dum circulatio augenda est. Verum anceps remedium esse, & circumspectione egere ex observatis Cl. Weikardi (a) constat. Generaliter omnia stimulantia & roborantia sanguineis epilepticis nocuaprehenduntur.

Viscum quercinum, cujus vis atque efficacia in cortice maxime residere creditur, vel in infuso, vel in pulvere ad ʒ ij, vel dr. j. omni sexta hora propinatum aliquoties profuit, oportet autem, ut lentè exsiccet.

Ante complures annos pulvis quidam ex Hollandia, ut specificum antiepilepticum Viennam allatus est, qui è foliis aurantiorum pulverisatis constare videbatur. Eo remedio ægrum gravissimis paroxysmis, sæpiusque per diem redeuntibus affectum sanavi. Decoctum, (N. 9.) vel pulverem nostratum aurantiorum ad dr. ʒ sæpe per diem, sed incassum præbui, etsi quandoque symptomata è majori nervorum irritabilitate profecta mitigata viderim.

Cel. Cullen nihil à bile tauri inspissata emolumenti sperat; tametsi nonnullos epilepticos, habitus pallecentis ac tumiduli nulla morbi causa cognita hujus remedii ope per plures septimanas continuati pentus sanavi, Idem vir Celeberrimus (b) ait, spem esse, fore, ut arsenicum

(a) *Bermischte medizinische Schriften*. IV. Et. 105. &c.

(b) Tom. III. pag. 85.

fortè prodesse possit, cum in febribus intermittentibus non sine fructu adhibeatur, sed in Tractatu de febribus monui remedium hoc infidum & periculo plenissimum esse.

Nec hyosciami neque stramonii extracto epilepticum curatum vidi; illud interne tuto adhiberi posse negat Cl. Gredinh: (c) hoc, parva & repetita dosi sumtum, quandoque epilepsiam tollit quidem, uti videtur, sed specie mitigationis revera fallit, & rem in perniciem vertit.

Belladonna, teste auctore supralaudato neminem quidem epilepsiæ eripuit, aberrationem tamen mentis imminuendo levamen attulit.

Sulphur venereum seu parva, seu auctiori dosi exhibitum, neque ad fugandam, neque ad sublevandam, epilepsiam quidquam valere, usu didici, imo cum Cel. Baldinger medicamentæ pro parata vix unquam administranda censeo.

Moscho mentis stupor, & alienatio, quæ post paroxysmum sæpe diutius remanent, multo citius tolluntur, faciliusque ad se redeunt ægri.

Oleum animale Dippelii à Springsfeld pro inefficaci habitum, malo recenti, eoque a mens- truis vel non prodeuntibus vel suppressis orto bis, ter per diem ad x. & xx. guttas propinatum profuit.

Præstantissimum longè remedium, cujus ope plures epilepticos sanavi, radix est valerianæ sylvestris ad dr. ij--- v. per diem longiori tempore exhibita. Fortè sapius epilepticis nullam opem attulit propterea, quod ii vel in victu, vel aliis in rebus delinquant.

(c) Ludwig Advers. med. pract. T. I. P. II. p. 347.

Præferenda est substantia extracto, aut decocto : radix vero legenda ante, quam folia erumpant.

Duos infantes phar̃maca respuentes epilepsia liberavi, nutricibus eorum radicem largiter præbendo.

Nunquam ex interno valerianæ usu febrim urticatam exstitisse memini, ut in Transactionibus anglicanis refertur. Sæpius solam, quandoque aliis phar̃macis mistam propinavi. Ubi vermium suspicio erat latentium, anthelmintica : ubi bilis iners, aut abdomem tumidum, fel taurinum inspissatum : ubi nervi faciles irritatu, castoreum, asam foetidam, aut moschum, si odorem agri ferebant : in nimia debilitate martialia addidi.

Ubi corpus glutinosi humoribus abundat, egregium tinctura martis helleborata usum habet à guttis xx --- L. de die propinata.

Cum alio loco de morbis à vermibus agere animus sit, sufficiat hic notare, quod debiliori, aut facile irritabili agro vermibus laboranti mercurialia propinanda non videantur, præcipue cum Cl. Scopoli referat, nusquam frequentiores intestinorum lumbricos deprehendi, quam iis in locis, ubi argentum vivum è terra effoditur, hominesque aerem hauriunt mercurio inquinatum, qui igne redditus volatilis malè persæpe eosdem afficit. Semen sabadillæ, quod sæpius exhibui, agros torquet ac vomitiones ciet, & cum vermes excernuntur, id potius virtuti purganti tribuendum videtur.

Spigeliam anthelmiam nondum adeptus sum, qua Cel. Bergius (d) violentas convulsiones

cūrat, etsi nulli vermes in conspectum venerint.

In doloribus tantum non convulsivis, qui a vermibus creantur, mitigandis, cataplasma e farinā, felle taurino, summitatibus absynthii & oleo idoneum fuit.

In horrendis symptomatibus quandoque a vermibus excitatis cucurbitæ siccae ad regionem epigastricam vel hypochondria applicatæ præsentissimam opem tulerunt.

Epilepsia certo tempore recurrens corticem cum Valeriana poscit.

Cum hystericæ epilepticis insultibus vexantur, quandoque valeriana cum gummiferulaceis, & asa foetida (N. 10.) adjumento est; in mobilioribus tamen, ubi cephalaria, æstus corporis major, indeque existens vertigo animadvertitur, nervina remedia, & calidiora detrimenti plus, quam emolumenti habent.

Noveram ante complures annos puellam, perquam facilem irritatu, quæ cum vehementioribus animi motibus concitaretur, non raro inde epilepsia corripiebatur. Fortè fortunā sub idem planè tempus, quo imminentis paroxysmi signa jam apparebant, concentus musicos, quibus mirificè aliàs delectabatur, audierat; neque tum paroxysmi vim ullam aut accessionem sensit.

Itaque, quoties deinceps epilepsiæ redeuntis metus ingruebat, harmonici concentus in usum felici eventu vocabantur, donec firmato aptis remediis corpore ægra penitus malo liberaretur. Quantum ad spirituum motum compescendum, refringendumque musica valeat, id quotidiana nos experientia docet; nam & parvuli ejulantes cantibus placantur, & languentes excitantur variis vocum, aut fidium sonis. Quæ fortè causa fuit instituendæ musicæ militaris, neque enim

priscos aut instrumentorum musicorum, aut cantus etiam vim atque efficaciam ignorasse putandum est, uti Ill. van Swieten observat, quin & morborum incantamenta inde originem traxisse propius ad verum accedit. His quoque non Homerus solum, sed ipsæ etiam sacræ paginæ consentiunt: atque divinus Plato ait: musicam non idcirco à diis concessam hominibus esse, ut aures demulcerentur, sed ut animi perturbationes hujusce voluptatis lenocinio sedentur, atque in ordinem redigantur.

In epilepsia recenti, nec admodum gravi, quæ e præcedente onania sequebatur, cum mucosus humor è genitalibus copiosius defluens, corpus in dies labefactaret magis, sequentes pilulæ opem tulerunt.

℞. Rad. valerian. unc. j.

Limatur. mart. non rubig. dr. iij.

Myrrh.

Oliban.

Extract. torment. aa. dr. jβ.

F. pil. gr. iij.

Sumat ter per diem vij—x. & ampliùs non intermissis spirituosis & aromaticis spinæ dorsi frictionibus.

Vidi epilepticos duos, quibus remedia omnia hic commendata incassum adhibui, pulvisculis ab agyrta propinatis integrè sanatos: vidi quoque alios, qui iisdem pulveribus nullo prorsus emolumento usi sunt. Electricitas epilepticis adplicata hucusque in nosocomio non profuit.

Inustio calvariæ, candenti ferro facta, periculosissima habenda, imò lethalem eam de Haen expertus est.

In desperatis rebus imitandâ sed cauta manu, fortè essent Nigritæ, qui totam futuram coro-

nalem longa & ampla stupa instar moxæ, nec sine maximo emolumento adurunt. (e) Et cum Cl. Lorry nervorum morbos, hodie frequentiores, quotidiano tabaci naribus attracti, usui adscribere nolim, eum tamen epilepticis interdicens puto, quum ex ejus abusu, & morbum & furorem augeri Cl. Greding observaverit.

Quod ad pharmaca supra laudata adinet, nulla de iis propinandis certa lex, aut norma statui potest, cum modò hæc, modò illa profuerint.

Laudantur quoque balnea frigida, utpote roborando corpori perquam idonea, sed & hic quoque judicio est opus.

A balneis frigidis paroxysmum epilepticum exasperatum fuisse legimus. (f)

Universim balnea frigida, quæ nimium fortè antea negligebantur, nunciis nunc encomiis in cælum tolluntur. Cum quid prosperè iis effectum est, omnium id sermone ac laudibus celebratur; at si perperam res accidit, si incommoda inde graviora, eventusque sinistri consecuti sunt, alium tacetur.

Tobias Mathæius Anglicus ante Floyerum balnei frigidi usum Antwerpiae stabilire adlaboraverat, sed paullo post ejus consilia respui cœpere, ob enata inde detrimenta (g). Rectè igitur Ill. van Swieten asserit, martialia, & omnis generis roborantia balneis esse securiora, cum hæc externas tantum partes afficiant, nec longo admodum tempore agant.

(e) Kaempferus amœnit. exot. p. 195.

(f) Tode *Mediz. chyr. Bibl.* I, 9c. p. 117.

(g) Tralles de tuenda, p. 212.

CAPUT III.

DE

T U S S I.

Multiplex est natura tussium ac pro earum diversitate curatio multiplex.

Convulsiva ut plurimum infantes aggreditur, adultis minus infesta.

Sæpius epidemica est, nec caret suspitione infectionis.

Putat Lientaud eam non solum à spasmodica contractione glottidis, sed etiam à repletione bronchiorum provenire, cum in cadaveribus bronchia muco viscidiorè referta, aerique prorsus impervia observaverit.

Quidam causam mali in ventriculo & intestinis quærunt.

Probabilius & in his, & in pectore hæret, cum neque purgantibus solum, aut stomachicis, nec solis pectoralibus morbus depellatur.

Durat 7---14. hebdomades: morbus nonnunquam, sed mitior redit.

Diutius protractus hernias, gibbos & quandoque phthisin generat; nam tussis vehementiâ expressus sanguis, & è naribus stillat, & è pulmonibus ejicitur.

Cum ad tussim convulsivam hæmorrhagia accedit, morbus plerumque levatur; ubi vero hæc abundantior, aut frequentior est, ægritudo diuturnior evadit, corpusque exhaurit.

Quò diutius respiratio quiescit, quò facies

magis vel rubet, vel livet, eò pejus cum ægro agitur, tum verò pessimè, cum sopor, & convulsio supervenit.

Puillis vena vix secanda : majoribus natum solùm, cum pulsus plenus ac durus, pectorisque dolor, non unquam remittens, observabitur.

Vidi in nobilissima ægra vomitum à neglecta sanguinis detractiōe enatam. Emetico haud opus est, cum nulla in primis viis saburra hæret, ob vomitum convulsivæ tussi frequenter junctum; namque hic è mechanica faucium irritatione nascitur.

Multominus convenit agris debilioribus, & iis quibus livida est, aut rubicundior facies: quibus venæ tument, vel cor vehementius palpitat.

Principio morbi noxia sunt opiata, præcipue cum viscida excreantur; etsi enim tussim ad tempus sedant, ea tamen mox redit acerbior, & suffocationem minatur.

Neque ab oleosis, aut dulcibus, quibus ventriculus læditur, curatio auspicanda est.

Rejiciendum sperma ceti, tussientibus olim familiare remedium, cum fere semper rance scat.

Felicissimè curatio cessit, ubi mixtura salina cum manna repetitis vicibus in morbi exordio propinata fuit.

℞. Sal. mirab. Glaub. dr. ij---iv.

Mann.

Syr. althææ aa. unc. j.

Aq. fœnicul. unc. iv.

Sumat sæpius cochlear majus. Pro diversitate ætatis, aut temperiei dosis salium vel augenda, vel minuenda est.

Manna amica est pectori, & alvum movet.

A quibusdam, absente febris, potus coffeæ cum manna commendatur; cavendum autem, ne fabis nimium tostis oleum in iis contentum, empyreumaticum reddatur.

Corpore per aliquot dies leniter purgato, decoctum ex taraxaco, floribus verbasci, & liquiritia prodest, addito, si alvus tardior persistat, sale medio.

Ubi post evacuantia tussis admodum sicca animadvertitur, oleosa conveniunt; à quibus tamen abstinendum, si sputa viscida & glutinosa excernuntur; tum enim unciam dimidiam aut drachmas sex oxymellis scillitici priori decocto addere oportet.

Cum res magis urget, kermes minerale poscitur.

Egregiam in tussi convulsivâ opem sequens pulvis præstitit.

℞. Flor. sulph. dr. j.

Gum. arab.

— tragacanth. aa. dr. j. ℞

Extract. liquirit.

Sacchar. aa. dr. ij.

Kermes min. gr. ij—iv.

℞. Pulvis.

Sumat tertîa, aut quartâ quâvis horâ scrupulum unum, aut drachmam semis, bibatque insuper infusum ex radice fœniculi, floribus verbasci, & liquiritia.

Si sputo prodeunte tussis non minuatur, vesicantia, nisi valde tenelli, facilesque irritatu ægri sint, inter omoplatas feliciter admoventur, id quod Willisius in gravissima tussi quoque expertus est, quæ sputo crasso, & copioso exaggerata nullis remediis cesserat.

Propinatur à quibusdam in tussi convulsivâunctura cantharidum, sed hujus remedii usum

quandoque periculosum esse experientia constat; fortè notante Cl. Tode levamen inde secutum magis à cortice simul exhibito repetendum erat.

Ubi corpus quidem infirmum, ac imbecille est, at sputa facile succedunt, cortex peruvianus in decocto cum floribus verbasci, & liquiritia (N. 11.) plurimum utilitatis habet; namque & lapsas vires restaurat, & mali reditum prohibet. Ut infantum nausæ occurratur, aliquot fabæ coctæ addi possunt.

Si sub corticis usum sputa difficiliùs egeruntur, bis, terve per diem pulvis supradictus è floribus sulphuris, extracto liquiritiæ &c. sumtus profuerit. Atsi respirationis difficultas, pectorisque oppressio augesceret, abstinendum à cortice foret.

Ubi sputa purulenta ejiciuntur, decoctum corticis peruviani, modico lacte temperatum, præbere omnino opus est, neque lichen Islandicus negligi debet.

Laudat Rosenstein muscum arboreum, ac præcipue illum, qui quercubus adnascitur, cum minus, quam cortex infantibus displiceat, jubetque drachmam ejus unam, in lacte sufficienti coctam mane ac vesperi bibi, vel.

℞. Lichen. plicat. Linn.

Sacchar. aa. dr. ij.

F. Pulvis.

Sumat mane & vespere in lacte vel jusculeo tantum, quantum cultelli apex capit.

Commendantur à Gaubio flores zinci, qui, etsi sæpius eos præbuissem, semel tantum prodesse videbantur.

Damnando prorsus ac inhumano consilio, Sauvages duo, triave sacchari saturni grana suadet.

III. de Haen in tussi convulsiva sequens reme-

dium auxilio fuisse testatur : xx. aut xxv. Helices pomat. Linn. contundebantur, & per horam in pinta cerevisiæ, aut lactis coquebantur; tum colatura per duas, tresve hebdomades quotidie exhibebatur. In tussi ferina, aut cum acrimonia irritans demulcenda est, non incongrua hæc medicina fuerit, ut gummi arabicum, tragacanthæ; ast in exordio morbi, vel ubi multa glutinosa ejiciunt ægri, præcipuè verò stomacho minùs rectè habente, non conveniunt.

Curatione absoluta ægri leniter vel mixtura salina (N. 6.) vel tinctura rhei aquosa purgandi sunt, quoniam sæpe sputa sua deglutiunt. Idem locum habet curationis tempore, si appetitus deficit, & pondus ad scrobiculum cordis sentitur.

Cum melius ægri valent, mutandum conclave est; sic namque & sanitas citiùs recuperatur, & morbus rariùs revertitur.

Tussim, quæ in stomacho sedem habet, plerumque vitiata digestio antecedit, neque nausea abest; pondus item circa regionem ventriculi, tum sæpe vomitus, atque irritatio ad tussim, seu circa scrobiculum cordis, sive circa sinistrum hypochondrium observantur. Accedunt quoque ructus, at nullus in pectore renisus animadvertitur : ducto profundius spiritu non læduntur ægri, neque tussis inde augetur, nisi pectus unà affectum sit : plerumque exscreando magis, quam tussiendo lentum gluten educitur.

Quandoque sicca, aut humida, quandoque periodica, vel pectorali conjuncta est. Exasperatur pectoralibus, dulcibus, mulcilaginosiis, & oleosis, & pectoralibus. Digestiva & salia præmitti debent, post quæ aut vomitorium, aut si contra indicetur, purgans ex rheo cum salibus porrigendum.

Ubi glutinosum peccat, tartarus emeticus ipecacuanhæ ad vomitum excitandum anteponendus est.

Pro diversitate item temperamentorum varia requiruntur medicamenta. Siccioribus decocta ex taraxaco & cichoreo : addito, si alvus filet, sale medio; in iis, qui habitu sunt pastaceo magis, pilulæ ex extractis amaris gummiferulaceis, cum rheo (N 12) conveniunt.

Redeunte appetitu, oppressione ad scrobiculum cordis cessante, fugataque tussi sæpe roborantibus, opus est. Multis sequens remedium profuit.

℞. Elixir stomach. temp.

Liquor. viscer. D. V. aa. dr. ij.

Sumat bis de die guttas xxx---xl. ex aqua.

Potus quidem gelidus in tussi stomachali commendandus non est, nimis tamen anxie Sauvages omnem potum frigidum damnavit.

Tussès senibus familiares sunt, propterea fortè quod, ut Hippocrates notavit, raucedines ac gravedines in valde senibus non concoquuntur. Si humida sit tussis, at rectè cæteroquin valeant, nihil mutandum, ne tussi suppressæ asthma, & alii morbi succedant.

Cæterum ad symptomata attendendum. Sanguineis venam aperire decet, ne inflammatio, aut apoplexia sequatur; non enim viribus ætas, sed annis æstimanda est. Imo ætate provecti quī multum appetunt, neque corpus exercent, rectè tamen cæterum valent, crebriores venæ sectiones & ferunt, & postulant.

In tussi senum, ubi corpus stricti habitus, & sputa crassa sunt, decoctum ex althæa cum larga dosi oximellis scillitici prodest.

Nonnulli iterato siccissimè tussunt, donec

crassa tandem & glutinosa sputa excernant. Iis sequens mixtura adjuvento fuit.

℞. Oxymell. scill.

Oley amygd. recent.

Syr. alth. aa dr. x.

Gumm. ammon. dr. j.

Vitell. ovi. q. s.

Diu simul tritis adde.

Aq. Hyssop. unc. vj.

Sumat tertia, aut quarta quavis hora unciam unam.

In sibilo & stertore cum tenacibus vix excreandis sputis; pulveres cum kermes minerali (N. 13.) vel mixtura ex gummi ammoniaco (N. 14.) aut sequentes pilulæ indicantur.

℞. Flor. sulph.

Extract. enul.

-- liquirit. aa. dr. j.

Gummi ammon. dr. ij.

Rad. irid. florent. dr. β.

F. pilulæ gr. iij. iis sumtis bibatur infusum hyssopi & liquiritiæ, aut stipitum dulcamaræ.

Attendendum, ne radix iridis nimis exsiccata, aut vermibus erosa sit.

Quandoque sine fructu ista tentantur, & respirationis difficultas eo usque ingravescit, ut suffocatio metuenda sit. Hoc rerum statu sequentes pulveres levamento Senibus fuere:

℞. Sacchar. Θβ.

Flor. sulph.

Extr. liquirit. aa. gr. jv.

Kermes min.

Extr. scill. aa. gr. β--j.

Dosin prædictorum medicaminum definiunt vehementia tussis, respirationis difficultas, & tenacitas sputorum.

Tussim senilem, sæpiùs quidem profligatam, sed denuò redeuntem, nonnunquam fonticuli levant.

Cùm calor, & febris absunt, senibus, assuetis vino interdicendum non est.

Ab oedemate pedum, medicamentis, fasciis, aut tibialibus coriaceis retroacto, nonnunquam tussis nascitur, è quâ, timendum, ne hydrops pectoris consequatur. Tum vis externa comprimens illicò avellenda, & ad extractum scillæ confugiendum est.

Tussis, quæ statis temporibus redit, evacuato corpore, peruvianum corticem petit.

Eo, quo hæc scribo, tempore plures febre anomalâ affectos tractandos habui, qui sub accessibus vehementissimâ tussi siccâ cum notabili pectoris oppressione laborabant, solventia, demulcentia, mellita incassum propinabantur, demum dato cortice tussis cum febre evanuit.

Lapidæ, molitores, statuarii sæpiùs tussi corripuntur, quam asthma, aut phthisis excipit.

His talis situs suadendus, ut arenulæ, & lapilli à vento auferantur, eorumque inhalatio impediatur, Convenit præterea decoctum graminis multo melle saturatum, aut pilulæ è sapone veneto, gummi ammoniaco & extracto liquiritiæ.

℞. Sapon. venet. unc. j.

Extr. liquir. dr. ij.

Gumm. ammon. dr. j.

℞. pilulæ gr. iij.

Sumat ter per diem vjv---iij.

Tussis rheumatica tempestate grassatur humida, simul ac frigida. Sub initio morbi horripilationes, dolores aliarum partium advertuntur, sub vespertinum symptomata ingra-

vescunt; pulsus ut plurimum celer ac durus: tussis modò sicca, modò humida est: plerumque plures eodem tempore hoc morbo laborant.

Vena ferè semper, ac pro ratione virium & symptomatum iterarò secanda est.

Ubi pulsus initio morbi debilis est; aut venæ sectione factâ concidit, camphora cum modico nitro, & infusum ex floribus sambuci, verbasci, & liquiritiæ indicantur, queis nil proficientibus, vesicancia pedibus admoveantur.

Sputis prodeuntibus prodest pulvis ex floribus sulphuris, gummi arabico, tragacanthæ, & liquiritia (N. 15.) crassiora oximel scilliticum aut Kermes minerale postulant.

Eâdem ferè methodo tractari tussis catarrhalis debet, quæ non semper à suppressâ transpiratione, sed à materiâ etiam heterogeneâ in atmosphæra latente oriri videtur, cum quandoque ardente sitio catarrhi grassentur, eosque etiam opprimant, qui calido conclavi perpetuò inclusi nullis aëris mutationibus obnoxii sunt.

In multorum animis insedit præjudicata ea opinio, calefactis maturius hypocaustis, nasci catarrhos; qui potiùs hoc modo prohibentur, cum transpiratio æquabilior fervetur.

Vitandæ fornaces ferreæ, quæ cum & celeriter incalescant, nec segniùs frigeant, easdem injurias, quas subitæ aëris vicissitudines inferunt.

Præmissâ venæ sectione, si ea necessaria sit, de Moneta in catarrho laudat, pedum in aquam frigidissimam immersionem, sequentemque pulverem.

℞. Nitr. crystall. unc. j.

Cremer. tartar. unc. β .

Sal. ammon. dr. ij.

Sumat quarta quavis hora dr. j. ex aqua frigida, si adultus sit, sed sanguineus, aut ubi major inter tussendum dolor observatur, vix suadendum est, ut in frigidam pedes immergantur, sed balnea pedum tepida addito paulo sale tutiora videntur. Post tussim catarrhalem sub rudiore cœlo pectus laneâ subuculâ munendum est.

Nonnunquam in catarrho simplici sputa excernuntur foetidissima, quæque, cum aquæ injiciuntur, fundum petunt. Tum decoctum corticis, & lichen islandicus convenit.

Legi meretur Nicolai, & Eberhardi de Rosen dissertatio de tussi ab Hallero (a) edita.

Quandoque in hæmopteticis à vitio nervorum, pulmonum tussis occurrit cum stertore. His enula, oxymel scilliticum, flores benzoës, kermes minerale, gummi ammoniacum, asa foetida, olibanum, camphora, & spiritus salis ammoniaci anisatus pro diversitate subjecti, & symptomatum propinanda sunt.

Quodsi stertor, aut sibilus perseveraret, posset prunis piper nigrum inspergi, ut torpentes in halatis vaporibus ad fortiorem tussim pulmones excitentur.

Hypochondriacorum tussi his indiciis proditur. Hypochondria sæpè intorta sunt, agri gravius anhelant, nullum in pectore renixum sentiunt, vexantur flatibus, urinam mittunt limpidam, & quandoque mucum viscidum cinerici coloris nullo molestiarum levamine ejiunt.

(a) Tom. II. pag. 53.

Ejusmodi ægris dulcia & oleosa majus damnum creant.

Nec opiata ex usu esse possunt, nisi viscera abdominalia omninò libera sint, vel tussis adeò valida, ut graviùs inde malum timeatur.

Inflato abdomine rhabarbarina cum terra foliata tartari congruunt. Inquirendum quoque sedulò, nullane in visceribus obstructions lateant; quæ si absint, pilulæ ex radice valerianæ, gummiferulaceis, castoreo, aut asa foetida usui erunt. Ubi corpus laxius, nulla plethora, nullus inflammationis metus, martialia addere oportet. Cùm verò obstructions in visceribus abditæ delitescunt, tum frigidioribus sapo venetus, extracta amaricantia, cum gummiferulaceis; addita, si alvus fileat, massa pilularum Beccheri aut extracto rhei, accommodata erunt; qui verò calidiore sunt natura quorum foetet urina, & excrementa quid putridum redolent, ii nec saponem, nec gummiferulacea, aut extracta ferunt; sed decoctis ex saponaria, & taraxaco, addito sale medio, juvandi sunt. Profunt interdum firmo adhuc corpore & ventriculo hypochondriacis aquæ minerales.

Tussis, quâ gravidæ, uterum altiùs ferentes, afficiuntur, plerumque nonnisi partu edito solvitur; quandoque anodynis levatur, sed videndum, an nulla plenitudo adsit, tum enim paretgorica obessent, sed sanguis mittendus est.

Nimia tracheæ angustia & glandularum bronchialium scirrhi tussim generant catarrho suffocativo similem, prorsusque immedicabilem. Gargarismata enim & emolientia, ore detenta mitigant quidem, at non tollunt malum.

Ubi peregrinum corpus, in asperam arte-

riam illapsam, tussim ciet, venæ sectio primum instituenda, tum sternutatio, aut injecto prunis pipere nigro ejusque vaporibus ore attractis tussis vehementior concitanda est ad corpus peregrinum excutiendum.

Quæ ab arthritide, podagrâ aut scabie nata est tussis, non nisi revertente priore morbo fugari solet.

CAPUT IV.

DE

HÆMOPTYSI.

FRequentior Viennæ hæmoptysis occurrat, fortasse, ob ascensus præaltorum ædium difficiliores, & crebras aëris vicissitudines. Parùm ad ejus curationem refert, ex arteriisne pulmonalibus, an verò è bronchialibus sanguis erumpat: ubi copiosus, floridus & tenuior excernitur cruor, hic densior, pituita remistus, & obscuro magis colore sanguis ejjicitur. Fusis hæc omnia apud van Swieten reperias.

Inter causas hæmoptysmi meritò abusus mercurii recensetur; novi ipse teneriore corporis fabricâ homines, qui sumto sublimato, hæmoptoe correpti sunt. In summo frigore, quod per aliquot hyemes nunc sensimus, vidi plures sputo sanguinis correptos, quin corpus ad hunc morbum dispositum videretur, aut alia causa erui potuerit. Caveant scemina, quæ

cum infantibus, quos brachiis gestant, saltare persæpe soleant, ne manum molliori pusionum sterno fortius apprimant, inde enim dispositio ad hæmoptysim & phthisim enascitur. Fœminæ plethoricæ, quibus intempestivè emenagoga propinantur, sputo sanguinis corripuntur.

Fortè non incongruum erit, hoc loco notare, quod primi quandoque menses puellis accuratè, & statis temporibus fluant, aliquantò post jam prævertant consuetum reditum, jam per aliquot spatium temporis omnino non revertantur; hæ si cæteroquin rectè valeant, neque ulla pectoris oppressio, aut tensio molesta in lumbis, epigastrio, & ad os sacrum percipiatur, haud vexandæ sunt medicamentis, sed totum id negotium naturæ permitendum.

Qui sæpiùs hæmoptysi laborant, cum oppressione pectoris atque anxietate ad quemvis leviozem motum aucta, quorumque pulsus etiam extra paroxysmum vacillat, & inæqualis est, ii secto post mortem cadavere, polyposas in vasis majoribus concreciones exhibent.

Periculum haud solâ ejecti sanguinis copiâ metiendum est; facilius enim, si cætera paria sint, malo levatur æger in larga hæmoptysi, quæ ab hæmorrhagiis consuetis suppressis, vel illata vi externa orta est, quàm cum vasis erosio, minore copiâ sanguis, sed sæpiùs ejicitur.

In morbis acutis sputum sanguinis summum periculum portendit. Difficilis eorum curatio est, qui collo oblongo, angusto pectore, scapulisque sunt prominentibus, & pterygoidei vocantur.

Cura in plerisque à venæ sectione auspicanda.

Soli pulsui hîc neutiquam fidere oportet, qui, quamvis plenus sit, in multis tamen vel ex terrore, vel spasmodis, hunc morbum frequenter comitantibus vacillans, parvus ac debilis tangitur, & sanguine emissio insurgit.

Quandoque post phlebotomiam symptomata placantur, sed brevi vehementiora redeunt, pulsu, & humorum orgasmo crescente; tum venæ sectio iteranda est. Ubi verò malum ex hæmorrhoidibus suppressis existit, hirudines ano applicare decet. Vidi venam ejusmodi ægris frequentius, at frustra sectam fuisse; neque morbus, nisi admotis sanguisugis conquievit.

Tum quoque, cum morbus ex obstructione mensium periodicè rediret, cum Cl. Schmucker, simili hirudinum usu sublatum vidi.

In foeminis tamen ceterùm rectè habentibus, cum catameniorum vice sanguinem ore excreant, nihil moliendum. neque medicamentis natura conturbanda est.

Cum æger animo deficitur, solo aceti odore reficere collapsas vires convenit, cavendumque à spirituosis, ac stimulantibus.

Quandoque ex subita moestitia hæmoptysis nascitur. Aristobulus perempto fratre adeo percussus mœrore fuerat, ut sputum cruentum rejiceret. Similes casus mihi subinde cernere licuit. Tales ægri vix largiorem ferunt venæ sectionem.

Ubi æger debilior est; cum extrema frigent, vel corpus onaniâ fractum esse constat; aut cum malum sæpiùs rediens, suspicionem movet sanguinis ex erosio vasis emanantis.

abstinendum à phlebotomia: prudenter monuit Prosper Alpinus, quod in hæmoptysi, ubi nulla febris, inflammatio, aut plethora adest, locum habere non possit phlebotomia procul dubio exitialis, ubi ingenti copiâ sanguinis ejectâ, vires profligatæ sunt; neque cum æger jam eo in statu versetur, in quem venæ sectionibus adducere eum cupimus.

Animadvertente Hallero venæsectio minùs lege hidraulicâ, sed potiùs corpus animale debile reddendo, hæmorrhagiam minuit.

Quidam artus ligandos esse omninò putant, sed jam Erisistratus persæpè crura, femora, & brachia incassum ligavit, præcipuè in hominibus longo collo, angusto pectore, scapulisque eminentibus,

Quandoque cucurbitæ cum scarificatione furis, & pedibus adhibitæ, cum neque venam secuisse, nec crura colligasse, quidquam profuisset, opem attulêre. Magnum inter pectus, & extremos artus consensum esse, docuit Baglivius.

Adversus narium hæmorrhagias vesicantia, inter scapulas applicanda, celebrat Cullen, quâ re fortè motus Cl. Mertens ea cum fructu in sanguinis sputo adhibuit. Id solum hîc providendum puto, ne phlebotomiæ, quæ antecedere debent prætereantur, neve morbus à dissoluto sanguine aut vasis erosione originem ducat.

Vix pediluviiis quidquam proficitur, cum frigidiora malum exasperent, calidiora humorum orgasmum intendant.

Vena secta, decoctum è radice consolidæ majoris, agrimonia & urtica minore. N. 16. prodest. Si verò malum ab hæmorrhoidibus,

vel menſtruis ſuppreſſis natum eſt, proſpero ſucceſſu millefolium additur.

Perquàm ſalutares ſunt emulſiones tenuēs, quibus paſſim additur nitrum, quod tum conveniet, cùm ſanguis craſſus excernitur : cùm æger magis incaluit, aut ſpirituofis ante abuſus eſt; ubi verò fractæ ſunt vires, ubi tenuis cruor, ac ſolutus ex eroſis vaſis excernitur, minimè opportunum eſt.

Nonnullos hujus generis ægros ex imprudenti uſu nitri in extremum diſcrimen adductos animadverti.

In hæmoptyſi graviore, quæ æſtuante ſyrio vel poſt abuſum ſpirituoforum, aut vehementiorem corporis commotionem ingruit : ſi æger cacochymia, oppreſſione pectoris, ac dolore vacet, ſpiritum virioli dilutiſſimum propignare ex re erit, modò debitæ venæ ſectiões antecederint.

In robuſtis, lautè viventibus, præcipuè ſi hypochondria inflata fuerint, alvus decocto tamarindorum, aut aqua angelicæ movenda eſt, ut & plenitudo minuatur, & revulſione facta, alvi conſtipatio infeſta ac noxia impediatur.

Obſervatis certè conſtat, hæmoptyſim habituaſem longo alvi profluvio quandoque ſublata fuiſſe. Optimum foret, monente Proſpero Alpino, ante morbum noſſe in ægrotis, qualia ſint hypochondria, ſiquidem ſæpe in bene valentibus inæqualia & non rectè mollia obſervantur.

Cùm à materia acri ſanguinis ſputum excitatur, gummi arabicum, tragacanthæ, & decoctum ſalep exhibendum eſt. Laudatur quoque in ſimili affectione oleum lini, ſed noſ-

tris sæpe nauseam, & vomitum ciet, idque
 eò faciliùs, quod sæpissimè rancidum est.

Nonnulli hæmoptyci levabantur, cum decocto vel jure cochlearum uterentur à Zaffio (a) & Boecklero (b) commendato. Hic tamen malo consilio cochleariam, & nasturtium addit.

Demum ubi prædictis remediis, & evacuationibus sufficientibus levatus æger nullâ oppressione pectoris angitur, pulsus plenus, & durus non ampliùs tangitur, cortex supradicto decocto (N. 16.) feliciter additur.

Incipiendum à minori dosi. Rectè enim Ill. Murray (c) ait, corticem non tam obturando præsentì sanguinis rivo, quam pulmonibus roborandis, febrigue, & spasmoticis, quibus hi ægri obnoxii sunt, coercendis affectionibus idoneum ac parem esse.

Ubi pulmones pituitâ obstiti sunt, majori circumspèctione in exhibendo cortice opus erit; si verò sub ejus usum respiratio difficilior evadat, desistendum est.

In debilioribus, qui ob laxiores pulmones sæpiùs exspuerunt sanguinem, mox ad corticem confugere oportet, cui vel herbæ leviter adstringentes, ut agrimonia &c. vel demulcentia, ut gummi arabicum addenda sunt.

Similibus & succus urticæ expressus, si anni tempus admittat, prodest.

His venæ sectio exitiosa foret.

Si morbus nimis validus sit, id quod ejecti copias sanguinis, vires, & pulsus ægri docent, adstringentia fortiora adhibenda sunt.

(a) Synops observ.-med. p. 21.

(b) Part. III. p. 588.

(c) Mat. med. p. 600

Inefficax est bolus armena. Ego certè cum Cl. Spielmann (d) nihil ab omnibus terris argillaceis, quæ aquâ solvi nequeunt, emolumentum exspecto; etsi eæ, extrinsecus adplicitæ, hæmorrhagias eo pacto sistant, ut vulneri impositæ pastam obdurantem efficiant.

Nec lapidem hæmatitem prodesse vidi.

Præstans remedium, quodque spem medicum rariùs fallat, alumen est, quo jam in mictu cruento Archigenes utebatur. Id vel in pulveribus N. 17. vel in mixtura addito gummi arabico N. 18. præbitum convenit.

Alumen draconisatum haud multò majorem vim ac efficaciam, quàm alumen crudum habere videtur; quare eo medicamento, tanti præcipuè pretii, facildè carere nosocomia possunt. Etenim libra medica aluminis crudi quatuor grossis, aluminis verò draconisati tribus florenis, grossisque quatuor hîc venditur.

Quodsi debilitas urgeat, corticem peruvianum negligere minimè consultum foret. Dosis determinat vires, pulsus, & sanguinis ejecti copia.

Præhabendi sunt pulveres sero lactis cum alumine à Whytt commendato; præterquam enim, quod ingratum medicamentum est, illud quoque sapore suo declarat, partem aluminis majorem multò in caseosis partibus remanere, quàm sero communicari.

Rariùs à pulveribus, quàm à sero lactis aluminoso ructus acidi, aut soda gignuntur.

Ubi alumen non sufficit, vitriolum martiad gr. β---j. pulveribus dictis N. 17. addens

(d) Mat. med. p. 437.

dum, & alterâ, vel quartâ quâvis horâ, exhibendum est.

Multi adstringentibus parum confidunt, quod medicamentum ante, quam parti affectæ medicinam facere possit, sanguinem coagulando, & vasis pulmonum minimis constringendis mortem adferat.

Sed alia longe eventus docuit, multosque hâc methodo jam pro desperatis habitos integræ valetudini restitui.

Ingens Hallerus monet, quod ipsa ferri terra quam crederes esse adstringentem, abundè in sanguinem transeat ut accuratis experimentis constitit; triplò enim plus ferri dedit calcinatus sanguinis cum ægrota ferrum in medicina recepisset. (e)

Commendantur à quibusdam aqua gelida, potusque glaciati; at Ill. van Swieten (f) ait, neminem prudentem in sputo cruento ad haustum frigidum confugere & Neifeld (g) observavit, facillè inde phthisin oriri, si aqua nimium frigida hæmoptycis largiter administretur. Certè omnes ferè, quibus gelida propinabatur, phthisi periisse vidi, tametsi ancipiti in casu, anceps tentare remedium præstet, quàm nulum.

Plurimi in hæmoptysi pægorica propinant, id quod tum solum facere expedit, cum spasmodica partium remotarum strictura, aut summa asperæ arteriæ irritabilitas, aut denique titillatio, à stillante sanguine orta observatur.

(e) Phys. T. VII. p. 60.

(f) T. IV. p. 40.

(g) Rat. medend. p. 354.

Ubi ad phthisim hæreditariam dispositi tussi titillatoria, vesperi horâ somni redeunte, corripuntur; Cl. de Meza (h) opium per duas, tresve septimanas exhibuit, quo tussi sopiebatur, & eruptio phthisicos subinde præcebatur, venæ sectione simul instituta, dum pectoris molestus dolor urgebat.

Ceterum hoc remedium in plethora, ac cum debitæ evacuationes suppressæ sunt, noxium foret, quia Freindio teste, opium omnem expansum sanguinem ad fluxum concitat, uti fusius hæc Cl. Tralles docet. Concedendum tamen diacodium est, quod jam Boerhaavius non pro opiato sed demulcente habuisse videtur, dum unciam dimidiam quâvis horâ sumendam suadet.

Ut curatio optato exitu non frustretur, in causam mali sollicitè inquirendum est. Viri cujusdam, in paucis amici, conjux, quæ dum rectè valeret, faciem lividam, sanguine turgentem præseferibat, gravissimâ olim hæmoptisi corepta fuit. Sanguis è brachii, pedisque venis sæpius emissus crusta tam spissâ obductus erat, ut cultri apici resisteret. Nihil derivantia, nihil nitrata, nihil demulcentia, aut adstringentia demum profuere; augescebat perpetuè respirandi difficultas ita, ut suffocanda propediem videretur. Ex his conjiciebam malum à densò nimis sanguine proficisci, ut angusta pulmonum vasa transire vix valeat; itaque, mutato consilio, decoctum saturatum è radice graminis, taraxaco cum nitro, & roob sambucitum suc cum taraxaci largissimâ manu propina-

(h) Soc. med. hafn. coll. T. II. p. 309. & seq.

navi, quibus remediis ægra sanitati penitus reddita fuit.

Viginti abhinc annis fœmina, catharro laborans, sanguinem floridum, copiosum, magnis grumis mixtum rejecerat. Vena secta, nullis adhibitis adstringentibus, accessit sibilus ac stertor, ægraque magno nisu, ac pene suffocanda, grumofum sanguinem ejecit. In summo discrimine, dum has angustias à grumis latentibus repeterem, juvenili audaciâ dimidium granum kermes mineralis sæpius propinavi. Inde grumjs facilius educis, sputum cruentum minuebatur, & ægra duodeviginti ab hoc morbo annis superfuit.

Sæpe ac præcipuè in sanguineis aliquot ab imminutâ hæmoptysi diebus, veluti vulneraria exsurgit febricula, quæ cum nimis exorbitat, è vena pauculæ sanguinis unciae educendæ sunt, ne tussi aucta denuò sputum cruentum succedat.

Cessandum ab adstringentibus, si soli grumi egeruntur; ab his enim non exscreatis, febris lenta cum phthisi oritur.

Ubi adstringentium usu expectoratio supprimitur, & pectus angitur, vapores tepidi ore hauriri, & emollientia, sed moderatè præberi debent.

Sputa purulenta brevi post hæmoptysin exorta, bonum omen præbent, cum vomicæ metum tollant. Si verò nimium augeantur, viresque minuant, decocto corticis peruviani, & vulnerariarum herbarum coercenda sunt.

Ubi febris abest, pilulæ è cortice peruviano, gummi arabico, olibano, & mastiche præfunt.

Victus in hæmoptysi ex endivia, lactuca

hordeo, & oryza parandus est, alimenta verò pene insulsa, & tepida sumenda sunt.

Morbo depulso, flatulenta, aut difficulter digerenda, item aromatica & spirituosà fugienda sunt.

A largiore asparagi esu hæmoptyses cum Burggraffio (i) revertentes observavi.

Quidam medici multum ab herbarum succis expectant, eosque indiscriminatim agris commendant. Cavendum à nasturtio & chærophyllo; illud acre est: hoc sæpe tussim excitat; neque remedium, internè mammarum indurationibus solvendis: internè discutiendis vasorum spermaricorum varicibus opportunum, hæmoptycis suadendum est.

Plethorici vigentes, ab hæmoptycis parentibus nati, vel collo oblongo, & angustiore pectore præditi modicis venæ sectionibus prophylactice tuendi adversus hæmoptysin erunt.

Cavendum, ne pedes refrigerentur, quod si fiat, sanguinis sputum, teste Bonneto, redit.

Balneum frigidum anceps est roborandorum pulmonum remedium, cum ex antiquissimis observationibus constet, nonnullos, dum frigida lavabantur, sanguinis sputo correptos fuisse.

Demum iis, qui iterato hoc morbo corripiunt, sæpe conducit loci, atque cœli mutatio; iisque per hyemem locis maritimis, mediterraneis per æstatem opus esse Celsus contendit. (k)

(i) P. 77.

(k) De Med. L. IV. C. IV. p. 204.

CAPUT V.

D E

P H T H I S I.

Phthisis magis infesta fœminis, rarò senes petit, at iis, quos petiit, lethalis est.

Quamvis haud ita facile, ut vulgò in Italia creditur, contagione propagetur, non tamen contaminationis metu caret. Noverat Ill. van Swieten virum, qui, postquam moribundæ conjugii phthisicæ oscula præbisset, ea menti parte, quam ægræ adpresserat, prorsus glaber evasit, etsi densa circum undique barba pul-lularet.

Ego quoque mulieres aliquot, quæ diu noctuque cum phthisicis maritis in eodem conclavi versabantur, eodem morbo demum correptas fuisse memini. Phthisis alia acuta est, alia lenta, humida item alia, aut sicca.

Quandoque à parentibus in proles propagatur; sæpius ab hæmoptysi : morbo inflammatorio pectoris antegresso; tussi humida per-tinatiores & catarrhis neglectis oritur. Plurimi namque è vulgo homines, graviore quamvis catarrho affecti, intempestivo cœlo temerè se credunt, corpus vehementius exercent, nec non venæ sectiones, & opportuna remedia negligunt propterea, quod eorum animis noxia sane hæc opinio infederit, detractò sanguine catarrhosum virus in massam humorum ferri, morbumque inde exasperari,

Nascitur quoque hic morbus à febris, perperam tractatis, crisibus imperfectis, & pulmonum calculis, qui leves quandoque, cretacei, aut tophacei sunt; aliàs etiam filicum duritiem referunt.

Cel. Baldinger observavit complures milites, quorum terga verberibus cædebantur, phthisi correptos fuisse. (a)

Nonnunquam feminæ debiliore corporis habitudine, lactandis prolibus phthifica evadunt.

Sæpius materies purulenta, quæ in aliis corporis partibus delitescit, viam sibi ad pulmones parat. Refert van der Monde, pus, quod in tumore glandulæ parotidis hæserat, viâ ad trachæe latus sibi factâ, in pectoris cavum sese exonerasse. Constat item ex ephemeridibus naturæ curiosorum empyema, quod pleuritidi succederat, ulcere brachii sanatum fuisse. Ante complures etiam annos juvenis quidam in nosocomium fratrum misericordiæ deportatus erat, qui gravi pleuro-peripneumonia, hucusque penitus neglecta, laborabat. Adhibitis omnibus, quæ idonea fore viderentur, remediis, febris insuper valida, eaque depascens continuò augebatur: eam oedema pedum, & spiritus angustia tantæ comitabantur, ut, nisi erecto corpore, reciprocare animam non posset: præterea sputa purulenta pessimi generis, sed minore copiâ excernebat.

Hoc rerum statu ancepiti, dolor inter scapulas nascebatur, sanè notabilis, qui tamen respirandi molestias aliquantum levabat; quare cata-

(i) p. 181. *Von den Krankheiten einer Armee.*

plasmata maximè emollientia applicari jussi, affulferat enim velut e longinquo spes quædam secundi exitus, quod sciebam, ejusmodi dolo-rem, uti Trillerus observaverat, in acerba pleuritide salutare fuisse. Nec spem fefellit eventus, namque brevi multum puris per urinam & alvum deposuit æger eodemque tempore copiosa sputa purulenta, eaque melioris notæ tantâ facilitate, eoque cum successu ejecit, ut integra ei ac constans valetudo redierit.

Haud absona videtur opinio Cl. de Haen, existimantis, cacochymiam purulentam, sanguini inhærentem ad pulmones ferri, tussique rejici.

Vidi aliquoties tumores in externis thoracis partibus subitò, & absque manifestâ causâ natos, neque cum inflammatione, aut febris conjunctos, qui secundo, aut tertio die aperti pus foetidissimum exhibebant; id quod argumento esse potest, simile quid in internis pectoris partibus quandoque accidere.

Phthisis haud facilis cognitu est sub initium, quod parum tum ægri marcescunt, parum etiam tussunt, nisi pectus male conformatum sit. Præterea calor principio mitis est & pulsus languidus: tum febricula matutino tempore ferè evanescit lotiumque vix quidquam ab eo differt, quod sani mittere solent.

Neque sputa in aqua falsa, quam utpote graviorem & experimento capiendo magis idoneam Hippocrates commendat, fundum potentia certum phthisis indicium præbent, cum fieri possit, ut &, purulenta quæ sunt, sputa ob bullas aereas glutine involutas, aquæ innatent & quæ pure carent, ob gluten crassum admixtum, subsideant. Rectissimè experimentum fit tempore matutino, post somnum, cum sputa commodius

ejectantur, neque tam multo mucos mixta sunt.

Ex observationibus quoque fide dignissimis constat, quosdam e febre hectica præsentē, sputisque & purulentis & diuturnis phthisicos conjecturam cepisse, at, cum cadaver sectum esset, pulmones planè integros repertos fuisse. (b)

In aliis à morte pus inventum est, quod cavo thoracis infederat, quin ulla ejus signa præcesserint. Sic Cl. Portal juvenis meminit leucophlegmatici, subita morte extincti, qui thoracem sinistrum puris plenum exhibuit nullis fere pulmonis relictis vestigiis, neque tamen, cum viveret, ullum unquam morbi pectoris indicium præbuerat.

Difficilis sane curatu hic morbus est, testante Forti ob flaccidam pulmonum naturam, motumque eorum perpetuum. Multi omnino phthisim insanabilem esse credunt, sed uti Schenkius (c) contra præjudicatam hætenus medicorum & scholarum opinionem asserit, minimè in desperatis morbis habenda est. Aurelianus quoque, etsi pulmonum ulcera difficillimè consolidari dicat, non tamen insanabilia ea putat.

Curavi inter alios virum, qui viginti & amplius abhinc annis gravi phthisi laborabat, unde pedes ei, & abdomen valide intumuerant; copiam etiam non mediocrem sputorum ejecerat, adeo foetentium, ut nemo adstantium ferre eorum odorem posset. Tamen ope medicaminum ita convaluit, ut in hanc usque diem vegetus ac torosus supersit.

Illa periculosior phthisis habenda est, quam

(b) de Haen T. I. p. 118.

(c) p. 283,

febris acutior comitatur; at quæ ab hæmoptyâ oritur, per vim externam illata, ea ceteris paribus facillime sanatur.

Quæ a parentibus in sobolem derivatur, aut ab ischiade, vel arthritide nata est, fere omnem opem eludit.

Quæ improvise vires frangit, & extremas corporis partes, imprimis pedes ineluctabili frigore corripit, ea plurimum periculi habet.

Nullum unquam vidi, qui si calculos tussiendo ejecisset, mortem effugerit, etsi Morgagnius contrarium animadverterit. Gravidæ, quæ phthisi affecta sunt, sæpe brevi a partu tempore intereunt, licet sanum ac torosum fœtum ediderint.

Cum corpus subitâ macie extenuatur, malum. Qui cibum avide appetunt, neque tamen inde reficiuntur, de iis conclamatum.

Ubi in phthisi confirmatâ desinit expectoratio, viresque indies magis collabuntur, brevî tempore exstinguuntur ægroti. Hinc recte Langius (d) pronuntiavit phthisicum pectus absque tussi propinquam mortem prænuntiat.

Malum omen præbent genæ roseo colore uffusæ, prurigo corporis, pustulæ rubræ, miliaribus similes: pessimum sudores, dejectiones colliquefactæ, & fluentes capilli.

Vidi equidem sanatos quosdam, qui sputa gravissima, omnino purulenta, ac viridescencia exscreaverant, sed nullum morti ereptum vidi, qui sputa copiosa aquosa & spumecentia, queis purulentæ velut insulæ innatabant, ejecisset.

Quidam magnam sputorum copiam excernunt, quin malè admodum se habeant; unde Cl. Vogel

(d) Misc. nat. cur. med. obs. 9. p. 29.

autumat, foveas quasdam formari sæpe, quæ in pulmones quidem sese insinuent, at callosis undique parietibus ita obductæ sint, ut collectum ibi pus neque penetrare parenchyma, nec contaminare ullo modo possit.

Nunc quæ in curanda phthisi notanda mihi occurrent, recensẽbo.

Angli modicas, at repetitas venæ sectiones commendant, quo febris & inquinatus cacochymia purulenta sanguis minuatur; id præcipuè illis convenire aiunt, qui plethorici ante & calidior natura fuere; ne vero jactura sanguinis cruditatem, aut hydropem accersat, fricari corpus, & leniter exerceri volunt.

Profunt quidem interdum phlebotomiæ ad iij---iv. uncias iteratò susceptæ; id quod jam Fortis, & Bonnetus insinuavit, cum pulsus durus tangitur, cum corpus calet, & cruor eductus densus est, aut dolor, tensiove pectoris percipitur: ast ubi pulsus debilis, viresque fractæ animadvertuntur: vel cum corpus sudoribus diffuit, pedesve in tumore sunt, venæ sectio mortem accelerat, etsi sanguis insulæ instar sero innatans, densa lardacea tegatur crusta.

Cavendum, ne sanguis tamdiu extrahatur, donec nulla crusta conspicitur.

De Haen xx. guttas & ultra elixir vitrioli anglicani bis, terve per diem pluribus mensibus, & annis quandoque cum fructu præbuit; sed hæc in phthisi solum remedio esse videntur, quæ post febres diuturnas sequitur, ubi prava cruoris materies, in integros pulmones translata congregatur, sputorumque specie ejicitur: præcipuè cum vires prolapsæ sunt, & sudores, atque diarrhæa urgent. Cum vero inflammationis signa apparent, perniciosum id remedium foret.

Triginta abhinc annis acida mineralia, diacodio aut demulcentibus, ne tussim exasperent, mitigata, phthificis præbui, sed nullo prorsus emolumento; quin odor sputorum adeo teter reddebatur, ut vix tolerare eum circumstantes possint.

Sculzius succo cucumerum, bis die, duarum unciarum pondere dato, hecticos & tabidos sanatos vidit. Borellus vero cujusdam meminit pepo-
num esu curati.

Cl. Muzel phthificum cucumeribus cortice exutis, & pane bis cocto, medicamenti loco exhibitis ad sanitatem perduxit.

Hæc ferme tentari possunt morbo ingruente, cum febris validior est, cum vires constant, ægrique sitim, & æstum queruntur: at ubi corpus languet, humores solvuntur; & alvus liquidior fluit, locum non habent.

Aerem fixum, respiratu attractum magis noxium, quam proficuum fuisse, certis experimentis comprobatum mihi est.

Neque oleum asphalti bis, quaterve per diem à guttis x--xiv. cum saccharo propinatum prodest.

Nonnulli aquam calcis, lacte temperatam, ulceri exsiccando, & lactis coágulo impediendo adhibuerunt.

Ego quoque idem ante complures annos tentavi; sed qui inde levare videbantur, paullo post de appetentia cibi suppressa, ac quodam ventriculi pondere querebantur: sputa cum labore educebantur, anxietas, & macies augebantur, & omnia in deterius ruebant. Plus etiam detrimenti affert aqua calcis, recens parata, quæ & acrior, & magis caustica est.

Quidam fonticulos commendant, alii setacea, quorum ope feminam phthisi affectam Hildanus sanatam

sanatam fuisse refert. Sed hæc emolumento esse vix poterunt, nisi morbus a scabie repulsa, sudoribus v. g. pedum nimis cito fugatis, aut ulceribus consolidatis ortum trahat; imo ne tum quidem ex re fuerint, si febris major urgeat, aut æger macie confectus sit, cum his remediis corpus magis attenuetur.

Pessimo consilio nostri, ac inprimis pauperes oleosa, veluti unguentum mendicorum aut axungiam devorant.

Laudatur a nonnullis in phthisi polygala senega.

Duplex in Austria nascitur polygala, vulgaris, & amara; hæc efficacior est, & senegæ non abssimilis a Cel. Jacquino creditur, quam ejus sententiam sapor & odor herbæ balsamicus confirmare videtur.

Du Hamel factis experimentis virtutem polygalæ tribuit bechicam, incidentem, expectorantem, & sanguinis attenuandi vi præditam.

De Haen eam nec spissitudini inflammatoriæ, nec diathesi humorum purulentæ corrigendæ aptam esse docet, quòd post diuturnum ejus usum sanguis emissus densâ crustâ coopertus fuerit. Neque ego phthificum ullum, solius usu polygalæ, sanatum vidi, sed ubi materies purulenta muco tenaciori juncta difficiliùs excerneretur, aut ventriculus langueret, eam vel in decocto N. 19. vel in electuario cum aliis remediis adhibui.

Rad. polygal. amar. unc. β.

Syr. liquirit. unc. j.

Sumat tertia vel quarta quavis hora dr. j.

Nunquam inde aut vomitum exstitisse, aut largius urinæ profluvium, diarrhæamque observavi.

Commendatur & in phthisi lichen islandicus,

qui secundum Cel. Professore de Well, a quo in ejus naturam ante plures annos me rogante indagatum est, oleo, sale acido, multo phlegmate, & paucissimis terræ particulis constat; cujusque amaritiem partes gummiresinosæ efficiunt.

Olaus Borrichius eum anno 1674. (e) musci islandici nomine prodidit, atque inter pectoralia locum mereri docuit.

Viennæ primus lichenem islandicum, cujus virtutem e Cl. Scopoli commentariis didiceram auspicato exhibui, maximè tum, cum corticem ægri non ferebant. Sed neque, cum cortex juvaret, lichene abstinui, quin unum cum altero persæpe conjunctum exhibui.

Nuper illum etiam in inveteratis ac pertinacibus tussibus, phthisique incipiente salutarem Cl. Herz (f) expertus est.

Et si eum sæpius inefficacem fuisse non negaverim, nunquam tamen majori in suppuratione, ut Cl. Cullen (g) asserit, nocuisse observavi.

Egregium certe lichen islandicus nutrimentum præbet, efficitque, ut lac a debili ventriculo faciliùs, ac commodiùs digeratur.

Principio decoctum N. 20. aquosum lacti mixtum, dein lichenem lacti incoctum propinavi.

Infusum theiforme non magnam vim habet, sed si lichen nimium diu coquatur, perit amarities, & vappida redditur decoctio.

(e) Act. Hæssn.

(f) *Briefe an Aerzte.*

(g) *Mat. med.* p. 205.

Neque etiam nimis mucilaginosum esse decoctum convenit, ut eò facilius minora vasa pervadere possit.

Commendat Cl. Bergius (h) pulmentum, e lichene islandico, frigida macerato confectum, quo amarities extrahatur; cum concoqui facillime possit, & ægri etiam, frequentiore vomitu chronico afflicti, qui omne nutrimentum rejecerant, illud retinere potuerint.

Nunquam, ut quidam voluere ex usu lichenis islandici diarrhæam secutam fuisse mini.

At cortex peruvianus est præstantissimum phthysicos remedium, & ejus præcipuè, quæ vomicam apertam consequitur, aut in tenerioribus feminis proles lactantibus contracta fuit. Tum etiam, cum vel e remittente feбри vel intermittente natus est morbus, unica salutis spes in cortice collocanda est.

Lewis quidem noxium esse corticem dicit, nec ei venerabilis Tralles favere videtur; ast ego cum Mortono, Lofeke & Werlhoff, triginta & amplius annorum usu vim ejus præstantissimam sane & peculiarem expertus sum. Legi meretur Cl. Christiani Jäger de corticis peruviani in phthysi usu, quam Cel. Baldinger denuo edidit. (i)

Nonnulla tamen, antequam cortice utaris, præmittenda, aut cum eo conjungenda erunt.

Ubi pulsus durus, dolor pectoris, aut calor corporis major animadvertitur: cum tussis sicca est, aut sputa ægre admodum exscreantur, vena ferienda est.

(h) Mat. med. p. 856.

(i) Tubingæ ann. 1779.

Sanguinis detrahendi copiam, e viribus, ætate, & iis, quæ præcefferunt, metiri decet. Ejusmodi ægris emollientia propinari debent, ut infusum florum verbasci & liquiritiæ.

Tum enim obest cortex; nec decocta conveniunt, ex herbis pectoralibus confecta, quod iis sæpe sputa supprimuntur.

Postquam prædicta symptomata emendantur, decoctum ex agrimonia, urtica, vinca pervinca &c. in rem faciet. Ubi verò, expectoratione satis commodè procedente, vires dejiciuntur, aut febris observatur, statim temporibus magis infesta, ad corticem confugiendum est; sæpius enim, uti Ill. van Swieten observavit, febris lentæ remittens, aut quotidiana, aut tertiana duplex accedit. Hæc cortice impugnanda est, ne duplici morbo opprimatur æger.

Tum quoque, cum ægri magnam vim sputorum expectorant, pulluque sunt debili, & viribus deficiuntur, cortice utendum erit; continenda namque intra certos limites expectoratio est, quod, pure non satis excreto, ejus acrimonia una cum ulcere augeatur, &, si nimia sit, pus quoque bonum, quod ad sanandum ulcus requiritur, hac ratione abstergatur, ac corpus exhauriatur.

Oportet autem a leviori corticis dosi inchoare.

Decoctum substantiæ præferendum est; hæc enim non rarò auget calorem, angustias ægris creat, & expectorationem inhibet.

Majorem quoque vim decoctum habet, si cortex per plures horas ante infunditur. v. g.

℞. Cort. peruv. selectiss. unc. j.

infunde in aqua servente;

stet per 16 horas in infusione leni.

coque per horam : adde

Rad. salep. dr. j.

Coque per $\frac{1}{4}$ horæ partem

Colaturæ unc. xiv. adde

Syr. de symphyt. unc. j. β.

Sumat terciâ, vel quartâ quâvis horâ dimidium vasculum.

Infusum corticis peruviani frigidum nunquam, quod sciam, optatum successum habuit, recte enim Cl. Strack (k) nuper asseruit, frustra esse eos, qui vino, aut aquæ corticem infundi jubeant, cum vix aliquid hoc modo extrahatur, ut uberius per experimenta a supralaudato Cel. Professore de Well instituta elucescit. (l)

Pro diversitate symptomatum varia quoque cortici jungenda sunt. Si æger strictiore est habitu, & sputa difficiliter emergant, emollientia, uti flores verbasci : si tussis vehementior a materia acri proficiatur, id quod præcedentia, & sputum tenuius docent, demulcentia, ut radix salep : si habitudo ægri cachectica sit, & sputa crassiora, polygala amara, si corpus macie confectum, imbecillusque ventriculus, lichen islandicus cum cortice exhiberi debent. His omnibus commodè liquiritia additur, partim ad ingratum corticis saporem emendandum, partim ad expectorationem faciliorem conservandam.

Ubi inter decocti corticis peruviani usum calor imminuitur, sputa emendantur, nectanta

(k) de Feb. intermitt. p. 77.

(l) vide Tractatum de febribus à me editum.

copia ejiciuntur, quin tamen respiratio impedior evadat, cortex in substantia, vel in mixtura aut bolis ad iij---iv. drachmas per diem præbitus sanè prodest.

Eadem ratione ac dosi quandoque absque aliis præmissis medicamentis, mox exhibendus est, cum febris intermittens urget, aut corpus valde deficitur viribus, si expectoratio satis expedita, sputa purulenta sincera, calor mitior, & pulsus debilis animadvertuntur.

Nonnunquam mox a sumto cortice, quandoque sub diuturniori ejus usu, præcipue cum frigidiori se aeri objiciunt, ægri oppressione pectoris corripuntur, sputa reprimuntur, & anxietas accedit. Ejusmodi ægris, cum symptomata ingravescunt, cum pulsus durior tangitur, aliquantum sanguinis extrahendum est, lenia item emollientia, & expectorantia adhibenda, ut decoctum ex malva cum pauca polygala, & liquiritia, aut pulveres ex gummi arabico, trångacanthæ, cum extracto liquiritiæ. Ubi vero melius sit ægris, denuo ad corticem redeundum, si verò rursus lædantur, ab ulteriore ejus usu abstinendum est.

Quorum febris, postquam cortice per longius tempus cum prædictis cautelis sunt usi, non modo non decrescit, sed potius augetur, de iis nihil fere sperandum, nam a morte vel ulcera exhibent sinuosa, vel tubercula, aut scrophulas.

At ubi sub remediorum supradictorum exhibitione nulla febris, nec calor animadvertitur, pulsus mollior, facilior respiratus, & expectoratio liberior est, sequentes pilulæ proficue erunt.

℞. Cort. peruv. select. dr. vj.

Extr. agrimon.

Mastich.

G. arab. $\overline{\text{aa}}$. dr. ij.

Extr. liquirit. dr. j.

Fiant cum syrupo balsamico pilulæ gr. iij.

Sumat ter de die v---viij.

Cum æger pallet, nec febris, aut orgasmus adest, præter pilulas jam descriptas extractum myrrhæ aquosum tentari potest.

℞. Sacch. lactis unc. jβ.

Extr. myrrh. aquos. unc. β.

Cautius tamen myrrha utendum, ubi ægri hæmoptysi antea laborarunt.

Balsama phthificis non conveniunt, quod calorem & febrim augeant; etsi ea veteribus, propterea fortassis commendata fuerint, quia ad tuenda adversus putredinem cadavera iis utebantur.

Cl. Spielmann balsamum de Mecha ceteris ob gratiam, & vim calefaciendi minorem præferebat, sed raro sincerum invenitur. Mihi quidem ante complures annos ejus copiam fecerat patruelis meus Comes a Schwachheim, quondam Imperatoris Cæsaris ad Turcarum Imperatorem legatus, a quo id muneris loco acceperat; sed non majorem ejus vim expertus sum, quam illa, quæ in terebinthina cocta inest, quæ, cum oleo minus abundet, minus calefacit.

Supereft, ut quædam de symptomatibus vel curandis, vel palliandis dicam.

Tussi phthicorum mitigandæ, opiata idonea prædicantur; quæ quidem initio morbi prodesse possunt, cum febris nondum magnopere invaluit, ut noctu pulmonibus quies concilietur, ægrique frequentibus concussionibus,

non adeo lædantur; secus nocent, cum febrim augeant, & corpus ad sudandum magis disponant.

Nonnulli, sumpto opio, cibi appetitum amittunt, alii universi corporis prurigine corripiuntur.

Præstat paregorica, ubi ob vehementiam tussis indicantur, altero, aut tertio quovis die præbere, ne corpus iis ita assuescat, ut dosis augenda sit, & symptomata, supra memorata, ingravescant.

Opium in substantia præferendum est tincturis spirituosiss, quæ ob crocum & aromata, calorem, febrim, & sudores augent.

Si tussis nimium sicca est, pulvis e speciebus diatragacanthæ, & extracto liquiritiæ convenit; cum verò sputa nimis tenacia sunt, vellevis oxymellis scillitici dosis, vel infusum hyssopi tentandum est, aut kermes mineralis quidpiam, addi prioribus pulveribus potest.

Sputis provocandis minus tuto emetico adhibentur.

Nonnunquam ægri, tussis vehementia irritati, vomunt, bilemque, quæ etiam in sano ventriculo liberè fluctuat, mechanico hoc motu rejiciunt. His certè inauspicatissimè vomitorium propinaretur; memini enim, aliquos citius propterea periisse, quod medicus, malum ratus in ventriculo hære, febrim lentam pro gastrica habuerit, & emeticum propina-verit.

Adversus sudorem colliquefacientem phthi-sicorum, nonnulli agaricum, duorum grano-rum pondere sumendum prædicant; sed tan-tum abest, ut eum nunquam salutarem repe-

rerim, ut oppressionem pectoris potius auctam ab eo fuisse sciam.

Salvia, quæ quidem sudorem, post febres exortum, comprimit, in phthificis nocet, cum calorem, & siccitatem majorem inducat.

Decoctum corticis peruviani, cum exigua alixir vitrioli dosi, longe cæteris ad hunc scopum præstat.

Exitiosa phthificis diarrhæa est, quam colliquativam appellant, sed non omnis pro hac habenda. Quandoque in iis oritur, qui lacte utuntur, & tum ejus coagulo originem debet; his potius rhabarbarina, & clysmata ex infuso chamomillæ conveniunt; nam si diarrhæa sistatur, auguntur ægri, inflatur abdomen, & spiritus multò agrius ducitur.

E sententia Cl. Rosenstein quamdam ad diarrhæam phthificorum comprimendam, vinum habet cortex melle rasorum mixtus, si horis a febre vacuis sumatur; sed vel ex his patet, non esse hîc de febre colliquativâ sermonem, cum, qui eâ laborent, vix unquam ab ejusmodi febre immunes sint. Ad hanc diarrhæam impugnandam, & perniciosam ejus periodum prolongandam decoctum salep, pulvis salicariæ, et paregorica dari possunt.

Laudatur a Boerhaave & vanSwieten clyisma theriaca & terebinthina conformatum; sed enema, ex opio cum gummi arabico paratum, præferendum esse videtur; cum calida illa, ut theriaca & terebinthina febrim, æstum, & sudorem augeant.

Ad phthisin sanandam non solum ejusmodi remedia requiruntur, quibus febris fugetur, cacochymia purulenta corrigatur, & via ad ulcus consolidandum fiat, sed necesse est, ut

corpus nutriatur, & chylus probus generetur; cui proposito, præ cæteris, lac opportunum est, quod illud animalis nostri liquidi naturam facilius induat, nec tot mutationibus egeat ante, quam in chylum abeat.

Præstat cæteris lac muliebre, quod non tam facile ab acido, ac vaccinum coagulatur. E papillis optimo eventu fugitur, nisi ab hoc opere abhorreant ægri, vel jam ad extrema deducti sint. Vidi nonnullos, quibus fugendi conatus adeo pectus oppressit, ut ob spiritûs angustias desistendum iis fuerit.

Lac humanum, uti van Swieten observavit, optimum, quatuor, aut quinque a refectione horis, ducitur, nam quod mox a cibis sumtis emulgetur, crudum est: quod autem duodecim ab ultimo pastu horis exsugitur, sublavescit, et ad urinæ odorem accedit.

Cum ægri viribus magnopere deficerentur, nutricibus decoctum corticis peruviani non sine fructu propinavi.

Neque illud hic prætereundum videtur, quod mihi, cum plures phthificas, uterum gestantes, tractarem, non semel accidit, videlicet, ut, postquam illis corticis decoctum larga manu præbuissem, proles ediderint sanas & torosas.

Laudatur quoque lac asininum, & caprinum: hoc Ill. van Swieten tum adhiberi jubet, cum ulcus detergendum: vaccinum vero, cum consolidandum est.

Lac asinum alvum persape crebrius movet, forte ob nimiam tenuitatem: plerumque, quod pluris constat, parcè hic nimis propinatur. Unde miror, cur ei nondum equinum subrogatum sit, quod proximè ad asininum accedit.

Lactis caprini virtus ob diversum hujus animalis pastum dubia est, cum modò alvum laxet, modò constringat.

Celsus Aurelianus olim ad levandum cæliacum morbum, lac commendavit capræ, sed adstringentibus & balsamicis herbis nutritæ. Quæ ratio pascendi animalis, cum ejus lactis tantus sit usus, universim adoptanda foret.

Dolendum, hic Viennæ sæpius in usum vocari lac debere animalium pravo pabulo vescentium, nam teste Galeno, (m) pascua animalium ad lactis eorum naturam constituendam maximam vim habent.

Et sane quotidiano usu docemur, odorem, colorem imo & saporem lactis, pro diversitate alimentorum diversum esse, vaccas aquis foetentibus, & palustribus utentes lac, & butyrum ingrati odoris præbere.

Ubi febris intensior est, lac non convenit, quod, quæ partes ejus in cremorem abeunt, facile acres, & rancidæ evadunt: quæ vero caseosæ sunt, eæ brevi putrescunt. Itaque aut serum lactis, aut lac ebutyratum substitui debet. Consultum est, lac initio præbere, aqua dilutum, ne infirmiores pulmones a bono etiam nutrimento nimium opprimantur.

Cum ægri, dum lacte utuntur, acidi sensum percipiunt, absorbentibus utendum est, sed abstinendum a sapone, humores nimium solvente, & febrim quandoque exasperante.

Si appetitus ciborum minuitur, vel pondus in regione ventriculi animadvertitur, nec alvus solvitur, magnesia nitri cum rheo præbenda est.

(m) de sanitate tuenda L. V.

Ubi vero alvus nimium fluida dejicitur, myrobalani, vel flores rosarum siccati, lactique infusi conveniunt.

Si inter lactis usum macies augefcit, glandulæ mesenterii tum infarctæ sunt, nec quicquam lacte proficitur.

Cum phthisis ex ictero orta fuit, lactis usus damnandus est.

Austriaci curationem, quæ solo lacte peragitur, non ferunt, etsi absorbentia, corticem, aut rhabarbarina pro symptomatum diversitate exhibeas; itaque jus carniæ, aut, si febris id sinat, carnes teneras præbere illis oportet; teste enim Hallero, (n) lac adultos debilitat, neque adeo convenit vino utentibus, aut iis, quibus læxa, & debilis fibra est.

Præcipuè vero iis, qui vinum immoderatus ante morbum hausere, lac oneri esse solet, uti multis quoque aliis, quin causa appareat, quemadmodum Tissot animadvertit.

Nonnulli sub lactis usum, etiam si cortex &c. iis adhibeantur, sputa nimium copiosa ejiciunt, tunc a lacte omnino abstinendum est.

Nuper in phthisi laudabantur glandes quercus tostæ, præcipue cum obstructio glandularum unà notatur.

Recte Ill. Murray animadvertit ea, quæ de usu glandium quercus apud veteres leguntur, ad alias potius species sapidiores illas, & saniores pertinere; nam, quæ apud nos nascuntur, glandes adeo insipidæ sunt, ut credi vix possit, quemquam hominum, nisi extremâ fame urgente, vesci illis aut velle, aut posse. Certe panis, e

(n) T. VII. P. II. p. 43.

quercuum glandibus, dum annonæ magna caritas esset, confectus; alvum obstipavit, & funestum cholerae malum vescentibus attulit.

Decoctum præterea illarum multis phthisicis nullo prorsus commodo propinatum fuit.

Quibusdam aquæ medicatæ, veluti selterana cum lacte profunt. At ubi corporis vires admodum fractæ, aut phthisis in nutricibus per nimium infantis lactatum contracta est, spadanae, nisi febris prohibeat, cum lacte præferendæ sunt: hæ enim corpus magis roborant, & ventriculum lacti ferendo magis aptum efficiunt.

Damnabili sane instituto plures aquarum medicatarum libræ matutino tempore ingurgitantur; cum ventriculus & intestina hoc modo nimium distendantur, ac debilitentur, flatusque generentur. Quamobrem etiam a prandiis, postquam digestio perfecta est; aquarum medicatarum quidquam hauriendum est.

Univerſim, quod attinet ad aquas medicatas, illud Spielmanni tenendum præceptum est, ne major earum copia nimis brevibus intervallis ingurgitetur: ne ventriculo cibis repleto ingerantur: neve a non assuetis frigidæ potentur, hinc vas, selteranis repletum, quandoque calidæ inferendum est. Nonnulli lac tepidum non ferunt, sed frigidiusculum adpetunt. Cavendum tamen a frigido, ne sputa cohibeantur.

Incipiendum a minori dosi. Consultum quoque, principio lac, aquis medicatis magis dilutum propinare; tum si agri ferant, minore aquæ copia temperatum præbere.

Inter aquarum usum mineralium nascitur quandoque plethora ita, ut ad levem venæ sectionem recurrendum sit.

Nonnulli feliciter saccharo lactis usi sunt, quod

sal est essentialiale, saponaceum, gratum, & ob virtutem oleosofalinam, abstergens, incidens, simulque demulcens. Curandum, ut recens paratum sit, ne ranceat.

Concedi possunt jura e testudinibus aut ranis confecta.

Ostreæ crudæ multum & bene nutriunt; hinc phthificis concedi possunt, si absque succo citri comedantur, neque ventriculus inde gravetur.

Lycoperdon tuber Linnei ab Hispanis laudatum, nostris nimios calores creat.

Insalubres tamem a Cl. Zückert habentur ranæ, quæ in limosis aquis degunt, quod & ventriculo molestæ sunt, & febrim generant. (o)

Minus tutò canceri fluviales adduntur, quæ interdum calor & febris augentur. Damnandæ gelatinæ, quæ a debili ventriculo, pulmoneque imbecillo non superantur; quare aut respirationis difficultas increscit, aut hydrops accedit.

Alimenta phthificis sæpe, sed parcâ manu præbenda sunt, ne a turgente cibus ventriculo descensus diaphragmatis, & libera ea propter pulmonum dilatatio impediatur, vel a bono etiam chylo pulmo debilis obruatur.

Vina phthificis haud conveniunt, sub finem tamen ægritudinis, si febris absit, dulcia, & vix spirituosâ; ut Rîfosco & Mazzimino concedi possunt. Si vero cerevisiam in eodem statu appetant, quæ sequitur, cum sat grata, tum salubris erit,

℞. Herb. endiv.

--- urtic.

--- portul. aa. unc. j.

Rad. symph. unc. β.

Infunde cerevisiæ bene fermentatæ & defæcatæ mensur. ij.

Stent vase clauso; ubi frigent, cola & exhibe.

Non immerito cœlum ruris amœnum, salubri herbarum spiritu refertum, nec impuris, quibus scatent urbes, vaporibus inquinatum phthificis commendatur.

Vitandus est aer montibus vicinus tum ob subitas, quæ obnoxius est, vicissitudines, tum propterea etiam, quod ægri commodiùs ferunt aerem graviolem, quam leviolem. Eandem ob causam in summis montium cacuminibus & celerius homines, & difficilius respirant. Bartholomæus quoque Paschettus refert, Genuæ complures tabidos, & phthificos, ob aerem nimis tenuem, evadere.

Absint phthifici, ut Ramazzini monet, a locis sepulturæ; item a coriariis, pellionibus, fullonibus, saponariis, quorum fœtor ventriculo, & pulmonibus inimicus est. Fugienda aura vespertina asperior, quæ teste Mortono, phthisin deteriore reddit.

Videndum, ne phthifici in conclavibus degant paludes spectantibus, vel solo nihilum altioribus; præcipue cum uvidis in locis domus sitæ sunt.

Paucis abhinc annis stabula vaccarum habitare phthifici jubebantur, at sinistro prorsus eventu. Murray feminam vidit, fere suffocatam, etli unica in bubili vacca stabularetur.

Aer humidus suffitu olibani, mastichis aut styracis corrigendus est.

Commendabantur quoque suffitus balsamisci, tanquam tussi profligandæ opportuni, sed & tussis inde, & febris majus incrementum cepere, in

quibusdam sputum sanguinis successisse vidi. Suffimigia plus asthmati humido, laxis pulmonibus, & catarrhalibus affectionibus convenire videntur.

Aliquot phthificos in urbem Baaden paucis miliaribus distantem misi, non eo quidem consilio, ut thermis uterentur, sed ut auram illam, sulphureis exhalationibus imbutam, caperent; quæ res illis levamento fuit, sed pluribus experimentis, imposterum capiendis, confirmari debet.

Cl. Roux refert, phthificum, variis remediis incassum adhibitis, lithantracum fodinam ingressum, cujus aere sulphureo & expectoratio promota est, & sanitas demum consequuta.

Vix commendandam phthificis equitationem censeo, cum inde sanguinis per pulmones tractio augeatur, ulcerique consolidando quies potius necessaria sit. Hinc Hales pulmonum debilitate laborantibus etiam modicas corporis exercitationes dissuadet. Morgagnius exempla affert phthificorum, quibus celebrata a Sydenhamo equitatio mortem acceleravit.

Clarissimus olim in hac Universitate Professor Joannes Melchior Storck, cui, siqua est in me artis medendi peritia, eam plurimum debere me plane confiteor, ex hæmoptysi in phthisin inciderat. Hic, cum equo aliquando insideret, graviore hæmoptoe correptus est, ac demum e phthisi periit.

Plus emolumenti equitatio habet in febre, & tabe, quæ e viscerum obstructionibus nata est. Et fortasse nonnulli ejusmodi ægri, qui sanati sunt, pro phthificis habebantur.

Veteres navigationem hanc in rem commendarunt. Hinc Plinius ait: neque enim Aegyptus propter se petitur, sed propter longævitatem navigandi.

Demum

Demum phthificis animi quies concilianda
est, namque rectè Ovidius : (p)
Attenuant vigiles corpus miserabile curæ.

CAPUT VII.

DE

ASTHMA TE.

Asthma jam humidum est, jam siccum:
modo continenter urget, modo more febrili-
um paroxysmorum certis aut incertis tem-
poribus reveritur.

Plurimæ sunt asthmatis causæ; velut, sca-
bies, & arthritidis repulsa, fumi arsenico gra-
vidi, ulcera intempestivè consolidata, tumo-
res scirrholi atque oedematosi thoracis, spasmi
hypochondriaci, mucos oblit pulmoes, aut
nimia pinguedine elisi, sudor denique axillarum
frigidis, aut adstringentibus cohibitus, &c.

Gibbosi quoque frequentius hoc malo lobo-
rant ob pectoris angustias, & nervorum spi-
nalium, qui cum intercostalibus committuntur,
pressionem. Nonnunquam causa asthmatis ab-
domini insidet: sæpe testante Floyero nihil
in dissectis asthmaticorum cadaveribus vitii
detectum fuit.

Meliùs, & rectiùs sub dio asthmatici va-
lent, quam in lecto; faciliùs quoque, & li-

(p) Métamorph. v. 396.

berius sub aere urbium crasso, omnisque generis sordibus inquinato spirant, quam rure, coelo sereno, & sicco. Causam hujus rei affert Hallerus, (a) cum ait: densiori aere pulmones melius repleri, sicque faciliorem reddi sanguinis transitum.

Per somnum paroxysmi ingravescent: exasperatur item morbus, cum coeli temperies vehementiores patitur, velut vere & autumno, mutationes.

Maturâ, aut propectâ aetate homines gravius, quam juvenes afficiuntur.

Aegrè ab asthma juniores, nunquam senes Kleinio teste liberantur.

Si tussis sicca in humidam mutatur, indeque levatur aeger, faustum id omen fuerit: sin secus, infaustum.

Oedemate manus vel brachii accedente, ut plurimum hydrops pectoris jam adest. Verum a timore pedum oedematoso subito orto, observante van Swieten, saepe miro modo levantur asthmatici.

Fusus de cura, & signis asthmatis differit Sauvages. (b)

Defectio animi crebrior lethalem portendit eventum.

Frequenter insanabile est asthma.

Ipse Floyerus, qui egregium de eo librum scripsit, triginta annis hoc morbo laborabat, neque tamen omnibus tentatis remediis convaluit.

Si pulsus fortis, & plenus metum afferat vaforum disrumpendorum, venasectio moderata opportune instituitur, praecipue, cum menstrua,

(a) Phys. T. III. p. 196.

(b) T. II. P. II. Nosol. meth. p. 168. 83.

aut hæmorrhoides suppressæ erunt. Neque tamen imitandus Mead (c) videtur, dum ait: multiplex asthma multiplicem postulat medicinam; cujuscunque vero generis sit, semper profuerit, venam incidere, nisi quid obstet.

Momentaneam quidem opem sæpe sanguiniseductio præstat, sed brevi omnia in pejus ruunt, hydropsque frequenter accersitur, præcipue si ægri in paroxysmo plus pallefant.

Leviore, & recente malo, cum febris abest, & nausea, atque anxietas circum præcordia; vel aliquot post pastum horis consequens exacerbatio observatur, tentari emetica poterunt; ast malo inveterato, & comitante febre, morbus, post emesim, impetu fortiore redire solet; id quod omnibus fere accidisse narrat Wintringham, (d) quibus paucis post vomitum momentis notabilis spirandi difficultas rediit.

Obsunt, quæ exscreationem promovent, medicamenta, ubi vix anhelitus ducitur; nihil enim hoc rerum statu exsperare ægri possunt.

Neque in vapore aceti, seu simplicis, seu scillitici ope spongiæ attracti multum spei est, quum omnes illi, qui tali respirandi angustia premuntur, ab hujusmodi vaporibus, testante Wintringham, enixe abhorreant, quamvis ii, maxime in asthma pituitoso, salutare esse possint.

In asthma sicco ex purgantium & diureticorum abusu hydropem pectoris cum Cl. Kleinio enatum vidi. Observatis constat, quod paroxysmum asth-

(c) Monita, & præcepta med. p. 61.

(d) Richardi Mead monit. & præc. med. observationibus illustrata p. 93.

maticorum ingruentem subinde alvi fluxus liberior præcedat.

Opiata, si convulsivum excipias, vix idonea sunt, cum ægri, præcipue pituitoso in asthmate, dum materia intus cohibetur, eo adduci possint, ut ferè suffocentur.

Cum res urget, opium aqua dilutum rectius, quam in pilulam conformatum præscribitur; cum hæc in ventriculo difficilior, & non nisi post longius tempus solvatur.

Si hysterica asthmate correptæ multum flatibus non secedentibus torqueantur, quæ alias iis prorumpentibus levabantur, cucurbita scrobiculo cordis imposita sæpe juvat; ubi vero causa in visceribus abdominalibus obstructis; ut, hepate hæret, ad solventia &c. recurrendum est, ut uberiùs ex capite de ictero patebit.

In asthmate humido, interpositis purgantibus, & clysmatibus acrioribus, kermes minerale, gummi ammoniacum, oxymel scilliticum, infusum hyssopi, & stipitem dulcamaræ N. 21. conveniunt.

Stipites dulcamaræ longiore tempore haud decoquendæ sunt; cum ejusmodi decoctum amaritiam contrahat, pluribus ingratam.

Et si pulvis ipecacuanhæ inhalatus inimicus sit pectori, cum in transactionibus anglicanis refertur, fœminas duas violentis asthmaticis symptomatibus correptas fuisse, dum ipecacuanha contunderetur, eam tamen Wedelius (e) jam olim in affectionibus pectoris, pulmonibus nondum exulceratis, internè exhibuit. Nuper restricta dosi ita ut tertia aut quarta quavis hora dimidia grani

(e) Diss. de ipecacuanha p. 37.

pars ægro præbeatur, iterum commendata est. Profuit quandoque, at sæpius spem fefellit

In asthma pituitoso kermes minerale, gummi ammoniacum &c. multo plus præstitere.

In nonnullis tamen, præcipue in pallidioribus, & inflati habitûs ægris nec hæc juverant; verum extractum scillæ aquosum prioribus additum levamini fuit.

Idem remedium cum successu exhibui in gibbosis, asthma leviori affectis, ubi pulsus vacillabat, aut pedes tumere incipiebant: ita hydropem pectoris, qui in similibus brevi sequitur, sæpe præverti.

Stimulantium, velut kermes mineralis dosis sensim augenda est, ne, dum materies nimis crassa, nec adhuc expectorationi apta est, ægri majori dosi lædantur.

Nullam ab extracto tabaci in asthma laudato opem allatam ægris observavi.

In asthma, ex ulceribus citius consolidatis, æthiops antimonialis, interpositis, si corpus succi plenum sit, purgantibus, nonnunquam prodest, non neglectis pro diversitate subjecti, & symptomatum balneis sulphureis, vesicatoriis, fonticulis, aut setaceis.

Quandoque emplastrum semivesicans, latius extensum, commode inter scapulas applicatur; observatum quippe fuit, nonnullos, ingruente paroxysmo, dolorem in scapulis, jam remittentem, jam intermittentem passos esse.

Vesicantia sæpius renovata, aut diutius suppurantia aquæ, vel majoris sunt efficaciam, ac cortex mezerei, qui ægris majus tedium, & irritabilioribus majorem dolorem parit.

Tractaveram aliquando asthmaticos duos, qui sub paroxysmi principium viscidissimam

materiam tanto nisu exscrearunt, ut, anima interclusa suffocandi, prope viderentur. Ii pluvie ex floribus, sulphuris extracto liquiritiæ, & kermes minerali levabantur primum; tum febricula lenta accessit, sputa copiosa ac purulenta pessimæ notæ ejiciebantur, viresque diffuebant. Hausto decocto corticis, lichenis islandici, & liquiritiæ tolerabili ad tempus valetudine utebantur; verum decurrens eodem tenore paroxysmus absque manifesta causâ sæpius rediit.

Horum alter, qui ex animi pathemate malum contraxerat, impatiens curæ exteras provincias adiit, quæsiturus medicinam morbo; verum, accidente universi pene corporis herpete, adhibitisque incassum variis remediis, quarto post anno reversus in patriam, miserrimè obiit.

Apertum cadaver, præter polypos majorum vasorum, & calculos cysticos, qui effectus potius, quam causa morbi fuisse videbantur, nihil peculiare exhibuit. Alterum, cui sublimati corrosivi usus asthma supradictum adduxit, longiori tempore, sequentibus pilulis, decocto stipitum dulcamaræ, & aere sulphureis vaporibus imbuto servavi.

℞. Cort. peruv. selectiss. unc. j.

Flor. sulph.

Extr. liquir. aa. dr. ij.

Gumm. ammon. ʒ iv.

F. pil. gr. iij.

Sumfit ter per diem vj. progrediendo ad x. usque.

Demum aeris injuriis cum se incautius objecisset, peripneumoniam notham contrahit quâ periit.

In asthma convulsivo vox acutior est, urina tenuis, & copiosa redditur, & paroxysmus animi motibus aut excitatur, aut exasperatur.

Non raro, uti Baglivius animadvertit, frigoris in capite sensus præcedit, quem quidam in vertice dolor comitatur.

In paroxysmo crocus, spiritus salis ammoniaci, & opiata : extra paroxysmum frictiones spinæ dorsæ aromaticæ, equitatio, pilulæ N. 10. ex radice valerianæ, cum gummi galbano & asa foetida adjumento sunt.

Semper tamen ratio temperiei, pulsus, vitæque antea actæ habenda est.

Martialia, etsi fractum sit ac debile corpus, plerumque obsunt asthma convulsivo laborantibus.

Cum è vitio solidorum malum enatum est, pro insanabili haberi debet; animadvertit Ill. Tralles, vir ob artis peritiam, suavitatem morum, candoremque animi mihi plurimum colendus, nihil ad vitia partium solidarum tollenda opis in medicamentis esse.

Gibbosos asthma laborantes, potissimum hydrops pectoris invadit. Hinc ubi pedes aliquantillum tumebant, & spiritus angustior ducebatur, levissimam dosim extracti scillæ cum extracto liquiritiæ propinavi, quâ re & symptomata levabantur, & ægri per complures annos sustentati fuere.

Si asthma a pulmonibus pinguedine elisis ortum trahit, obesitas, præcipiente Hippocrate, tollenda est paucitate ciborum, exercitiis fortibus, obsoniis hortensibus, stragulis duris, curis, & vigiliis.

In asthma e scrophulis orto, quandoque sequentes pilulæ levamen rulerunt.

℞. Spong. marin. combust. unc. ℥.

Extract. fumar.

Gumm. ammon.

Flor. sulph. aa. dr. ij.

Antim. crud. dr. j.

F. pilulæ gr. iij.

Sumat ter de die vj. progrediendo ad x--xij.

Verum cuilibet in re medica versato notum est, morbos chronicos, velut asthma, phthisim, tabem, aut hydropem, cum e scrophulosis tumoribus nati sunt, vix aut ne vix quidem sanari posse, præcipue si lapideam jam duritiem nacti sunt.

In tumoribus scrophulosis externis inchoantibus allaborare oportet, ut hi dissipentur, & impediatur, ne similes in partibus internis, ut pulmonibus, mesenterio nascantur.

Non equidem ignoro diversissimam esse scrophularum naturam, seu illæ in diversis corporis plagis, seu unâ eademque in parte, velut in collo, existant. Itaque de Haen non multum fudit remediis, cum, quod uni quidem solvendæ par foret, ad reliquas abigendas non valeret.

Burlet scrophulosis aquam calcis exhibuit, sed nullus horum curabatur, verum macies, & appetitus dejectio inde nascebantur.

In strumis efficacissimam expertus sum spongiam marinam combustam.

℞. Spong. marin. combust. dr. vj.

Elæo sacch. anis. unc. β.

Sumat bis per diem gr. xxx. progrediaturque ad L. usque.

Nunquam e spongia marina, ut alii asserunt, maciem, aut tabem secutam esse observavi, quæ, si succedunt, forte tumoribus, intra corpus latitantibus rectius, quam medicamento huic adscribendæ sunt.

Cum jam profligatus est morbus, ægrique

convalescere videntur, amaricantia primum, tum cortex, & lenia martialia opportune adhibentur.

Mirum prorsus videtur, quod Lucas asserit, (e) multos Spadanorum incolarum strumis laborare.

Plurimum deinde a diæta, ratione vivendi, munditie, & corporis motu pendet.

Helmontius adversus scrophulas velut peculiare remedium digitalem purpuream L. commendat, cujus radix in pulverem contrita interne sumitur, externe vero cum gummi ammoniaci & bedellii in emplastrum conformata applicatur.

Laudat idem remedium Burmannus.

Hermannus vero vult digitalem novellam, & prima plantæ erumpentia germina in usum adhiberi; tum succum eorum expressum in butyro coqui tamdiu, donec succus concoctus est, tum idem, addito novo succo, iterari.

Oportet autem sufficientem hujus medicaminis copiam parare eo anni tempore, quo flores haberi possunt, cum integer quandoque annus, quin longius etiam tempus ad curationem absolvendam requiratur. Refert præterea Cl. auctor, ulcera primo majora fieri, sed tandem sanari, & cute obduci. Unguentum hoc in scrophulis solum humidis, & manantibus salubre esse, in siccis verò parum valere asserit.

Cl. Lentini contrariæ sententiæ est, & theam ex digitali purpurea quosdam fere trucidasse, & symptomata enata emmollientibus anodynisque mitiganda fuisse author est.

Narrantur quoque ab aliis infausti effectus succi digitalis cum cerevisia exhibiti; at constat, nimis magna dosi propinatum fuisse.

(e) Essay on Waters p. 257.

Anno proxime elapso, nonnulli cum scrophulosis tumoribus in nosocomio erant, qui absque ullo fructu antimonio, sulphure, æthiope minerali, amaricantibus, decocto sarsaparillæ, saponaceis, gummatibus, cortice, mercurialibus usi fuere; at succus digitalis purpureæ recenter expressus, atque externe applicitus: tum extractum interne præbitum sapissime iis profuit.

A gran. i. extracti incepimus, dein ad v--vj, imo apud quosdam ad gr. x & xij. progressi sumus.

Inter alios juvenis erat, post scabiem externis remediis retroactam scrophulis colli correptus, cui nulla remedia seu interna, seu externa adversus scabiem retropulsam laudata, profuere. Imo alios scabiosos contrectavit, neque inde scabies proliciebatur. Demum digitali tum interne, tum externe adhibita, nulla subsequente scabie, convaluit, emollitis primum tumoribus, tum bonum ac blandum pus fundentibus.

Nonnulli titillationem, alii sensum doloris in parte affecta, adhibito ante commemorato remedio, experti sunt.

Duo a sumpta leni extracti digitalis dosi iteratò febricitare cœperunt; itaque ab ulteriore ejus usu desistere cogebamur.

Pauci quidam a majori dosi, dolorem capitis, offuscationem oculorum, & vertiginem querebantur, eorumque caput magis inflatum apparuit: his minuenda dosis erat, quam dein ad perfectam sanationem usque absque ullo incommodo ferebant.

Cum sub usum digitalis scrophulæ exulcerari cœpissent, ut plurimum suppuratio bona sequebatur; in nonnullis vero scrophulæ clausæ in suppurationem abibant, pureque bonæ notæ exhibito consolidabantur, quamvis ulcera similia aliàs difficillime sanentur.

Deficiente succo recenti, emplastro ex cicuta cum extracto digitalis usi sumus, sed multo lentius vim suam hoc medicamentum exseruit.

℞. Emplast. de cicut. unc. viij.

Extract. digital. unc. iv.

Ulceribus sanatis, nullum aliud incommodum successit.

Extra nosocomium etiam in quâdam hydropis specie efficacem digitalem, cum aliis remediis conjunctam reperi. Sed hæc ulterioribus experimentis egent, quæ præter alias observationes super diversis etiam morbis institutas publici juris faciam.

Nuper succus lacteus *Helvellæ pineti*, s. *acaulis* L. in tumoribus scrophulosis laudabatur, cujus tamen nondum periculum fecimus. (f)

Diæta, si diversis asthmatis speciebus accommodata sit, liberque a curis animus, maximum forte præsentissimumque asthmaticis levamen adferent.

Cavendum, ne thorax, aut abdomen arctioribus vestimentis constringatur. Ex qua causa multi morbi pectoris & abdominis originem ducunt, quare sapienter *Lycurgus Spartanis* præcepit, ut largis vestibus uterentur.

Moderatur quidem corporis motus, si eum tolerare ægri possunt, commendandus; sed exercitationes corporis ad lassitudinem usque suscipiendæ, quas *Mead* suadet, præcipi nequeunt, cum eæ spiritum angustiores reddant.

(f) Histoire des découvertes faites par divers savans voyageurs, &c. p. 110.

CAPUT VII.

DE

HYDROPE PECTORIS.

PRæter causas hydropis communes, hæc quoque ad progenerandum pectoris hydropem magnam vim habent, mala pectoris confirmatio, ejusve compressio, polypus, aneurisma cordis, aut vasorum majorum, scirrhi pulmonum, & eorum violenta inflatio, unde tibicines & cantores sæpius hoc morbo tentantur; item cum vasa, valvulæque cordis naturam & duritiem ossium induunt, aut oedema pedum subito externis remediis retropellitur.

Vidi paræpe hydropem pectoris tum ortum, cum hæmorrhoidibus nimium fluentibus, fracto corpore, & a plethora immuni vena secabatur. Idem accidit, dum phlebotomiæ, emenagoga &c. in usum vocantur, ubi post morbos acutos inopiâ sanguinis menstrua non fiunt.

Denique dum sanandis annosis tumoribus, & quasi scirrhis viscerum obstructionibus, solventissima remedia, ut decoctum graminis, taraxaci, aut eorum extracta magnâ copiâ propinarentur, hydropem inde pectoris successisse comperi.

Nempe multo facilius evenit, ut humores corporis nostri nimium solvantur, quam ut inveteratæ istæ obstructiones tollantur.

In hisce diætâ solum accomodata, & ea, quæ alvi obstructionem impediunt, adhibenda sunt.

Feminam tractavi, quæ tenero cæteroquin, & debili corpore durum, & ingentis molis lienem gestabat; ea, hac usa methodo, jam ultra viginti annos satis commodè degit.

Serum, quod extra vasa erupit, vel in utroque pectoris cavo, vel in pericardio, aut mediastino; vel sub sterno, aut inter binas pleuræ lamellas hæret, quandoque in pluribus locis collectum stagnat.

Potest & pulmo hydropicus evadere; tum verò aqua vel in sacco, vel per tunicam cellulofam diffusa, aut in vomicis, vel hydatidibus congregata deprehenditur.

Multo frequentius, quam vulgo credatur, hydrops pectoris occurrit; qui, principio quidem cognitu difficilis, in progressu sæpissime immedicabilis est.

Plerumque cum levi dispnœa orditur; tum tussicula accedit sicca: post motum quemlibet respiratio solito plus acceleratur: humida tempestate pejus; sicco ac frigido cœlo melius habent ægri. Sæpe per longius tempus hic status durat; aucta dein feri copia symptomata quoque augentur, ne per quietem quidem sopienda; commodius in unum latus cubant hydropici, & in id sæpe, in quod ante non solebant. Tum status accedunt, spasmī, & animi dejectiones: tument crura, & quandoque scrotum: nonnunquam e lecto surgere coguntur ægroti, lotiumque emittunt modicum cum sedimento lateritio; demum præcordiorum angustia, sub vesperum inprimis crescunt, una, rarò utraque manus tumescit, inflatur vultus, corpus rabescit, quandoque frigus in pectore sentiunt, amaurosi, & brachii paralyti corripuntur, & spumam albam, pallenti rubore infectam, ore ejiciunt.

Ubi in una thoracis cavitate collecta latet aqua, facilius incumbitur parti affectæ: si in utraque, commodissime erecti sedent ægri, corpore paullulum flexo antrorsum. Nonnunquam, cum aqua tenuis est, fluctuatio in pectore percipitur; interdum pulsus debilis, & parvus, quandoque durus, & inæqualis deprehenditur.

Jubet Hippocrates, ægros, humeris prehenso, concuti, ac explorari, utrum strepitus aquarum discernatur; verum id fieri perraro potest, cum minimus quisque motus eis persæpe spiritum ferme præcludat, neque sonus etiam, cum aqua in sacco collecta est, percipiatur.

Nonnulli, percussio pectore, aquam præsentem velut indicio deprehendere malunt; quod latus affectum, cum pulsatur, aut nullum pene, aut certe obtusum sonum reddat.

Inter signa, quæ hydropem pectoris prodant, id quoque Ill. de Haen. refert, si sputum ablit cruentum; verum sæpius in hoc morbo ejusmodi sputa apparent.

Hydropi pericardii multa symptomata cum polypo cordis communia sunt, veluti pressio, & angustiarum sensus circa anteriorem thoracis partem, anxietas, & palpitatio cordis, tussis sicca, respiratio expiratione difficilior.

Nonnunquam, corde palpitante, undulatio tertiam inter, & quartam costam, animadvertitur; quæ, pericardio admodum distento, vix percipitur. Pulsus frequenter reperi subdurus, & intermittentem; fluente alvo, levare ægri videntur, sed reverâ morbus ingravescit.

Vieusenus e plumbeo colore labia, & palpebras obsidente; hydropem pericardii conjicit, sed persæpe hic morbus, nulla ejusmodi nota insignis, occurrit.

In hydrope pulmonum, jam sub initium morbi spiritus ægre ducitur, propterea, quod eum medio-cris feri copia in pulmonum intervallis accumulata multo augustiorem reddat, quam major aquæ copia in thoracis cavitate collecta.

Simson (a) ait, se semper oedematis pulmonum conjecturam e facie turgidâ, pedibus circa malleolos aliquantum tumentibus, difficiliore respiratione, & pulsu imprimis adeo suppresso, ut vix explorari posset, cepisse; fatetur tamen vir Cl., rarius in cadaveribus pulmonum hydropem reperiri, tum quod facilior curatu est, tum etiam, quod idem morbus, si pertinacior sit, rupta tali vomica aquea, in hydropem pectoris haud difficulter abit.

Fusius de Haen signa hydropis recenset; at ea sæpe fallunt. Sic Cl. Ludwig (b) hydrope lateris sinistri laborantes vidit, dextro lateri sine molestia incumbentes & contra. Ipse de Haen (c) testatur, in hydrope pectoris quodam gravi nocturnas anxietates vel diu siluisse, vel omnino non adfuisse. Tumor item unius, vel utriusque manus in multis non reperitur, in quibusdam, paucis solum ante mortem diebus, observatur.

Præterea hypochondriorum tumor, qui hydropem pectoris indicare dicitur, in obeso corpore difficilior deprehenditur. Denique membranæ pericardii in eam quandoque molem, præcipue in asthmaticis, excrescunt, ut & palpitationem & syncopem producant, quin ullum uspiam serum collectum sit.

Itaque, cum signa ante commemorata persæpe

(a) Medical Essays P. II. p. 627.

(b) Advers. Vol. II. P. IV. p. 636.

(c) T. VI. p. 89.

fallant, cumque hic morbus, & nullâ sui præbita suspitione, adfuerit quandoque, & sæpe abfuerit, quamvis ejus indicia obversari oculis viderentur, fatisfuerit, ea adduxisse, quibus rarius in fraudem impellimur.

Hydrops pectoris semper cum periculo conjunctus est, eoque vel majore, aut minore, pro diversâ symptomatum, diuturnitatis, & causæ ratione.

Facilior curatio hydropis est, cum pulmones occupat, quam cum serosus latex, extra eos effusus, in cavo thoracis hæret.

Saccatus vero, vel a polypis, aut aneurismate ortus hydrops pectoris insanabilis est.

Mali ominis sunt manus oedemate affectæ, sputa cruenta, aut subcruenta. Qui hæc exscreant, etsi medicamentis interdum levare videantur, sæpe inopinatò pereunt.

Nullum vidi hydrope pectoris laborantem, qui, si urinam copiosam naturali similem, aut pallidiorem emisisset, e morte evaserit.

Quodsi parum lotii profundius tincti excernatur, tum adhibitis diureticis largius fluat, mutato in melius colore, spes adest recuperandæ valetudinis. At ubi sub pharmacorum usu copia urinæ denuo decrescit, colorque ardentior evadit, quin manifesta hujus deprehendatur, actum est cum ægrotis.

Ad hydropem pectoris curandum varia adferuntur remedia. Nonnulli extractum nicotianæ commendant, sed inefficax hoc medicamentum reperi.

Arnicam, quâ Berolinenses (d) ante 60 fere

(d) Vol. X. p. 48.

annos in hydrope pectoris cum sputis rubellis utebantur, inefficacem quoque deprehendi.

Nonnunquam, ut ex superioribus constat, pulsus in hoc morbo subdurus est; imo durus, & plenus. Hocverò rerum statu, nihil venæ sectione perniciosius fieri potest.

Occurrebant Celeberrimo de Haen ægri, qui pulsum plenum exhibuerunt, licet corpus penè exsangue esset!

Vidi, cum sanguis, improbante me ac invito, extraheretur, ægrotos ad breve tempus levatos quidem; at iidem, ingravescente spirandi difficultate, paucis post diebus extincti sunt.

Hinc præclarum Celsi effatum est: sanguinem, incisâ venâ, mitti, novum non est: sed nullum pene morbum esse, in quo non mittatur, id novum est.

Quandoque hydropi pectoris, ut in Tractatu de inflammationibus monui, peripneumonia accedit. Cujus rei indicium præbent genarum rubor, pulsus durus, plenus, & fortis, dolor, aut oppressio pectoris, febris, sitis, tussis major, sputa glutinosa, aut purulentis similia.

Hæc cum adsunt, symptomati maxime urgenti occurrendum, & sanguis, neque tamen adeo largiter, ut in reliquis peripneumoniis, educendus est; tum decoctum ex radice polygalæ amaræ, althræ, liquiritiæ cum oxymelle simplici, & modico nîtro propinandum, ubi sputa coqui incipiunt; sed cum difficultate exscreantur, ad oxymel scilliticum, & refractam kermes mineralis dosin transeundum.

Lieutaud in hydrope pectoris leves kermes mineralis doses commendat, quibus sputa glutinosa, cum tussi inani occurrentia, dissolvi, & ad expectorandum apta reddi asserit; sed enim

kermes minerale spiritus angustias, tussimque irritam augere solet, itaque non convenit, nisi sputa purulenta simul pectus occupent, quod interdum accidit.

Sæpe tussis adest inanis, ab aquis proveniens; tum verò infausito consilio bechica dantur & oleosa, quæ laxando, fortasse & debilitando solida, morbum augent.

Certe hæc tussis nonnisi abactis aquis aut minuitur, aut tollitur.

Ill. de Haen minime parcendum ait purgantibus, sudoriferis, & diaphoreticis. Verum purgantia in majus discrimen adducunt agrum; sudorifera autem & diaphoretica propterea non conveniunt, quod ea anxietatem augent. Berolinenses testantur, funestum fuisse in hydrope pectoris sudorem arte excitatum.

Insomniis, & anxietatibus avertendis, male opiata adhibentur, cum somnum debitum conciliare non possint, & inter ejusmodi somnos arte factos, adeo angatur spiritus, ut suffocationi propinqui sint ægri, &, cum evigilant, tam fracti viribus, ut præ languore pene animam agant.

Morgagnius observavit, e scabie suppressa non rarò hydropem pectoris gigni. Hinc, cum in ejusmodi casu oppressio pectoris, & respirandi difficultas notatur, abstinendum est a phlebotomia, videndumque sedulo, an non malum jam fero in pectus præternaturaliter collecto originem debeat.

Cl. Richard (e) exemplum refert hydropis

(e) Richard de Hautefierck Recueil d'Observations de Médecine des Hôpitaux Militaires. T. II. p. 319.

pectoris, a scabie repulsa orti eademque revertente sanati. Possunt quidem hac in re prodesse camphora, flores sulphuris, antimonium, sed nihil his efficitur, nisi simul diuretica exhibeantur.

Unica fere in hydrope pectoris ad salutem via superest diuresis, ut longinqua experientia edoctus sum.

Pulveres vel mixtura e scillæ extracto confecta reliquis omnibus remediis palmam præripuere, v. g.

℞. Extr. scill. gr. j--jβ.

Sacchar. ʒ j,

Sumat secundâ, tertiâ, aut quartâ quâvis horâ ejusmodi pulverem.

Quandoque levis hæc dosis paucis ab ea sumta horis profuit, in aliis ad ij. imo iij. extracti scillæ grana ascendendum erat.

Si eventus voto non respondet, scillam in substantia ad ij---iij. grana pro dosi tentare licet. Ast raro juvat, ubi extractum scillæ non profuit.

Eodem, quo hæc scribo, tempore stupendum & subitum ab extracto scillæ effectum mecum vidit Spectabilis Schosulan Facultatis medica Decanus.

Accidit quandoque, ut extractum scillæ aquosum, uno in pharmacopolio confectum nullam prorsus vim exsereret, cum id ab alio pharmacopola petitum, eidem ægro copiosam urinam cie-
ret. Is, cum denuo ad priorem pharmacopœum rediret, vix quidquam lotii reddidit; ad alium vero denuo reversus, iterum copiosam urinam fudit.

An extractum ex vetusta marcida scilla paratum? an, ut facilius pulverisari possit, inspissando adustum fuit? an vero pharmacopœus aliud qualecunque substituit?

At cum plus scillæ, quam modò memini, præbetur, vomitus & ventriculi aut intestinorum inflammatio facile succedit.

Quod eo faciliùs fieri potest, cum in dissectis hydropicorum cadaveribus Listerus stomachum admodum extenuatum, ruboreque suffusum esse deprehenderit.

A purgantibus quidem hydrope pectoris laborantes læduntur, sed si alvus omnino consistat, at vires consent, terram foliatam tartari superioribus addere convenit.

℞. Extr. scill. gr. xvj.

Terr. fol. tart. dr. ij--iij.

Aquæ anis. unc. iv.

Syr. de duab. q. s.

Sumat alterâ, vel quartâ quâvis horâ cochlear.

Egregiam in hoc morbo vim habet terra foliata tartari, quæ aceti communis loco, e scillitico componitur.

Nonnulli extracto scillæ sumto, magnam salivæ copiam, velut a sumpto mercurio, sed absque faucium incommodo, felici eventu excreârunt. Nec mirum, si saliva uberiore egesta, leventur ægri, cum sit apud van der Monde, asciticum plurimis incassum remediis tentatis, hausto fumo tabaci, insignem salivæ copiam reddidisse, quæ tamdiu manaverat, donec abdomen detumuisset.

Si, adhibitishis remediis, intra paucum tempus vel urina non largius excernatur, aut si lautium quidem copiosius profluat, at spiritus ducendi labor, & anxietas non imminuatur, nihil quidquam profuturum est; nam tum hydrops saccatus est, & diuretica citius perimunt ægros.

Rara quidem felicitate, ruptis his tumoribus aquæ in tracheam ferri possunt, sed sæpiissime in thoracis cavum infortunatò defluunt.

Cum vires sunt imbecillæ, & pulsus debilis, inæqualis, præter pulveres, supra commemoratos, sequens interdum mixtura levamen fert.

℞. Spir. C. C. dr. β.

acet. scill. q. s. ad saturationem
adde

Aq. rutæ unc. iij.

Syrup. flor. tunic. unc. β.

Sumat, pro diversâ naturâ & symptomatum ratione, alterâ, vel quartâ quâvis horâ unc. β.

Hac methodo nonnullos hydrope pectoris affectos sanavi; in aliis morbum palliando id consequutus sum, ut anxietatibus fugatis placide, & non rarò subitò occumberent.

Nullum vini scillitici effectum salutarem vidi. Plurimi male inde afficiebantur; nonnulli peribant, quorum cadavera ventriculum, & intestina inflammata exhibuerunt. Quamvis respiratio liberior evadat, lotiumque uberius fluat, tamen extractum scillæ longiore tempore continuandum est ita, ut sensim dosis minuatur, & primum bis die, tum semel, dein altero, aut tertio quovis die pulvis scilliticus ægro præcipiatur.

Demum diversâ remedia nonnunquam propinanda sunt ad eradicandam mali causam ut uberius ex capite de ascita patebit.

Qui pectoris hydrope affecti sunt, etiam si ita valeant, ut sanati esse videri possint, decrescente, quod ante torosum erat, corpore aut in priorem morbum recidunt, aut ex improvviso intereunt. Schusterus, ut est in actis naturæ curiosorum, tribus hydropicis larga dosi scillam propinaverat, bono ut videbatur, eventu; sed omnes aliquanto post subitò extincti sunt.

Nonnullos agros tractandos habui, qui tussi inani, enormiter noctes, diesque vexabantur, nec

ulla ratione utrumvis in latus cubare poterant. Pulsus erat debilis, & celer, lotium modicum; spiritus tam agre ducebatur, ut suffocationi propinqui viderentur, nisi erecti in sedili ab adstantibus assiduè tenerentur. Ex quibus hydropem pulmonum arguebam; at cum remedia supra laudata nihil proficerent, ob irritam illam, & vix silentem tussim remedium ex emollientibus, & diureticis tentavi.

℞. Tarax. cum toto unc. ij.

Rad. alth. unc. j.

coque per quartam horæ partem
in aqua; adde

Flor. chamomill. dr. iij.

Scill. dr. j—j β.

Liquirit. unc. j.

stent per sex horas in digestionem

Colaturæ unc. xv. adde

Oxymell. scill.

Syrup. alth. aa. dr. vj.

Sumat alterâ vel tertiâ quâvis horâ dimidium vasculum.

Unus ingentem feri limpidi copiam tanta cum euphoria ejecit, ut per sex annos sanus, valensque superviveret, donec ileo ex hernia periret.

Alter anno integro dictum quotidie decoctum fumebat, eo cum levamine, ut & pedes circumire, & scalas ascendere fere absque molestia posset. Cum vero per diem abstinuisset, spirandi difficultas rediit, & urinæ profluvium diminuebatur; sumto iterum decocto mox symptomata levabantur; dein amicorum suasu ad alterius opem medici confugit, qui cum modo expectorantia, modo purgantia abhiberet, brevi omnia in pejus ruebant, nec diu æger, ad quem moribundum denuo vocabar, superfuit.

Feminæ item, hydrope pectoris, una & ulcerosis pedibus laboranti medicinam feci. Morbus erat vehementissimus; extracto scillæ dato, & largior urina excernebatur, & pedes non minus intra nycthemerum unam alteramve feri limpidi libram emittebant, quibus rebus integra sanitas perfecta fuit. Aliquot a morbo propulsato annis, gravi illa peripneumonia corripiebatur; cujus debellandæ causa bis largam sanguinis copiam educendam curavi. Neque hydrops rediit, nec sanitas illius in hunc usque diem tentata morbo fuit.

Aliam quoque ægram, eodem modo affectam, tractavi, quæ licet pedes plurimâ aquâ manarent, periit.

Neque sequens curatio prætereunda videtur.

Vir erat annos natus 40. obeso corpore, qui ex calculo ureterum dysuria laborabat, cui, quod inflammationem metuebam, venam aliquoties incidi jussi, tum decocta præbui, maxime emollientia.

Verum inde non levabatur æger; quamvis enim calor, & humorum orgasmus deficeret, remansit nihilominus dysuria, cui pedum quoque tumor accescit.

Tertio morbi die, livebat facies, pulsus vacillans & inæqualis tangebatur: frigebat corpus, & præ angustia spiritus moribundus videbatur. In tanto discrimine pulveres ex scillæ extracto confectos, modico nitro, & dimidio camphoræ grano addito, exhibui; quibus sumtis & copiosum lotium cum viscido sedimento, & calculos exiguos reddidit; unde respirandi facultas primum, dein integra valetudo emanavit.

Cum nulla quidquam remedia profunt, & aqua in alterutro pectoris cavo stagnat, paracen-

thesin tentandam esse, jam Petrus Salius, & Guido Patinus censuerunt. Si in cavo pericardii aqua hæret, pertundendum illud esse docent; si sub sterno accumulata sit lymphæ, perterebrationem commendant.

Verùm e superioribus constat, incertam esse diagnosin, nec raro contigit, ut paracenthesi instituta, pulmones adnati vulnerarentur, nullâ eductâ aquâ.

Sunt autem adeo frequenter pulmones adnati, ut Diemberbroeckius existimet, tertiæ id aut certe quartæ hominum parti accidere vulgo solere.

Riolanus, qui trepanationem laudat, tamen ei parum fidere censendus est, dum ait: dubia salus desperatione tutior; satius etiam est, anceps remedium experiri, quam nullum.

Morgagnius diutius expectandum esse putat, neque tam propere ad curandum hunc morbum adhibendam esse terebrationem sterni, & pericardii perforationem, cum ars nondum eo perfectionis progressa esse videatur, ut id certissime, & evidenter dignosci quear.

Cl. Olaus Acrel nihil auxilii in paracenthesi esse credit, nisi ipse exuberantis liquoris fons obturari possit. Cum verò aliqua felicitis exitus spes affulget, tum eam non eo, quo passim solent, loco, sed intra sextam, & septimam costam, ab ima factò computu, æquali inter sternum & vertebra intervallo instituendam esse cum Scharpio censet.

In hydrope pericardii Ill. Senac (f) frequenti methodo paracenthesin administrandam

(f) *Traité de la Structure du cœur* T. II. p. 365---66.

esse præcipit. Thorax in sinistro latere, inter tertiam, & quartam costam, duorum pollicum a sterni intervallo, acu cannulata ita pertundatur, ut apex oblique versus originem cartilaginis cruciformis, & proxime ad costas dirigatur; sic enim cavebitur, ne vel cor, vel pulmo, aut arteria lædatur.

Dum vires pene prostratæ sunt, abstinendum ab operatione.

At ubi manifesta fluctuatio observatur, jamque remedia omnia, quæ huic morbo accommodata habentur, incassum cecidère, institui paracenthesis denique poterit; si modo signa mortis nulla adsint, reliquæ corporis cavitates collecto hoc præter naturam seroso latice liberæ esse videantur, id quod in similibus e sententia Mackbride, rarissime accidit. (g) Quodsi inter paracenthesin ager non langueat, omnis uno tractu aqua educi poterit.

Scarificatio pedum, a nonnullis laudata in anasarca pulmonum plus utilitatis habere poterit, tumque præferenda videtur cortici mezerio, cum ab ejus applicatione pejora ulcera nascantur.

(g) *Systematische Einleitung in die Arznekunst. II.*
Ch. S. 942.

C A P U T V I I I .

D E

A S C I T A .

A Scites initio haud facile discernitur, cum vix ulla, aut levissima solum fluctuatio percipiatur; quin Duverney junior hanc ne pro vecto quidem morbo propter nimiam integumentorum densitatem & crassitiem semper animadverti testatur.

In actis academiae Parisinae, & apud de Haen (a) casus occurrunt, e quibus intelligi possit, quam facile viri caeteroquin exercitati fallantur.

Signa diversi hydropis abdominalis, itemque notas, quibus hic ab hydrope uteri, & ovariorum, denique a graviditate distinguitur, apud Ill. van Swieten, de Haen, & Røederer (b) reperiatis.

Multi causam proximam cujuscunque hydropis in viscerum, ac totius corporis laxitate collocant. Vogel multò verò similis in peculiari quodam vasorum arteriosorum, venosorum, aut lymphaticorum languore ponit, cum multi cachectici ab hoc morbo immunes sint, & plures hydrope saccato laborantes per longius tempus omnis cachexiae expertes vivant.

(a) T. IX.

(b) Elem. art. obst. p. 61.

Plurimæ sunt ascitæ causæ Primum plethora vasis nimium resistens. Hinc feminis post quinquagesimum annum, cum menstrua fluere desinunt, familiarior hic morbus.

Frigida deinde æstuantibus visceribus ingurgitata; id quod in messoribus, & iter facientibus observatur. Appiano teste, Antonii milites post longam præcipue vini inopiam, dum aqua se affatim replevisent, hydropicis, cœliacisque morbis laborare cœperunt.

Hinc, si æstu invalescente, sitis aquâ extinguere non possit, spirituosâ admiscenda sunt. Bontius quoque auctor est, mercatores per desertâ Arabiæ in Persiam aut Turciam iter agentes summis caloribus sitim hausto spiritu vini, aut vino fortissimo facile sedare, contra, si aquam bibant, in cachexiam & hydropem incidere.

Tumores item carnosî, steatomatosi & scirrhosi, venam cavam, aut viscera abdominalia comprimentes ascitam generant, etsi interdum gravissimi scirrhi absque eo reperti fuerint.

Multi quoque ex spirituosorum abusu hoc morbo laborant. Contra podagriel & potatores, si, cum spirituosâ antea usi essent, aquam solam deinde bibunt, hydropici evadunt.

Denique nimia solventia in inveteratis obstructionibus adhibita; intempestivus martialium usus in hypochondriacis; salivatio, sudor, purgatio intensior cum diætâ tenui in curandis venereis ascitam afferunt.

Verum inter præcipuas hydropis causas, uti Hoffmannus (c) observavit, animi est ægri-

tudo, atque anxietas referenda, cujus tanta est vis, ut omnem visceribus, fibrisque motoricibus vigorem, tonum, ac robur adimat, sanguinisque languidiorem circuitum, & excretionum suppressionem efficiat.

Hydropem & gravem esse morbum & paucis parcentem cum Hippocrates, tum experientia quotidiana docet. Universim tamen eo facilius curatur, quo plures in ægro vigent corporis functiones.

Pessima signa sunt: febris lenta, oris fœtor, hæmorrhagiæ, tabes increpescens, lethargus, purpureæ aut lividæ cutis efflorescentiæ, sitis intensa; sed inquirendum, utrum ista a victu sicco, aut calidis medicamentis, an ab ipso morbo oriantur.

Ubi post purgationes ascites augetur, vel cedens medicinæ denuo revertitur; plenus periculi est.

Malus quoque, qui subito crescit, quoniam vasa lymphatica rupta esse demonstrat. Negat id fieri Monroo, etsi innumeris exemplis comprobatum sit, vasa multò his majora humano in corpore rupta esse.

Celsus pro secundæ valetudinis indicio habet, si plus aquæ urinis excernitur, quam potu hausta sit; verum in pessimis quoque hydro-pibus plus interdum ægri mingunt, quam bibant, intumescente perpetuo abdomine.

Prodest diarrhæa aquosa, sub initium morbi adveniens; sed, uti Nic. Piso (d) notat, res in extremo sita est, cum infirmis viribus alvus fluere, ac velut concretus ex ea sanguis deji-

(d) Oper. med. p. 682.

cæpit, aut cum urina in diversis matulæ regionibus varios colores exhibet sic, ut infima rubescat, superior livida sit, aut contra.

Hippocrates periculosissimum pronuntiavit hydropem ægris, quibus alvus fluida, cum hanc cito mors subsequatur.

Ulcera asciticorum metum præbent gangræ-næ, quamvis ægri interdum sanati sint, si copiosum per ea serum eductum esset. Sed eventum tam felicem vix a diuturno morbo gravibusque symptomatibus stipato expectes.

Ubi in hydropicis causa cachexiæ detegî non potest, scirrhum in visceribus latentem suspicari licet, qui morbum prorsus insanabilem, observante Aræteo, efficit.

Ascites suppurationi internæ junctus fere lethalis est, neque tamen omnino desperandus. Memini ego, nec sine magna animi voluptate, viginti & amplius abhinc annis, in S. Leopoldi suburbio pistoris uxorem phthificam, quæ, dum uterum gereret, ascita gravissimo laborabat, adeo feliciter a me sanitati redditam, ut editis postea aliquot partibus sana in hunc usque diem & vegeta vivat.

Hippocrates (e) salutarem censet hydropem, qui maniæ accedit; sed multo id frequentius nullo prospero eventu observatur, cum hydrops in maniacis facile ex purgantibus drasticis, diæta tenui, & largioribus venæ sectionibus sæpius iteratis nascatur.

Baglivius auctor est, arthritidem, hydropi recenti supervenientem, eum tollere. Id forte

(e) Coac. & Aph. V. Sect. VIII.

tum accidere potest, cum ex arthritide sup-
pressa ascites oritur.

Difficilius plerumque curantur, multoque
facilius in eundem morbum recidunt excelsiore
statura homines, idque ob maiorem, uti Cl.
Grunner (f) notavit, solidorum inertiam atque
imbecillitatem.

Pessima in multorum animis insedit, eaque
præjudicata opinio, ascitam morbum esse laxæ
& inertis fibræ. Quare nullo discrimine facto
stimulantia, spirituosa, & calida remedia com-
mendant, quæ tamen adhibita tristes sæpe
exitus habuere.

Secundum Horstium & Sponium, largo potu,
fero lactis, & misso sanguine curandus quan-
doque est hydrops, qui aliis medicamentis
exasperatur.

A nonnullis vomitoria, ab Avicenna lau-
data in ascita commendantur, quæ, præcipue
si antimonialia sunt, suadent quoque Boer-
haave & Pringle in hydrope, post febres
exorto, ut omnia abdominis viscera concutian-
tur, & tremula gelatina fluidior, resorptionique
aptior reddatur. Sed tum vires oportet esse
firmas, integra viscera, & abesse dolores ab-
dominis, ne validis concussibus labefactata
viscera rumpantur. Testatur Lieutaud, ejus-
modi ægros animam inter vomendum exhalasse.
Hinc cum Gortero emeticum raro propinan-
dum censeo.

Cl. Sagar asserit, plures hydropicos, tartaro
emetico tertio quovis die mane dato, funditus
a se curatos esse, cum obstructionibus viscerum

(f) Semior. p. 510.

in morbo præsertim recenti, dum firmæ sunt vires, solvendis plus serviat unum emeticum centum dosibus purgantium; eâdem tamen paginâ (g) negat, se emeticum dedisse, ubi notabilis obstructio, aut induratio, unius alteriusve visceris observabatur,

Hydrope ovariorum incipiente tentandum emeticum foret, cum is, teste Percival, nonnunquam sponte orto vomitu curatus fuerit. Fortasse concusso abdomine serum per tubas Fallopianas, ovario adhærentes, ad uterum delatum, indeque egestum est.

Apud Bartholinum, Burnetum, & Willisium, exempla reperias ascitæ; vel spontaneo, vel medicamentis excitato sudore curati. Comes ab Ostermann, gravissime hydropicus largo admodum sudore pedum levabatur, qui deinceps continenter fluens eum per viginti annos liberum a morbi reditu servavit. Calceis propterea utebatur ita conformatis, ut defluus humor receptaculo quodam reciperetur, in quo sine ullo incommodo per aliquot horas permanere poterat. His successibus inducti medici sudorifera, pulverem Doweri, & alia stimulantia ac spirituosâ præbuerunt. Lieutaud (h) tamen non fidit sudoribus per medicamenta interna excitatis, plusque ab iis sperat, qui aere tepido, sudatoriis, balneis siccis, sale, arena, furfure, solis radiis, vel furno exprimuntur.

Damnant sudoriferorum usum Raymundus Fortis, Nicolaus Piso, Berolinenses (i) &

(g) Syst. morb. sympt. p. 163.

(h) p. 97.

(i) Vol. XVI. p. 33.

Fridericus Hoffmannus, (k) cum ascitici difficulter ad sudorem disponantur, & e regimine calido, atque volatilibus remediis febris major, metastasis ad partes vitales, suffocatio denique, aut affectiones soporosa sequantur. Præcipuè verò abdomine immaniter tumente fluidum, quod per vasa adhuc circumducitur, ante expelletur, quam diaphoretica in lympham, extra vasa stagnantem, agere valeant.

Multi curam ascitæ inchoant; purgantia drastica præbendo. At Ill. van Swieten parum a fortioribus purgantibus expectat, cum provectior est hydrops, aut difficiliore ejus causæ.

Vetat, nunquam satis celebrandus Sydenhamus infirmiore corporis habitu ægros, aut feminas vaporibus obnoxias validis purgantibus vexari, & latinissimus Celsus (l) perniciosas ait purgationes, quæ nimis valentibus pharmacis fiunt; hinc cibo, quam medicamentis molli alvum maluit.

Maxime obsunt drastica hydropi e nimis evacuationibus velut hæmorrhagiis, aut diarrhæis orto: vel ubi scirrhusa viscerum obstructions absunt; de his valet effatum Meadii; (m) quo plus humoris e corpore ejicitur, eo major ejus copia brevi in cavitates refluit.

Prodesse fortiora purgantia tum poterunt, cum ægri glutinosi humoribus abundant, cum farinaceis abusi sunt, aut loca inhabitant paludo-

(k) Med. syst. T. IV. Part. IV. p. 461.

(l) L. I. C. 3.

(m) Monit. med. C. VIII.

sa, ut nimirum aquis egestis minus ureteres comprimantur, viaque commodior diureticis remediis paretur. Sed hic cum vires ægri, tum febris ipsa considerata; illis labefactatis sæpe cum aquis animam reddidère ægri; hac intensiore facile e drasticis purgantibus inflammatio succedit.

Broklesby (n) fortissima in hydrope purgantia e jalappa & gummi guttæ præscribit; monet tamen, hæc doses militibus exercitatis potius, quam desidiosis urbium inquilinis convenire, nec continuandas purgationes esse, cum partes solidæ multum debilitatæ sunt.

Frequenter olim propinabatur gummi guttæ: Cl. Heuermann viginti tria grana cum helleboro nigro dedit, quæ dosis merito Lipsiensibus nimia videtur. Löfseke, Lindanus, & Trillerus infaustos hujus remedii fructus enumerant; Joannes Sitorus Mediolanensis (o) gummi guttæ usum in majore Xenodochio jam octo abhinc annis abolitum esse refert, cum securiora multò remedia in promptu sint.

Tum igitur conveniens solum videtur, cum integris visceribus, nec viribus nimium fractis humores abundant glutinosi atque tenaces; nam Hallerus observavit, injecto in venam gummi guttæ tenuem ex ano liquorem stillasse, sanguinemque mesentericis in venis solutum fuisse.

Decocto sequente cum fructu usus est Ill. Baldinger (p). Coquitur gummi guttæ aqua, sensim instillato oleo tartari, quod vim drasticam purgantem mitigat. Remotum ab igne atque re-

(n) p. 233.

(o) Miscell. Nat. Cur.

(p) Pharmacop. Edimb. p. 270:

frigeratum, si guttatim deinde præbeatur, per vias urinæ aquas evacuare solet, & largâ nonnunquam excretionem & criticâ.

Hydragoga quoque partitis vicibus exhibere consultum est, cum quibusdam etiam maiore dosi, sed semel duntaxat sumpta vix alvus moveatur, in aliis verò ex eadem hypercatharsis, aut alia gravia symptomata nascantur.

Si purgantia fortiora poscit morbus, pulveres, aut electuaria pilulis præferenda sunt; hæ etenim, cum primæ viæ nimium exsiccatae sunt, minus solvuntur.

Sequens electuarium cum strenuè purgat, tum inflammationis metum minorem injicit.

R̄. Roob ebul.

— junip. aa. unc. ij.

Oxymell. scill. unc. j.

Rad. jalap. unc. β.

Arcan. duplic. dr. ij.

Syr. de spina cervina q. s.

Ut fiat electuarium.

Sumat sæpius drachmam, donec purgetur.

Ubi resina v. g. jalappæ præscribitur, ea saccharo terenda, vel spiritu vini solvenda erit, ne ob tenacitatem tunicis intestinorum adhæreat. Commode item, teste van Swieten, aliquantulum aromatis additur, ut tormina arceantur.

Cum, sumto purgante resinoso, dolores existunt, ovum sorbibile, itemque, absente feбри, vinum hungaricum profuerit.

Quandoque post purgationes validiores contractis intestinis coercetur aer, unde spasmī oriuntur, & increfcens abdomen fere ut in tympanitide percussum resonat. Huic malo unctiões ex unguento calendulæ, oleo laurino, & camphora extra adhibitæ; intra opiata cum carminativis sumpta levamento sunt.

℞. Aq. menth. unc. ij.

Elix. stom. temp. dr. β.

Laud. liquid. Sydh. gutt. xiv.

Elæosacch. menth. dr. j.

Sumat omni dimidiâ horâ unciam dimidiam, donec symptomata remittant.

Interdum sumto drastico diarrhæa sequitur, vires atterens, & vitæ terminum accelerans. Artis erit prohibere, ne humores nimîâ vi in intestina irruant.

Si vires collapsæ sunt, pulsusque imbecillius micat, mixtura ex cortice peruviano, aqua menthæ, vino &c. si verò evacuationes urgeant, mixtura opiata mox memorata propinanda est.

Ubi sitis vehemens, & pulsus celerior, cautissimè cum opiatīs agendum. Quæ sequitur, mixtura magis convenit

℞. Cort. peruv. dr. vj.

Gum. arab. dr. ij.

Succ. catech. dr. j.

Aq. flor. rhœad. ℥ j.

Spirit. Vitriol. gutt. xvj.

Syrup. Diacodii q. s. ad gratiam.

Sumat singulis horis, aut alterâ quâvis horâ unciam unam.

Abstinentum ab acidis mineralibus, ubi majoribus ægri doloribus vexantur, ne intestina, muco abraço nudatiora, nimium irritentur.

Tenemus, aut acerbiora tormina decoctum salep, salicariam, & clysmata demulcentia poscunt.

Feliciùs ascites diureticis debellatur. Invenias quidem apud auctores exempla hydropicorum, pulvere Doweri, opio, aut semine sinapi devorato, vel etiam viridium genistæ summatum infuso sanatorum; sed sicut remedium, quod

ægris quibusdam nil profuerit, damnare haud convenit, ita ob unum alterumve successum magis prosperum idem non temerè & universim commendandum est.

Fatetur candidissimus Sydenhamus, se hydropem sæpius ope syrapi ex spina cervina parati sanasse; inde fiducia plane juvenili in animum induxisse, teneri à se medicinam, cuivis hydropi sanando aptam, ac sufficientem; sed paucis post hebdomadis erroris damnatum, cum feminae ex quartana hydropicæ eundem syrupum aucta dosi incassum, & nullo fructu præbuisset, quæ tamen alterius medici cura, aliisque medicamentis sanitati omnino restituta fuit.

Complures ante annos asciticum vidi, cui a peritissimo Archiatro Kessler optima remedia frustra adhibebantur. Demum, ut ne nihil agere medicus videretur, roob sambuci exhibuit, unde secuta copiosissima urinæ excretionem æger integrè convaluit.

Putat Lieutaud, conducere ascitis, lotii promovendi causâ, usum cantharidum, à quarta grani parte, ad granum unum aut alterum progrediendo. Quin & Dioscorides, & ante bina fere sæcula Ulricus Rumlerus cantharides hydropicis adhibuerunt. Ex ephemeridibus (q) quoque constat, in Hungaria adversus hydrophobiam exhibitas fuisse cantharides, sudore copioso, & urina absque omni dolore succedentibus; ego vero in hydrophobis, quibus cantharides adhibebantur, contrarium observavi. Galenus binorum casuum meminit, ubi cura cantharidibus infelicitè tentata est. Cl. Plenck (r) noxium

(q) Decad. I. Ann. 1617. observ. 113.

(r) Mat. med. p. 338.

earum usum internum vidit : Ill. Piquerius (s) a cantharidibus ad mentem Lieutaud præbitis urinam retineri potius, quam promoveri usu didicit. Ipse etiam Lieutaud, eâdem, qua cantharides laudat, pagina, (t) eas acerrimum medicamentum esse pronuntiat, & demulcentibus temperandum, quod sæpe stranguriam, aut mictum cruentum inducat. Hinc cum Cl. Ludwig (u) cantharidum usum dubium esse censeo, cum frequenter spasmodum urinæ viarum stimulo suo efficiat.

Eadem pessime nocerent strictioris fibræ hominibus; vel ubi humores nimium attenuati sunt, aut in putredinem abire occipiunt; tamen cum alia remedia nihil quidquam proficiunt, tentari queunt in ægris pastaceo habitu, qui farinaceis abusi, siti & calore carent.

Dum nuper, ascitico frigida temperiei ad nosocomium generale delato, qui apoplexia primum, dein paralyti dextri lateris correptus erat, eam ob rem tria vesicantia applicabantur, majus inde consecutum est urinæ profluvium, quam e remediis omnibus, quæ morbus postulare videbatur, exhibitis. Quæ dum continuarentur, ascitæ curatio feliciter effecta est.

Cum Meloe Proscarabæi Linn. mitius, ac cantharides agere videatur, eum in hydrope cum roob sambuci mistum tentavi, & aliquoties, cum successu exhibui.

Inter alios gravissimum asciticum intra biduum diuresi indefinente sanavi, in pluribus tamen optato successu carui, quinimo dolorifica inde,

(s) T. II. p. 208.

(t) P. 839.

(u) Therap. general. p. 133.

& parcior urinæ secretio, sitis, fauciumque ariditas consecuta, demulcentibus, & mucilaginosiss adjuvanda fuit.

Nec commendari multum millepedes merentur, qui, uti (x) Cartheuser in vestigando observavit, præter plurimas inertes, teneras, & mucilaginosas partes principio salino, nec fixo alcalino, neque nitroso, sed nonnihil volatili urinoso constant, quod admixto vino rhenano, aut austriaco penitus destruitur, & in sal neutrum ammoniacale, nullius, ob exiguam sane quantitatem, præcipuæ virtutis, convertitur. Succo etiam multo vilior est pulvis e siccatis & contritis millepedibus paratus, neque ad solvendam crassiorem pituitam valet.

Nitrum, quod in remediis urinam pellentibus censetur, non convenit ascitis, quibus laxior habitus, humores nimium soluti, & vires ventriculi depressæ sunt.

Omnibus diureticis longe scilla antecellit, quæ & rubra, & alba est; illam efficaciorē reperit Ludwig. (y)

Præfertur radix exsiccata, cum decoctum recentis ob ingratum, & nausææ plenum odorem ægri respuant, & succus e recenti commodè exprimi nequeat, quamvis tunicæ succulentæ cum aquâ vel aceto diu terantur. Jubet vir supra laudatus, tunicas discerptas in pastam farinaceam impingere, ut subito exsiccantur, cum sic integris viribus diu conservari possint; sed mihi leni solis aut clibani calore exsiccatae præplacent, cum multæ priore illo modo vires pereant.

(x) P. 102.

(y) Advers. med. pract. Vol. II. P. IV. p. 700.

Monet Cl. Cartheuser, pulverem contusum, etiam in vasis probe clausis conservatum, efficaciam semper aliquid amittere; quare satius ducit, recenter contuso pulvere uti. Ad extractum tamen parandum scilla recens præferenda videtur.

Scillæ dosis ægris & symptomatibus accommodanda est.

Van Swieten eam probat, e qua levis sequitur nausea; tum enim certus erat de diuresi futura; si verò vel vomerent ægri, vel nullam omnino nauseam sentirent, non tanta secernebatur urinæ copia.

Ego tum efficacissimam sensi, cum nulla ægros nausea vexaret.

Oxymell scilliticum largius propinatum urinam movet; convenit ægris strictiore habitu, quorum pulsus celerior est, aut sitis intensior; prodest præcipuè, cum ascites ab obstructione hepatis, hæmorrhoidibus suppressis, aut febribus citò nimis profligatis ortus est.

Quandoque mobiliori systemate nervorum præditi mellita non ferunt, sed inde spasmodicis affectibus corripuntur; iis oxymellis scillitici loco syrupus scilliticus N. 22. propinandus est.

Varia tamen ad causam morbi impugnandam scillæ adjungenda sunt, ut ex sequentibus patebit.

Ubi fibra laxa, corpus pallidum, humores glutinosi, vinum scilliticum N. 23. commendatur. Incipiendum a minore dosi, ne subsequatur vomitus.

Ex numerosissimis asciticis vix unum, alterumve scillitico vino curatum vidi. Minore copiâ datum, vix letum prolicuit: paullo largius haustum vomitus & abdominis dolores ciebat, appetitumque delebat.

Maxima medendi vis extracto scillæ aquoso inest, quod in pulveribus, vel in mixturâ ab uno grano ad iij. ascendendo pro dosi præbetur.

Rarius ab extracto, quam oxymelle scillitico anxietates nascuntur.

Interdum nil proficiente extracto, scilla in substantia à gr. j. ad. iij. pro dosi data fuit.

Mead eam ad ϑ β . exhibendam vult; sed inde vomitum, dolores abdominis immanes, mortem denique ipsam subsecutam vidi. Cadavera renes immunes, at ventriculum, & intestina inflammata, & gangrænæ corrupta exhibebant.

Cl. Mead haud sequendo consilio scillæ radicem ari jungit, namque hæc masticata fauces urit, & sitim generat vix extinguendam. Nitrum passim scillæ additum inconueniens est, ubi alvus laxior, aut leucophlegmaticum frigidumve corpus, aut vires infirmæ. Multo rectius ac felicius hic granum camphoræ dimidium cuilibet pulveri scillitico admiscueris.

Ubi a scilla sumta ructus, statusque ægrum vexant, uncia dimidia aquæ menthæ post quamlibet ejus dosim levamen adfert.

Vires ventriculi scilla debilitatas cortice firmare juxta laudati superius Tissoti mentem (z) oportet. Minus recte Ludwig purgantia scillæ jungi vult; optato toties successu caruit scilla, quoties crebriores inde purgationes secutæ sunt.

Cum magni seu ventriculi, sive intestinorum dolores à scilla sumta observantur, desistendum ab ea, & ad demulcentia velut decoctum salep confugiendum est.

Pessimè consulunt ægro, qui ob tormina exci-

tata laudanum addunt; mittigatis enim doloribus fallitur medicus, cum interea, dum scillæ usus continuatur, gangræna succedat.

Optime animadvertit Bergius, minus congruentem esse scillam ardente urina, pulsu indurescente, hepateque infarcto, nec multum ab hoc pharmaco expectandum, si non tantum in solidis roboris supersit, quantum ad evehendas urina aquas requiritur.

Ubi à scilla lotii loco sudores profusi & viscerum moventur, levantur quidem ægri, sed malum recrudescit, & in anasarcam aut reliquas hydropis species abit. Hic scillâ abstinendum monet Ludwig, cum inde solida nimium laxentur, corpusque eo citius ac cachexiam disponatur.

Si ægri nullo prorsus modo scillam ferre possunt, propinare oxymel colchicum ex re erit, cum nullam, testante supralaudato Ludwig, (aa) in nostris pratis invenire sit plantam, quæ cum scilla ita, uti colchicum comparari possit.

Sæpius hoc remedium ascitis, sed frustra exhibui. Claræ memoriæ Henricus Collin, qui principio oxymel colchici, pro efficacissimo hydropis remedio habuit, dein ad extractum lactucæ virosæ confugit.

Sunt tamen viri fide dignissimi, qui effectus prorsus salutare hujusce oxymellis in ascita observatos fuisse testentur. Ita Vogel hydropem peritonæi stupendum oxymelle colchici sanavit; quin duplo majorem ejusdem e radice parati dosin, quam Ill. Störck præceperat, cochleari majori manè & vesperi offerebat.

Si post purgantia aut diuretica, id quod rarius

accidit, aquæ subito evacuentur, abdomen fasciis constringendum est, ne humores in partem minus resistentem lethali impetu irruant.

Platnerus testatur, ægros, qui eductis per evacuantia omnibus aquis, consanuisse videbantur, brevi post apoplexia extinctos fuisse.

Ceterum his roborantia ex amaricantibus, cortice peruviano & limatura martis N. 24. & 25. maxime congruunt. Corpus, morbo superato, satis roboratum esse, id juxta van Swieten indicio fuerit, si calor per totum corpus æquabilis diffunditur, si nulla ejus pars ab ingesto potu tumet, si denique in illis, quæ epidermidi subjacent, partibus, velut in labiis & gingivis vividus color ac rubicundus enitet.

In multis ascitis morbus neque purgantibus, neque diureticis tollitur, aut, qui sublatus videbatur, brevi redit, nisi talia simul exhibeantur, quæ in causam morbi agunt, ad quam eradicandam variis opus est remediis.

In ascita post nimias evacuationes v. g. diarrhæam aut hæmorrhagiam moderatus corporis motus, si vires ferant; tum frictiones & roborantia cum amaricantibus, ut absynthio, cortice peruviano, aut limatura martis peropportuna fuerint.

Addi his lenia aromatica, ut calamus aromaticus &c.: possunt, tum ad gratiam conciliandam, tum ad motum humorum aliquantum augendum. Absynthium ponticum vulgari præponitur, quod magis aromaticum sit, & amaritie minus displiceat.

Quandoque in hydrope à nimio hæmorrhoidum fluxu latent viscerum obstructions; tum martialia, quibus ægri admodum anguntur, inconvenientia forent, sed amaricantibus, interposito

rheo, & si vires nimium fractæ sint, cortice utendum.

Ascitici ex obstructione hepatis aut lienis potissimum tussicula inani laborant; alvus tardior est, color faciei in flavescentem aut luridum vergit, ægri alimentis anguntur, & urina flavescit; febres sæpius præcessere intermittentes vel præmature cortice profligatæ, vel ultra tempus relictæ, præcipuè cum ægri paludosis in locis habitârunt.

In iis, qui strictiore sunt habitu, ubi pulsus celerior, major sitis, & urina rufa cum crasso sedimento deprehenditur, cremorè tartari purgandum est corpus, dein decoctum taraxaci, saponariæ cum salibus mediis, & multo oxymelle scillitico locum habet. Dosis determinant ægri vires, alvi tarditas, & urinæ profluvium; sed calida stimulantia, imò & amaricantia obsunt.

Quibus ex obstructione viscerum natus est hydrops, qui pastaceo sunt habitu, pulsu tardo, & corpore tactu frigidior, iis, cum vires ferunt, lenia purgantia ex rheo cum sale medio primum præbenda sunt, ne a solventibus nimium angantur, dein ad amaricantia & incidentia transeundum; interposito extracto scillæ, si urina parcius fluat,

R. Absynth. pont.

Trifol. fibrin.

Calam. arom. ʒa. unc. j.

infunde per 20 horas vino austriaco generoso. Colaturæ unc. xv. adde

Salis tart. dr. j β.---ij.

Syr. kermes. unc. j. β.

Ubi alvus magis lenta, syrupo kermes ille de spina cervina substitui debet. Quibus item vinosa displicent, iis infusum aquosum ex prædictis addita solum minori salis tartari dosi conveniet.

Celeb. Pringle in hydrope alcalina cum infuso amaro commendavit, quibus spiritum juniperi addit, quem, cum viscera abdominis obstructa sunt, minùs congruere puto.

Garden olim cineres tabaci laudavit, quos nuper Franklin quoque Luteriæ celebravit, quamquam nihil hi præ aliis cineribus salem alcalinum fixum vegetabilem largientibus, peculiare habere videantur.

In actis Hafnienſibus aſſeritur, alcalina non profuisse in hydrope, nos prosperrimos prædicti infusi successus in Nosocomio experti sumus.

Tum alcalina nocent, cum humoribus solutis febris, aut sitis urget, vel cum maculis corpus fœdatur.

Laudatur in obstructione hepatis chelidonium majus, quo Poloni adversus hydropem utuntur, e nimio ardentium spirituum usu pro-
genitum.

Propinantur exsiccatae radices duæ, recentis quinque aut sex drachmæ. Lange chelidonii extractum vinosum ad ʒ ij. mire profuisse narrat in obstructione viscerum abdominalium, & pulmonum infarctu. Ego sequentem mixturam quandoque felici, sæpe nullo successu exhibui.

℞. Extr. chelid. maj. dr. j.

Liq. terr. fol. tart. unc. β.

Oxymel. scillit.

Syrup. de duab. aa. unc. j. β.

Aq. anis. unc. iv.

Sumat tertiâ aut quartâ quâvis horâ unciam unam.

Dosis, pro diversitate agrorum aut symptomatum vel augenda, vel minuenda est.

Lysons laudat calomel ad gr. v. cum purgantibus in ascita ubi hepar obstructum est. Theodorus

de Mayerne (bb) olim mercurium dulcem exhibuit : ego, cum idem experirer, non multum profeci.

Forte locum habere possit malo incipiente, at certe obest provecto, jam collapsis viribus, & humoribus solutis. Ultimo bello italico, hydro-picis militibus mercurius dulcis sed infâusto sane eventu præbebatur. Löseke mercurialia non prodesse putat, nisi e lue venereâ perperam curata hydrops exstiterit; sed & tum magnâ opus fuerit circumspeditione, cum ex mercurii quoque abusu hic morbus generetur.

Forestus icterum in hydropem abeuntem decocto aut succo marrubii albi sanavit. Vix quaquam huic remedio peculiaris inesse vis videtur; sed cum artis præscriptis non repugnet, tentari potest.

Oritur ascites quoque e febribus autumnalibus præpropere depulsis, sed frequentius ab iisdem diutius relictis, aut crebriore alvi purgatione. Hinc merito Werlhoff ineptam in febribus purgationem cachexiæ & hydropis matrem esse dixit.

Ejusmodi ægris hoc electuarium salutis fuit.

℞. Cort. peruv. pulveris. dr. vj.

Calam. arom. dr. iij.

Oxymell. scillit.

Syrup. de duab. aa. q. s. ut fiat. electuarium.

Sumat alterâ, aut tertiâ quâvis horâ drachmam unam.

Apud frigidiores, qui farrinaceis aut leguminosis abusi sunt, vel loca inhabitant humida atque depressa, calamo aromatico feliciter theriaca diateffaron substituitur.

Ubi sæpius in idem malum jam æger recidit,

& ad minimum corporis motum glutinoso sudore diffluit, cortex cum marte proderit, si nullæ viscerum obstructions adsint.

Sollicitè inquirendum, an non quartana lateat, quæ nisi fugetur, hydrops non tollitur; hinc cortex largissimâ quantitate cum amaricantibus indicatur. Sequens remedium insignem vim habuit.

℞. Cort. peruv. selectif. pulveris. unc. j.

Rad. gentian.

Flor. sal. amon. mart. aa. dr. j.

Oxymell. scill.

Syrup. de duab. aa. q. s. ut fiat electuarium molle.

Sumat tertiâ quâvis horâ drachmas duas.

Si ægri loca incolant paludosa, vel in aere nebuloso degant, addenda huic electuario erit drachma una radicis serpentariæ.

Post quamlibet dosim corticis hauriendum est infusum amarum; secus is diu in primis viis insolubilishærebit, teste Percival.

Idem in subtilissimum pulverem redigendus est, sic enim, teste Celeb. Bergio, nullam stomacho molestiam creat.

Qui febri profligatâ, & viribus invalescentibus perstat hydrops, infuso aquoso aut vinoso ex amaricantibus, juncto sale tartari tollendus est.

Triplicis generis est vinum austriacum; primum leve, quod nec acre, nec admodum acidum in campestribus crescit: alterum acre & diureticum collibus innascitur: tertium valde adultum & defæcatum, quod olei instar mite, sed valde spirituosum est, & vix lotium pellit.

Rarius à menstruis oppressis ascites oritur; quod ubi accidit, si ægra plethorica est, si viribus valet, si recens morbus cœpit, venæ sectio indicatur, jam à Galeno commendata.

Intempestiva enim sanguinis missio, teste Tral-
liano, in aliis periculum, in hydropico autem
mortem inducit.

Fallax plethoræ signum venæ sunt magnæ,
& inflatæ, pluribus alioquin ascitis familiares.

A venâ sectâ mixtura præbenda est ex roob
sambuci & ebuli, oxymelle scillitico, & salibus
mediis.

Ubi ex pallido flavescentis est corporis habitus,
urina mucosa, vel ubi chlorosis præcessit, pilulæ
tonicæ Baccheri, aut sequentes servient.

R. Extr. trifol. fibrin. unc. β.

Gum. ammon. dr. ij.

Extr. myrrh. aquos. dr. j.

Extr. halleb. nigr.

Mafs. pilul. Ruf. aa. dr. β.

F. pilulæ gr. iij.

Sumat ter per diem quatuor aut sex, non
neglectis amaricantibus, scilliticis, atque fric-
tionibus.

Frictiones multis profunt ascitis, sed leniores,
uti Celsus monet. Eas, oleo amygdalarum adhibito,
fieri Raymundus Fortis (cc) voluit, ac nuper
iterum Ill. Störck. Non sine fructu aliquantum
spiritus cornu cervi admiscetur, verum abstinere
a frictione oportebit, cum abdomen immanius
tumet, cum dolet tactu, & cutis nimium te-
nera est.

Si aquæ nulla ratione educi queunt, paracen-
thesis instituenda est. Extant exempla hydropum
periculosissimorum, hoc modo sanatorum.

Neque tamen citò nimis tentanda ea est, ne
partes peritonæo adjacentes lædantur; neque serius

etiam, nè viscera nimium ab aqua arrodantur;

Valet hic præceptum supradicti Fortis Leopoldi Augusti archiatri (dd) : paracenthesis tum facienda est, cum vires valent, cum morbus est recens neque multâ æger feбри laborat; cum neque in visceribus scirrhus hæret, neque eadem aquis corrupta sunt; tamen, morbo jam provecto & obstructis visceribus, instituenda etiam atque repetenda nonnunquam erit, ut enormis anxietas, & metus suffocationis dematur. Sunt, qui in hydrope cystico & peritonæali aquarum educationem damnent; sed fallit persæpe horum diagnosis.

Imo idonea sane paracenthesis erit, cum cysticus hydrops, & ascites adesse videbuntur, ut, aquaeducta, faccus majore libertate gaudeat.

Ast ubi abdomen dolet, non quod aquis distentum sit, sed quod corrosionis sensum præbeat, aut ubi ascites ex vomitu cruento natus est, eadem operatio mortem acceleraret.

Potest in utroque latere paracenthesis suscipi; cum tamen scirrhus magnus, aut venæ curaneæ varicosæ deprehenduntur, in opposito id tentasse præstabit, quod & æger, & circumstantes facile hæmorrhagia terreantur.

Si uno in latere minor, quam in altero fluctuatio observatur, signum id visceris indurati est in hoc latentis. Color faciei flavus ut plurimum hepar affectum; lividus aut plumbeus splenem obstructum indicio prodit.

In ascita sæpius viscera mole majora & indurata sunt; quare cavendum, ne acu lædantur, quod Schmuckero, id candide fatenti, accidit.

Si pervires licet, uno ductu aquæ extrahendæ sunt, quod, relictâ in vulnere cânnula, uti van Swieten observavit, in ejus ambitu inflammatio nascatur, vel eâ ablatâ vulnus brevi concreseat, aut certe ita contrahatur, ut sine vi denuò inferi non possit.

Interea, dum aquæ effluunt, debili agro vinum vel jusculum propinandum: at si inde non levetur, ab ulteriore feri emissionē desistendum est.

Feliciorem prognosin præbent aquæeductæ, cum citri colorem præferunt, cum submucilaginosæ & subsalsæ, urinam redolent; quò magis ab hisce indiciis discrepant, eò gravius periculum minantur, uti Duverney observavit.

Hoc statu morbi tam ancipiti, aquæ loco nonnumquam tremula in abdomine gelatina continetur, quæ nullo modo per ampliorem cânnulam exit. Tum vero vulnus dilatare, & eductis aquis detergentia, & antiseptica injicere licet.

Ut ne aquæ redirent, Angli injectiones adstringentes & roborantes ex aqua Bristolensi, & vino rubro tentavêre; sed ægra inter injiciendum gravissimis symptomatibus corripiebatur, & quamvis convaluerit, parum tamen à verâ morte absuit.

Non numquam post paracenthesin magna respirationis difficultas subsequitur, à flatibus orta, cum intestina debilitata haud amplius aquis comprimuntur. Ubi ea, carminativis exhibitis, diutius remanet, plerumque hydrops pectoris accedit.

Cavendum, ne, sero educto, nimium comprimatur abdomen.

Si ager post paracenthesin fractis est viribus, pulsuque celeriore, cortex præbendus.

Nuper in binis feminis asciticis paracenthesi instituta loco aquæ materia purulenta gelatinosa effluxit, cortice dato, utraque integre convaleuit.

Si sitis urget, acidi mineralis quidpiam addendum : si vero pulsus debilis, parvus, ac tardus animadvertitur, mixtura e spiritu Mindereri & cornu cervi succinato locum habet.

℞. Aq. menth. unc. iv.

Spirit. Minder. unc. β.

---- Cornu Cervi succin. gutt. xxx.

Syrup. kermes. dr. vj.

Viribus post paracenthesin invalescentibus, ejusmodi remedia adhibenda erunt, quæ causam hydropis expugnent. Rarius per umbilicum aquæ sibi viam atque exitum quærunt; quod cum fit, levando ægrum, nihil medicamenti turbandum.

Contra vero ubi umbilicus tumet, aut prominet, integumenta que tenuia sunt, lanceolâ is aperiri potest.

Genitalibus tumescentibus prodest vinum rubrum cum herbis aromaticis & aquâ calcis : N. 26.

Adhibentur quoque sacculi farina, herbis aromaticis in pulverem redactis, & modico sale, qui decrepitaverat, referti. Quodsi partes excoriatæ sint, madidæque, tum sal sacculo contentus solvitur, ac rodendo sævos dolores ciet.

Labia gravidarum tumentia, partumque impediencia scarificanda sunt.

Cum pedes adeo intumescere, ut metuendum sit, ne cutis disrumpatur, profuerit sane, eos incidere, quod potissimum ulcera succedunt, discerptæ cutis vulnere multò benigniora.

Damnantur à de Haen & Haffnienſibus (ee) ſcarificationes, propterea quod perſæpe gangrænam produxerint. Non tamen omnino rejiciendas eſſe puto, cum in aperto ſit, lympham extravasatam quandoque reſorberi, & per diverſas partes extra corpus ferri. Inciſiones neque longæ admodum, neque nimis profundè inſtituantur, atque etiam cum recte ac probe ſiunt, illico adhibitis cum internis tum externis medicamentis, gangrænæ obviandum eſt.

Perniciem ſummam tum afferunt inciſiones, cum lividis pedes maculis ſqualent.

Cavendum etiam, ne hujusmodi maculæ pro ſcorbuticis habeantur, & acriora idcirco remedia veluti naſturtium &c. porrigantur.

Supereſt, ut de iis quoque breviter agam, quæ apud quosdam ſingularem in curando hydrope laudem adepta ſunt. Clyſmata ex urina vaccarum, aſinorum vanâdeprehendit de Haen.

Gratiolam quandoque aſciticis proſuiſſe teſtatur Duverney (ff). Ejus extracto nullus ciebatur vomitus, ſed copioſum urinæ profluvium ſequèbatur; ſpirituolum plus purgavit, quam aquolum: plus item illud, quod ex foliis, quam quod ex radice conticiebatur.

Wratiſlavienſes atro gratiolam carbone notaverunt: ego ante complures annos fruſtra fui, cum eam exhiberem. Nuper in Noſocomiis Vienneniſibus ſelici, uti referunt, eventu, propinabatur. Tentari igitur poterit in ægris frigidis ac glutinoſis, ubi nulla viſcerum labes, nullus inflammationis metus, nulla denique corporis

(ee) Ann. 1671. Obſerv. 104.

(ff) Ann. 1703.

extenuatio observatur, cum Bergius (gg) observaverit, gratiolâ sæno immixtâ equos emaciari.

Succus iridis nostratis (hh) à Linnæo specificus habetur, & perquam hydropicis salutaris, cum quandoque ventriculum subvertat, alvum dejiciat, & urinam urgeat.

Jeremias Loffius aliquoties anasarca laborantes iridis nostratis succo à se curatos atque sanatos fuisse ait; addit tamen eam continuis purgationibus morrem accelerare.

Observavit Josephus Baader (ii) quo præceptore olim, & amico in paucis caro utebar, e plurimis asciticis vix unum aliquem evasisse, qui succum hunc sumserint; sequebantur enim, uti ipsemet coram spectavi, ardor, dolorque œsophagi, ventriculi & intestinorum; tum tormina, vomitus, ac fræquens desidendi conatus absque notabili evacuatione alvi; febre denique & inflammatione accedente, plurimos inter cruciatus miseri animam exhalarunt.

Laudat Duverney junior in ascita cum anasarca asarum; alii oxymel ejusdem, sed hoc triginta abhinc annis frustra præbui.

Nocent crySTALLI lunæ, quas ab aygrta olim propinatas vidi.

Quidam corticem medium sambuci, turpethum vegetabile & radicem bryoniæ laudant, sed hæc omnia, uti Francofurtenses docuerunt (kk) ventriculum & intestina arrodendo graviter lædunt, tonum eorundem debilitant, & vasa lymphatica eo adducunt, ut facile rum-

(gg) Mat. med. T. I. p. 26.

(hh) Crantz T. II. p. 177.

(ii) Observ. med. p. 86.

(kk) Select. med. T. II. p. 305.

pantur. Quin imo externa unguenta e validioribus cathartice confecta abdomini tutò adplicari negat Sydenhamus, cum iis quandoque hypercatharsis excitetur, nulla remediorum ope inhibendâ.

Decoctum corticis ebuli, uti Broklesby (II) refert, cum reliqua remedia fallerent, vomitum, alvum, & urinam movit. Sed ex ejusmodi effectis patet, remedium esse drasticum, cautè & cum circumspèctione adhibendum Præstat, ut ex præcedentibus liquet, & Trallianus præcipit, paullatim, & absque periculo evacuare, quam festinando nimium cum morbo ægrum quoque tollere.

Mayerne (mm) alumen commendat, propterea quod urinam magnopere moveat, sitim restinguat, putredinem arceat, & tonum viscerum, innoxie ea adstringendo, restituat. Itaque absque metu tentari poterit, ubi tenuitate humores peccant, quia alvus quoque alumine movetur.

Ante paucos menses in nosocomio tribus colica pictonum affectis post adhibita incassum diversa remedia, alumen cum gummi arabico optato adeò eventu exhibuimus, ut post sex vel septem doses sumptas alvus solveretur & tormina disparerent.

Sæpius extractum lactuæ virosæ, in hydrope sed frustra propinatum vidi, cui pharmacopœi sonchum oleraceum nonnunquam substituunt.

Qui huic remedio favent, ut ejus famam tueri possent, magnam extracti scillæ dosin eidem admiscuerunt.

(II) P. 277.

(mm) Prax. med. p. 382.

Menghinus (nn) compluribus ægris dimidiam minimum unciam cremoris tartari per diem exhibuit, idque tam diu continuavit, usque dum largiter urina proflueret.

Cum ad solvendum tartarum magnâ aquæ copiâ opus sit, admiscenda erit sexta, vel septima pars boracis, unde, salvo acore, tartarus faciliè in aquâ solvitur. Tali modo propinatus mirum quantum in ascita profuit ab obstructione viscerum orto, quam sitis quoque, & pulsus celerior comitabantur; ut iteratis experimentis in nosocomio vidimus. Frustra hos à solo cremore tartari successus expectaveris; utriusque enim eventus certa & indubitata vidimus in Nosocomio nostro argumenta.

Ubi vero vires languent, ubi soluti humores sunt, aut aquarum colluvie laxata omnia, cremor tartari, & quæcumque relaxant, medicamenta, teste Ludwig, (oo) non congruunt.

Laudantur in ascita pilulæ tonicæ Baccheri, quarum confectionem Cl. Richard publici juris fecit. Constant extracto radicis hellebori nigri, quod radicibus prius spiritu vini alcoholisato maceratis, postea rhenano optimæ notæ vino digestis paratur. Post hæc, extractum aqua solutum rursus inspissatur, additâque spiritus vini optimi tantilla quantitate consistere cogitur. Hujus unciae uni additur tantumdem extracti myrrhæ aquosi cum scrupulis decem pulveris cardui benedicti, ut massa efficiatur libero aere ficcanda, & in pilulas grani dimidii conformanda.

Præbuit auctor decem pilulas aliquoties de

(nn) Act. Bonon.

(oo) Adv. Vol. III. P. II. p. 337.

die quandoque ad quindecim, imo viginti progressus est.

Post quamlibet dosim jusculum exhibuit; nonnumquam longiore intervallo temporis cessavit: in corporibus stricte fribâ multum commendavit largos potus alterantes, ut decoctum taraxaci, &c.

Recte animadvertit Baccherus, quod malo consilio asciricis omnibus olim inculcatum fuerit, ut potu abstinerent.

Baptista Montanus multa jubet, sed aperienti, bibere eos, qui maxime obstructi essent.

Boerhaavius, calidis cæteroquin in hydrope remediis favens, ea tamen rejicit, ubi sitis cum febre urget, & succum citrinum, acetosam lactucam cum cremore tartari præscribit.

Si pilulæ Baccheri nauseam & vomituritionem excitant, dosin minuendam auctor præcipit, atque aromatica, vinum hispanum, aut burgundicum, clysmata denique & quandoque à pilulis abstinendam suadet.

Multum emolumenti ab alvi purgatione & diuresi expectatur; ego autem duriores saepe alvum eo tempore, quo his pilulis agri sunt usi, observaveram.

Nocent, ubi præter febrem siccitas major, & sitis adest, foetentque urinæ; quandoque profunt in solidorum debilitate, & enatâ inde fluidorum spissitate, ut in hydrope post quartanas, post evacuationes nimias, aut animi pathemata. Multum quoque prudentiæ ad dosin statuendam, tempusque eas præbendi designandum requiritur. Multi maniaci ritè antea purgati ab expertissimo Nosocomii physico de Vigiliis ope pilularum tonicarum Baccheri curati fuerunt.

Nos ab infuso hellebori cum amaricantibus, vel etiam ab extracto, jam à Brunnero adversus hydropem commendato, plus opis adferri ægris, quam à pilulis in Nosocomio vidimus, ubi ascites ex obstructis visceribus, aut nimium glutinosi humoribus existit.

℞. Absynt. pont.

Saponar. aa unc. j.

Rad. helleb. nigr. dr. β —j.

Coque per quartam horæ partem in aqua fontis q. s.

Colaturæ ℥ j. adde.

Oxymell. scill.

Syrup. de duab. aa unc. j.

Sumat alterâ aut tertiâ quâvis horâ unciam unam.

Videndum, ne helleborus viridis Linn. helleboro nigro substituitur.

Si urina parcius profluat, præter memoratum decoctum, extractum scillæ in usum vocandum est.

In laxis corporibus, dum lentore peccant humores, egestis antea per diuresim, aut alvum aquis, egregiam vim habet tinctura martis helleborata. N. 27.



CAPUT IX.

DE

VOMITU CRUENTO.

Parum interesse existimo ad hujus morbi curationem, pluribus verbis differere, quænam ejus sit origo, utrùmne ex ipsis ventriculi, an è lienis, aut hepatis vasis seu debilitatis, seu ruptis, seu arrosis excernatur.

Vidit Hoffmannus in dissecto cadavere hominis, vomitu sanguinis extincti vasa brevia nigro colore fœda, ac disrupta; & in ventriculi cavo, uti & in intestino ileo liquamen nigrum ac fœtidumprehendit. At, cum alterius, eodem morbo sublati cadaver Ill. van Swieten aperuisset, visceraque abdominalia omnia sollicitè & accuratè lustrasset, neque vas ruptum ullum detegere, neque insignem aliquem ullo in viscere labem notare potuit.

Quidam dubitant, utrùm ex liene per vasa brevia sanguis ad ventriculum feratur; at alii cum Dodonæo observarunt, lienem ante vomitum sanguinis intumuisse, detumuisse post vomitum.

Nec verò sanguis grumofus vomendo ejicitur tandem, sed massæ quoque membranacæ, & cellularis in intervallis coagulato sanguine redundat, quæ concretionibus polyposis quam simillimæ sunt (a).

(a) Ludwig advers. med. pract. T. I. P. I. p. 173.

Frequenter hic morbus ab hæmorrhoidibus, & menstuis suppressis, validioribus obstructiōnibus, aut scirrho ventriculi, hepatis, lienis; denique ab atrabile oritur, præcipue si corpus atrabilariorum irâ excandescat. In infantibus, animadvertente Vogel, quandoque ex vehementi capitis aut ventris compressione in partu nascitur.

Vomitum cruentum persæpe molesta abdominis, & hypochondriorum tensio, oppressio ad scrobiculum cordis, & cardialgia antecedit, præcipue à sumtis cibis.

Quandoque morbus modò brevior, modò longiore intervallo redit.

Vomitus cruentus plerumque prope à periculo vitæ abest. Nihilominus van Swieten complures vidit, qui ex eodem evasere, satisque commodè deinceps vixere, etsi tantum sanguinis ejecissent, ut præ inanitate subitâ convellerentur.

Marcellus Donatus lienosos quosdam ad x. libras sanguinis per secessum & vomitum eje-
cisse, auctor est, unde levati aliqui, alii omnino valetudini integræ redditi fuere. (b) Cl. Vogel (c) contendit, vomitu cruento interdum fuisse leviores lienis & hepatis obstructiōnes sublatas.

Stalpart van der Wiel (d) etiam menstrua absque incommodo per vomitum rejecta vidit.

Facile ab hæmorrhoidibus vomitus cruentus existit ob nexum, qui inter lienis, ventriculi, & hæmorrhoidalia vasa intercedit; sed hæmorrhoidibus etiam fluentibus persæpe hoc malum, nec evitatur, nec, teste Montano & Claudino, cum adest, dispellitur.

(b) Hist. med. mirab. L. IV. C. IX.

(c) P. 216.

(d) Cent. II. C. XVII.

Interdum vasa lienis & ventriculi varicosa ita dilatantur, ut malum, postquam sedatum est, denuo recurrat, corpusque enervet. (e)

Minus periculi habet vomitus cruentus, cum è suppressis menstruis ortus est.

Nonnullos hic morbus post breve tempus aufert; alios febris lenta, hydrops, aut tympanitis, cum subsecuta necat.

Cum ægri massas nigras, easque foetidas inter deliria evomunt, pessimi id quidem ominis est; at, qui ascitæ accedit, vomitus sanguinis, plane lethalis haberi debet.

Id quoque malum, cum post cruentum vomitum sincerus per alvum sanguis profluit; sed, ubi cruor grumosus & ater eadem viâ excernitur, minus periculi subest.

Cl. Tralles (f) venæ sectionem pro presentissimo hujus morbi remedio habet; subjungit tamen, nisi morbum acer, in ventriculo penitus insidens, stimulus excitaverit.

Poterit vena incidi quidem, cum pulsus fortis & plenus deprehendetur, morbusque è consuetis hæmorrhagiis suppressis originem ducet; verum in numerosissimis ægris, vix talis mihi occurrebat; sed plurimi, quod recte item Dodonæus, ac Hoffmannus observârunt, fractis, ac dejectis viribus fuere. Aurelianus quoque pulsus dubios, & animi defectiones observavit; quin totum inde corpus frigidum reddi didicit. Quare timendum est, ne vena incisa, æger brevi exspiret, aut insuperabiles languores, vel hydropes sequantur. Venæ sectione præterea spasmi indeque vomitus persæpe augentur.

(e) Advers. med. pract. Vol. I. P. I. p. 176.

(f) T. II. p. 29

Sauvages in hoc morbo ab hæmorrhoidibus, vel menstuis suppressis nato parvas solummodo venæ sectiones commendat, cum pulsus facile concidat.

Ubi ægri viribus constant, æstusque aut orgasmus observatur, è Tralleſii præcepto, potus demulcens frigidiusculus, veluti aqua cum succo citro, granatorum, aut ribesiorum præbendus est; quæ omnia, cum grata ventriculo sunt, tum nausæ & corruptelæ occurrunt.

In malo vehementiori; acida mineralia dilutissima tentari possunt.

Si verò, sumtis acidis, dolorem in ventriculo ægri sentiunt, ab iis abstinendum est.

Alumen in usum vocandum non est, cum multis vomitum cieat.

Nec martialia locum habent, quæ noxios edunt effectus, ubi obstructis visceribus abdominalibus propinantur. Cum vires autem adeò collapsæ sunt, ut pulsus vix percipiatur, extrema frigeant, mensque ipsa obtenebrata sit, fricandis leniter extremis partibus, blando lecti calore, & odorematis ad nares admotis excitandi sunt ægri, & acetum vino mixtum regioni ventriculi applicandum.

Abstinendum a frictionibus ventriculi, quoniam, eo vel leviter agitato, vomitus, observante Pisone, rediit. Interne mixtura ex aqua, & syrupo menthæ ac infusum millefolii præberi possunt. Paregorica a multis artis peritis ob virium imbecillitatem rejiciuntur; verum cum cruciantes hypochondrii spasmi, & intolerabiles anxietates, irritatioque mechanica, quæ a grumis in ventriculo hærentibus excitantur, sopienda sunt, vix aliunde, quam ab opio, levamen expectari potest.

Pacato vomitu, ut grumosa reliquæ auferantur, & oscula dilatata corroborentur, paucas rhei doses cum cremore tartari exhibendas præcipit Ill. Tralles.

Si multi grumi sanguinis cum borborygmis, tensione, & dolore abdominis per anum egerantur, clysmata ex decocto millefolii, & taraxaci profunt.

Arnicam, ut grumis sanguinis resolvendis & obstructionibus viscerum referendis aptissimam nonnulli prædicant; sed in vomitu cruento haud propinanda videtur, cum ea sæpe acerbos ventriculi dolores & vomitus excitaverit, id quod adhuc magis de floribus ejus, quam herbâ intelligi debet.

Viribus sensim redeuntibus, causa morbi eliminanda est, quæ plerumque in visceribus abdominis obstructis latet.

Hinc medicamenta ex taraxaco, cichoreo, saponariâ, terrâ foliatâ tartari paratâ exhibere oportet. A leniori dosi incipiendum est, ne forte per solventia largius sumpta, vasis nondum consolidatis, vomitus cruentus denuò redeat.

Etiam si morbus mensium, aut hæmorrhoidum suppressioni originem debeat, perniciosum foret, helleborum, aut remedia ex aloe parata, vel alia emenagoga propinare. Potest tamen in menstruis suppressis emplastrum leniter stimulan, ut de galbano crocatum D. V. inferiori abdomini applicari.

Cum vel ipso vomitu cruento, vel medicamentis solventibus, quidquid obstructum erat, sublatum est, & viscera abdominis libera & expedita sunt, tum ad roborantia, veluti pilulas ex cortice, extracto millefolii & rheo; vel ad aquas martiales confugere oportet.

Aquæ Stecknicenses, quibus hîc frequenter utuntur ægri, ferrugineæ sunt, & adstringentes ita, ut fere ad stipticas accedant; cum tamen minore copiâ aerem fixum ac spadanæ contineant, his postponenda videntur. (g)

Verum hæ aquæ medicatæ parcis & repetitis dosibus hauriendæ sunt, ne subitâ, & copiosâ earum ingurgitatione ventriculus justo plus distendatur.

Ubi morbus jam profligatus videtur, & ægri de pondere rursus, ventriculi regionem occupante, vel de anxietatibus, alviq; obstipatione queruntur, denuo ad lenia solventia, quæ alvum proliciant, & ad clysteres transeundum.

Enemata minore volumine injicienda sunt, ne intestino colo nimis distento, fundus ventriculi comprimatur.

Scorbutici quandoque sanguinem evomunt, & cruenta per alvum dejiciunt; sanguis autem rarò grumosus, sed loturæ carniûm similis est.

Vix malum hoc medelam capit.

Si ægri sitiant, pulsus sit celerior, infusum malti cum paucò elixirio vitrioli simplici D. V. N. 28. nisi dolores ventriculi inde augeantur, exhiberi potest.

Præstantissimos effectus ab infuso malti, scorbuticis ad ij--iv. ℥b. de die propinato, in Nosocomio vidimus.

Ubi vires admodum dejectæ sunt, serum lactis cum vino rubro paratum, decoctum ex cortice peruviano, & succus catechu convenit, cum confect, fere solutas scorbuticorum gingivas frustulis succi catechu in ore retentis, mirè roborari. Urgente malo, ad fortiora adstringentia, ut de-

(g) Jac. O Reilly de ortu, & indole aquarum Stecknicensium.

cœctum florum balaustiorum, radicis bistortæ recurrendum est.

Vomitu sanguinis etiam superato, cavendum ab acrioribus antiscorbuticis, ut nasturtio, & cochlearia.

Viribus erigendis cortex peruvianus optime intervit, ad quem in scorbuto provecto fractis viribus magis, quam ad antiscorbutica confugiendum est.

Brassica muria condita meritò, ut egregium alimentum contra scorbutum celebratur; ubi autem ab alimentis sumtis reconvalescentes ex vomitu cruento scorbutico flatibus, borborygmis, & anxietatibus vexantur, ad testudines, ranas & tenuiores carnes & jura ex iis parata confugere licet, à quibus scorbutici in diuturnis itineribus brevi vires & sanitatem recuperârunt.

Convalescentibus ex vomitu cruento animi quies, diæta tenuis, moderatus corporis motus, imprimis equitatio imperanda est.

Videndum etiam, ne regio ventriculi frigori obijciatur, quo admissò, dolores cardialgici, spasmodici, quin vomitus ipse redire solent.

Caveant feminae à thoracibus, quibus infimæ costæ, & inde hepar, lien, atque ventriculus comprimuntur.

C A P U T X.

D E

C H O L E R A.

QUamquam frequentissimè augusto mense choleram grassari asserat Boerhaavius, ea tamen aliis quoque temporibus, ac tum præcipue crebrior

animadvertitur, cum calidis diebus frigida noctes succedunt.

Multò frequentius acriore atque copiosiore bile oritur, quam e refrigerantium abusu, ceu peporum vel cucumerum, aut ab esu brassicæ, carnisve suillæ.

Robustissimos quosque, cum vix per aliquot horas cholera correpti essent, pulsu debilissimo, oculis caligantibus, ac fere exanimes reperi. Hinc recte Aurelianus acutam dicit, & celerrimam passionem, quæ nunquam in alterum transeat diem.

Quò magis excrementa a statu naturali recedentia, ut livida, nigra, aut loturæ carnis similia excernuntur, eò periculosior morbus.

Abdominis doloribus leniendis Wintringham venæ sectionem commendat, pernicioso sane tum consilio, cum pulsus exiguus & inæqualis deprehenditur, cum frigidis sudoribus ager manat, aut animo linquitur.

In summum vitæ discrimen ii adducerentur, quibus ob oris amaritiam vel vomitum emetica propinarentur.

Cælius Aurelianus ait : si quis vomitum provocare vellet, idem ageret, quod ille, qui sanguinis fluxione intereuntem phlebotomia adjuvare, vel sudoribus dissolutum, diaphoreticis confirmare cuperet.

Plurimi initio morbi jusculum pulli tenue, ad mentem Sydenhami, largiter potandum jubent, ut acrimonia hoc modo eluatur; ego centum & amplius agros cholera affectos tractavi, in quibus, vix elapsis aliquot ab accessu ægritudinis horis, singultum, debilitatem summam, oculos caliginosos, & pulsum inveni, vix sub sensus cadentem. Itaque mox ad opium confugiendum fuit, jam a Serapione, & Heraclide Tarentino commendatum.

R. Aq.

℞. Aq. Meliss. unc. iij.

Laudan. liquid. Sydenh. gutt. xxiv.

Syrup. kermes unc. β.

Sumat quarto aut sexto quovis minuto unciam dimidiam, prout necessitas postulat; non enim longis intervallis præbendum est hoc medicamentum, ne opii virtus inefficax reddatur.

Cum plurimi medicinam sæpius evomant, aliæ majori laudani dosi egeant, donec optatus sequatur exitus, consultum sanè fuerit, plus opii præscribere, cum æger in loco à pharmacopolio longius dissito degit, ne ante pereat, quam necessaria opii dosis præsto sit.

Nunquam me hujus methodi pœnituit, etsi Cl. Joung asserat, frequentius nocere opium, nisi acre vomitu ante expulsus sit.

Inter vomitum ipsum, aut eo remittente, infusum melissæ, vel jus pulli tenuiculus ingeri potest.

Urgentibus doloribus, cataplasmata ventri ad moveri convenit; sed ubi debilitas cum vomitu urget, præferendi sunt sacculi herbis aromaticis, rore marino, mentha &c. repleti. Hi calido vino immerguntur, tum expressi regioni ventriculi applicantur.

Cavendum, ne epithemata frigida à Cellio Aureliano commendata adhibeantur. Quamquam idem mox subjungat: cum dolor aut intestinorum tormenta coegerint, frigidorum loco temperantia admoveamus.

Hiscæ non levantibus, semivesicantia apponi possunt.

Morbo superato vires extracto corticis, vine rhenano aut austriaco &c. erigendæ sunt.

℞. Aq. Meliss. unc. v.

Extr. cort. peruv. unc. β.

Syr. flor. tunic. q. s. ad gratiam.

Ubi pondus circa ventriculi regionem sentitur, aut alvus, quod potissimum accidit, segnior est, drachmas vj. aut xij. tincturæ rhei addere priori mixturæ oportebit.

Sollicitè ab aeris injuriis, pedumque refrigeratione cavendum.

A Mortono cholerae species observata est, quæ accessu sæpe tertianæ, rarò quartanæ, sæpius verò tritaopheæ paroxysmum comitatur. Ejusmodi in febribus, pulsus ut plurimum contractus est, ac per intervalla remittens.

Multum in his periculi inest, cum mortemminentur; nec solventibus, aut purgantibus tractandæ, quam brevi cortice fugandæ sunt.

Univerſim febres intermittentes, quæ durante paroxysmo magnis doloribus atque anxietatibus stipatæ sunt, purgato corpore, brevi cortice peruviano extirpare oportet, ne perniciosæ evadant.

C A P U T X I.

D E

D Y S E N T E R I A.

Dysenteria alvi profluvium est, cum acerbis intestinorum doloribus, molestoque tenesmo conjunctum, quo materies biliosa, mucosa cruenta &c. ejicitur.

Sæpe dysenterici inter liquidas dejectiones excrementa dura, & figurata deponunt.

Nonnulli vehementes dolores sentiunt, alii mitius habentur: quandoque copiosa alvus, quan-

doque modica, sed frequentissimè, excernitur.

Urina sæpe saturata est, nonnunquam aquæ instar limpida profluit.

Morbus ipse jam cum vehementiâ hominem adoritur, jam mitis principio per gradus perpetuò ingravescit.

Dysenteria vel sporadica est, vel epidemica; hæc plerumque periculi plus habet: frequentius autumno, æstate vero frequentissimè grassatur. In regionibus quoque calidis graviores crebrioresque dysenteriae occurrunt.

Diversa mali sedes est. Præle in intestinis crassis eorum, qui hoc morbo mortui erant, pustulas, velut à variolis ortas, reperit: earum sedes in cellulosa erat, quæ villosæ subjicitur, ipsâ hæc illasâ.

Nonnunquam in intestinis tenuioribus, suppuratio, gangræna, & sphacelus deprehendebatur; contra vero Cel. Zimmermann (a) in dysenteria, quæ intra breve tempus mortem attulerat, intestina prorsus sana invenit.

Variae quoque dysenteriae causæ existunt; velut alimenta prava & corrupta: aqua foetens, & aer putridis exhalationibus inquinatus; unde post inundationes, aut in locis palustribus sæpe hæc morbus grassatur.

Maximam quoque vim habent ad generandam dysenteriam turba hominum, intra angustius spatium coarctata, vel subitæ aeris vicissitudines; tum.

Matutina parum cautos nunc frigora mordent.

Quare in castris etiam sæpius hoc malo gregarii milites, quam eorundem præfecti corripiuntur, qui melius nutriuntur, neque tam densi cubant, & contra aëris injurias melius muniti sunt.

(a) *Bon der Ruhr* p. 51.

Etſi dyſenteriaë ſporadicæ in indiis præcipue occurrant, ubi è nimio fructuum veluti peponum aut prunorum eſu naſcuntur: etſi item hi fructus tum, cum corpus ante diſpoſitum eſt, purgent, Bramini enim ſolis vegetabilibus viventes diarrhæa potiffimum laborant: epidemicæ tamen dyſenteriaë huic cauſæ adſcribi non poſſunt, cum sæpè iis annis graſſentur, quibus fructuum inopia ſumma eſt, aliis vero, qui fructuum copiam ſuppeditant, vix obſerventur.

Dyſenteria non ſemper à bile vitiatâ naſcitur, quamvis, ut Cl. Strack obſervavit, illos frequentius invadat, quibus ea aut nimia, aut corrupta eſt.

Periculoſior hic morbus ſtrictioribus, quam laxis, viris, quam ſæminis eſt: periculoſiſſimum, quum aliâ ægitudine detentum aggreditur; præcipiente enim Hippocrate (b) morbos ſupervenire morbis malum eſt, quod uno exhaustus pene homo, alteri ferendo impar ſit. Lethalis, quæ atrâ bile, cancro, aut phthiſi laborantes adoritur.

Mitior ſub frigido aere, quam æſtuante cœlo eſſe ſolet dyſenteria.

Quæ à dejectionibus ſinceris inchoat, ea diſcriminis plurimum habet.

Non tantum periculi in vomitu eſt, cum principio morbi exiſtit, quam cum in ejus progreſſu accedit.

Hippocrates quidem vomitu, qui diuturno alvi profluvio ſponte advenit, ſolvi ait morbum; verum in hoc ſtatu sæpe ab inflammatione naſcitur emeſis, ſignumque præbet instantis gangrænæ.

Cum omnia, quæ ori ingeſta fuere, denuo rejiciuntur, vel cum materia æruginoſa, aut por-

(b) Libro de Morbis.

racea sincero vomitu egeritur, indicium id fuerit periculi in quovis stadio urgentis.

Quo major abdominis dolor, quove pejor excrementorum odor, eo morbus deterior.

Modicæ, sed sæpius repetitæ excretiones majore cum periculo conjunctæ sunt, quam eæ, quibus materiæ plus, at rarius per alvum excernitur.

Largius urinæ profluvium bonum omen præbet.

Hæmorrhagiæ in dysenteriiis autumnalibus malum præsagium, cum sanguinem nimis solutum indicent.

Infaustæ prognosis est abdomen tumidum, ardor internus, rigentibus extremis corporis partibus, ingens ad præcordia anxietas, debilitas summa, defectiones animi, aphtæ, maculæ denique nigrae corpus deturpantes.

Nonnunquam dysenteriam hydrops, tympanitis, & marasmus sequitur.

Diversa est dysenteriae pro diversâ ejus naturâ curatio.

Per sæpe ex acri, ad intestina delato, originem ducit; raro admodum perfectè inflammatoria est, quandoque rheumatica, biliosa, putrida, maligna, vel ex his mista; ut, rheumatico-biliosa &c. occurrit. Nonnunquam sub initium, inflammatorium, deinceps vero putridum prædominatur.

In curandâ dysenteria ad ea, quæ præcesserunt, tum ad ægri vires, ipsamque epidemiæ naturam attendendum est probè. Neque tamen ex quibusdam epidemiis regulæ generales formandæ sunt, cum præcipiente Immortali Sydenhamo: qua methodo, currente anno, ægrotos liberaveris, eadem ipsa forsan jam anno veniente ex medio tolles.

Cl. Tralles diarrhæas observavit, quæ diutius relictæ facile in dysenteriam abiêre. Eas ille exhibito rheo, & data sub vesperum theriaca An-

dromachi una cum demulcentibus, brevi sanavit.

Dysenterix ex ejusmodi diarrhæis enatæ dictis medicamentis tractandæ sunt. Plures hoc anno mitioris indolis dysenterias curavi, quæ dato rheo & demulcentibus brevi sanabantur.

Cum dysenteria inflammatoriæ est naturæ, plerumque frigus præcedit: dolor constans ac velut ardens percipitur, isque fixus est, & unam abdominis partem præ aliâ infestat.

Pulsui haud fidendum est; quod in ipsa intestinorum inflammatione sæpe parvus tangitur.

Hic venæ sectio, viribus accomodata tentanda; tum cataplasinata abdomini emollientia apponenda, ac ejusmodi clysmata ano injicienda sunt.

Non tamen omnibus dysentericis enemata profunt, cum in nonnullis morbus inde exasperetur.

Inter cremor hordei, emulsa, decoctum althææ, radicis salep, mixtura ex gummi arabico parcè, sed sæpius ingerenda sunt, ne intestinis plus distentis dolor augeatur, aut vomitus sequatur.

Cavendum à purgantibus, præcipue vero ab emeticis, quamvis æger nihil appetat, & biliosa rejiciat; vomitu enim spontaneo, qui à dolore & diathesi inflammatoriâ nascitur, bilis sana, in ventriculo fluctuans expellitur. Quæ forte causa fuit, cur galli milites in Italia, Ludovico XIV. regnante, fere omnes, quibus ipecacuanha exhibebatur, perierint, cum antea quam plurimi, in exercitu gallico Sedani dysenteria laborantes curati essent, vomitu per ipecacuanham excitato.

Quam plurimos novit Cel. Frank (c) dysentericos letho traditos, cum ex nausea, vomitionibus, oppressione stomachi, quin ex oris amaritudine, & linguæ viscositate ad bilis turgescentiam concluderent incauti.

(c) Delect. opusæ med. vol. I. pag. 198.

Interdum à vena secta dolor, calorque minuuntur, & abdomen mollitur. Quod si tum agri de appetitu prostrato, & nausea conquerantur; vel si sordida appareat lingua, lenia purgantia & tamarindis & manna locum habent. Absit rheum, quod ob vim suam adstringentem tormina, & morbum auget.

Occurrunt dysenteriae, in quibus, observante de Haen, & Vogel, purgantia haud conveniunt. Elapso anno, multos dysenteria affectos in nosocomio absque evacuantibus feliciter curavimus.

Morbus enim a transpiratione suppressa ortus saepe solis demulcentibus, diaphoreticis, vesicatoriis, paregoricis demum clysmatibus tollitur.

In hac dysenteriae specie, faba Pichurim, quam ante triginta annos à Carmelitis ex Lusitania redeuntibus accepi, saepe levamen tulit.

In dysenteria biliosae, aut putridae naturae, cavendum, ne ob acerbum capitis dolorem, majorem ad tactum calorem vena secetur. Orgasmus enim putridi, & dissoluti sanguinis aliquando plethoram, & inflammatoriam diathesim simulat, ut exercitatiores etiam viri subinde fallantur.

Qui sanguinem in morbis negant putrescere, ii monente Hallero, in verbo ludunt, & id solum negare volunt, esse perfectam, dum vivimus, qualis in cadavere est, putredinem.

Ubi nausea, oppressio ad scrobiculum cordis, & lingua sordibus obducta animadvertitur, emeticum propinandum, interdumque repetendum est.

Vomitoria plus emolumenti habent initio morbi, quam cum longius progressus est.

Radix ipecacuanhae, quæ tanquam specificum in hoc morbo deprædicatur, optime tartaro

emetico jungitur, cum, præcipiente Zimmermann & Murray, ipecacuanha fordibus satis ejiciendis raro sufficiat. Solus tartarus emeticus quandoque violentius agit, aut alvi excretiones nimium auget.

Hume ipecacuanham ad gr. v. sextâ quâvis horâ præbendam censet; testatur tamen vir clarissimus, paucos omnino ægros continuam perferre naucam posse.

Neque adeo è re fuerit, confirmante Cl. Strack, (d) tartarum emeticum multâ dilutum aquâ, per intervalla exhibere, quam si subito deglutitur; ita enim certius ac facilius vomunt, nec tanta nausea torquentur ægri.

Nil damnosius paregorico, quod post emeticum ad turbas inde natas, compescendas porrigitur; opio enim dato, liberior per alvum necessaria excretio impeditur, febris augetur, sudor nocivus excitatur, & corpus magis ad putredinem disponitur.

Si vomitorio dato, signa sordium, in intestinis adhuc latitantium, apparent, ad purgantia ex manna, tamarindis, & sale amaro (quod Cl. Zimmermann ad unc. j—j β. exhibet) confugiendum est. Si vero hæc revomant ægri, & abdomen valde tensum sit, tincturam rhei præferre oportet.

Inter purgandum, leve infusum florum chamomillæ haurire convenit.

Si dysenterici datis purgantibus materiam viridescentem ejiciant, atque inde levantur, ea continuasse juverit; si vero lingua purior sit: neque ægri nauseam, anxietatem, aut oppressio-

(d) Tentam. med. de dysent. p. 86.

nem ad scrobiculum cordis querantur, si denique excrementa copiosa, aquosa, non admodum foetentia excernant, vel inter purgandum dolores augeantur, vires prosterantur, aut singultus, tremorve accedat, desistendum ab evacuantibus, & ad demulcentia, ut gummi arabicum, radicem althææ, & salep recurrendum est.

Nonnulli althæam ejusdem cum radice salep virtutis esse putant; sed hæc illi præferenda videtur, cum magis ad gelatinæ naturam accedat, nec vires ventriculi adeo deprimat, ut althæa.

Cæteris demulcentibus in dysenteria facile salicaria præstat, vel in pulvere ad ℥j. alterâ quâvis aut tertiâ horâ, vel in mixturâ propinata. At eam multâ aquâ dilutam esse oportet, ne mixtura nimis glutinosa evadat.

℞. Pulv. salicar. dr. j. β.

Aq. flor. rhœad. ℥j.

Syrup. alth. unc. j.

Laudat de Haen, in nimio alvi fluxu, e laxitate orto, salicariam, sed ob virtutem adstringentem in cacochymia purulentâ ejus usum damnat.

Cl. Bergius quoque eam adstringere docet, sed idem vir clarissimus folia recentia lubrica esse testatur. Neque ego in exsiccata styptici quidquam gustando detexi, aut in dysenteria noxium aliquem effectum, qui ex adstringentium usu facile consequitur, observavi. Quin ea in phthisicorum diarrhæa colliquativa vim habuit palliativam, neque ægri illâ sumtâ majorem anxietatem, aut respirationem difficiliorē sentiebant.

Si datis etiam demulcentibus ægri nimium purgentur, vel doloribus excrucientur, tum absente inflammationis metu, neque ulla in pri-

mis viis harente, faburra lenia demulcentibus paregorica socianda sunt.

℞. Rad. salep. dr. j.

Coque per quartam horæ partem in aqua fontis q. s.

Colaturæ unc. xv. adde

Laudan. liquid. gutt. xv.

Syrup. diacod. unc. ʒ.

Sumat singulis horis, aut alterâ quâvis horâ unciam unam.

Quodsi verò ægri, dum paregoricis utuntur, angantur, aut abdomen increascit, desistendum ab iis, & pro diversitate symptomatum, ut ex prioribus patet, ad clysmata ex infuso chamomillâ, vel purgantia, cum lenibus carminativis recurrere oportet.

In hoc dysentericiæ stadio, tinctura rhei præferenda est mannæ, cum intestina adeo laxata sint.

Ubi in dysenteria putrida purgato sufficienter corpore & absente inflammationis metu nihil diluentibus, aut demulcentibus efficitur, corticem simarubæ, vel succum catechu propinare convenit; hic enim & alvi excretiones cohibet, & putredini resistit; rejiciendum vero est catechu adustum, sapore ingratum, in aqua penitus non solubile.

Alumen, quod putredini adversatur, & colliquationem humorum impedit, in dysentericiâ putridâ non convenit, cum alvi fluxum moveat.

Interdum, mitigato jam morbo, tum alvi profluvium, tum abdominis dolores rursus augescunt. Quod cum fit, lenia purgantia commendantur; quæ locum habere possunt, si lingua sordefcat, excrementa viridem colorem referant, aut ægri circa præcordia coangustentur.

Si vero vires dejectæ sint, aut signa ante memorata non appareant, cautè cum purgantibus agendum erit; nam hæc fortè symptomata e frigore incautè admissò, aut intestinis mucò nudatis exorta sunt: quemadmodum enim ægri graviter læduntur, cum demulcentia & styptica, primis viis non satis expurgatis, præbentur, ita dysenterici quoque pereunt, cum fractis nimium viribus, evacuantia propinantur, aut illa negliguntur, quæ alvi fluxum compescant; tum enim humores magnâ vi in debilitata intestina irruunt.

Pessima vulgo opinio inhæret, noxium id esse, si è dysenteria biliosa decumbentibus ægris, cum sitiunt, potulenta largâ manu exhibeantur; veretur enim, ne alvi excretiones inde augeantur: cum ex adverso humorum acrimonia diluentibus corrigatur, & ad feliciorē egestionem disponatur.

Lac rarò dysentericis convenit. Nocet in diathesi biliosa & putrida ob caseosas, & butyraceas, quas continet partes: nec in dysenteria maligna tutò propinatur, ne intestina, ac corpus magis relaxentur. Denique in morbo inflammatoriæ naturæ emulsa lacti longe præferenda videntur.

Cum sitis urget, corpusque evacuationibus adhuc eget, uncia β . cremoris tartari in vj . libris aquæ soluta & liberaliter hausta prodest. Si vero nulla evacuantia indicantur, tum demulcentibus quidpiam spiritus vitrioli addi potest, at cum vires concidère, venter magis tumidus, & intestina laxiora evasère, tum egregiam opem elixir vitrioli acidum Halleri rite dilutum præstat; simili remedio Pater meus in curandis morbis putridis multum ac felicissime versatus ante quinquaginta annos non sine maximo emolumento usus est.

Rejicienda tamen acida mineralia, cum dolor abdominis, iis sumtis, ingravescit.

Si in dysenteria biliosa aut putrida purgato, quantum opus erat, corpore pulsus mollis ac debilis tangatur, si vires prostratæ sint penitus, præcipue vero, si aphtæ accedant, quæ non semper à purgantibus, morbi principio intermissis, aut adstringentibus, aromaticisve datis nascuntur, decoctum ex cortice peruviano, & radice salep proficuum erit.

℞. Cort. peruv. select. dr. x.

Coque in aqua per horam adde

Rad. salep. dr. j.

Coque per quartam horæ partem.

Colaturæ unc. xiv. adde.

Syrup. papav. errat. q. s. ad gratiam.

Sumat singulis horis, aut alterâ quâvis unciam unam.

Cortici quoque peruviano non sine fructu cascarilla jungitur, quæ debili ventriculo, & laxitati ventris egregiè subvenit.

In dysenteria, ubi gangrænæ metus oboritur, clysmata è cortice N. 7. paranda esse censuit nuper vitâ functus amicus meus Cl. Huck, cui plane assentior; illud tamen universim monendum arbitror, ut clysmata cum primis & cortice confecta parvâ dosi injiciantur, quò diutiùs ab ægris retineri possint.

Laudatur in dysenteria ad putridam vergente, si nullus inflammationis metus adsit, radix arnicæ ad dr. β. alterâ, tertiâ, aut quartâ quâvis horâ sumenda; sed quantum usq. discere potui, in morbis putridis arnica longè cortice inferior est. Multi etiam ægri de ventris doloribus auctis post arnicam sumtam conqueruntur.

Commendatur quoque radix colombo à gr.

x—xv. & ultra aliquoties per diem sumenda, cum alvum non obduret, & bilis putredinem, acrimoniamque corrigat, eamque expertissimus de Mertens (e) cum fructu exhibuit. Cæterum, si ejus periculum gustando fiat, non omni prorsus adstringendi vi carere videbitur.

A Parisinis, aliisque vitrum ceratum antimonii laudatum fuit; verum Cl. Navier (f) illud inutile expertus est, & Baumé (g) adnotavit, persæpe vomitus ab eodem cieri. Multos vitro antimonii cerato è medio sublatos vidit Zaffius. Neque Angli tum probant, cum tormina vehementiora, cum caloris, & tensionis sensu in abdomine animadvertuntur. Cæterum hoc remedium cò fortius agit, quò subtilius contritum est, adeo ut gr. j. talis pulveris plus præstet, quam gr. ij. obiter, & negligentius comminuta.

In dysenteria certe non prope à periculo abesse hoc remedium credendum est, quod, ut in actis anglicanis refertur, vomitum, & dejectiones eliciendo, hydropes quandoque sanavit.

In dysenteria putrida puritas lecti, & lintheaminum imperanda, urina, fæces alvinæ hoc morbo affectorum, lecti, stramen, quibus hi ægri incubuerunt, præsto auferenda sunt, cum morbus hic tam facile contagio contrahatur, quamquam Carolus Piso contrarium asserat.

Denique observata docuère, quod vapor aceti, pulvis pyrius accensus non profuerit ad malignitatem morborum putridorum corrigendam, & ad contagium prævertendum, nisi cautum fuerit, ne multi ægri in eodem loco decum-

(e) T. II. obs. p. 13.

(f) Dissert. sur plusieurs maladies populaires.

(g) P. 127.

bant, & aer sæpius renovetur. Ex observatis Sarcone & aliorum constat putridos morbos in plateis arctioribus & frequentiores, & graviores fuisse.

Cum febris tertiana vel simplex, vel duplicata ad dysenteriam accedit, vel cum certo tempore dolores abdominis exacerbantur, aut alvus crebrius excernitur, cortex peruvianus in substantiâ tentandus est. At, quibus alvus à cortice movetur, nec febris ob remedium cito nimis è corpore ejectum, minuitur, iis opium sed parcè & consideratè propinandum est. Theriaca vero Andromachi, electuarium Diascordii, aut ejusmodi medicamenta calida & stimulantia minùs conveniunt.

Dysenteria maligna ex subitâ & summâ virium prostratione, pulsu debili, urinâ fere naturali, tremore artuum, somnolentiâ & apositiâ cognoscitur.

Ingens hæc jactura virium, ut jam Boerhaavius observavit, non ab ejectæ materiæ copiâ, sed à vi quadam venenatâ, in spiritus ipsos agente repetenda est (h)

Ejusmodi morbo nonnunquam ii laborant, qui ægris inserviunt, morbumque contagione nacti sunt. His, ubi de oppressione ad scrobiculum cordis, summa nausea, aut anxietate conqueruntur, emetica præbere licet, quamquam similes ægri non bilem, sed aquam remedio superpotam & mucum gastricum quandoque evomant.

Semper tamen & virium, & vitæ anteaactæ ratio habenda est; vereor enim, cum supralau-

(h) Epist. ad Bassand. p. 38.

dato Frank, ne in dysenteriiis malignis ob nimias emeticorum laudes sæpissime peccetur, cum à solo intestinorum dolore, nervorumque ventriculi consensu, & nausea, & vomituritio faciliè producantur.

Nocent purgantia, nec sola demulcentia locum habent, sed ad adstringentia, diaphoretica, & stimulantia confugiendum est. Hinc cortex simarubæ, succus catechu N. 29. & 30. pulvis Doweri, camphora, moschus, decoctum ex mentha, salep, aut ruta, denique electuarium Diaiscordii pro diversitate symptomatum conveniunt; ut ex iis patet, quæ de febre putrida & maligna (i) animadverti.

Decoctum corticis simarubæ minus adstringit, quam pulvis in substantia datus, qui ad 3 j. tertiâ, vel quartâ quâvis horâ propinatur. Nonnullis tamen à pulvere ventriculus gravatur. Forte ideo Barbeirac decoctum N. 31. anteponebat, cum saburræ suspicio in primis adhuc viis hærentis existit.

Diluentia in dysenteria maligna melius conducunt, cum tepida hauriuntur.

Magnæ utilitatis in dysenteria maligna sunt vesicantia, sæpe emplastrum ex dimidia parte meliloti, & vesicatorii cum successu abdomini applicatur.

Quandoque à vesicatoriis diutius suppurantibus nascuntur ulcera, remediis consolidantibus resistentia: prodest tunc, fila carpta solutioni aluminis crudi immergere, & ea exsiccata ulceribus applicare, quæ cum eventu quoque pulvere subtilissimo olibani insperguntur.

(i) De curandis febribus & inflammatis commentat.

Fomenta, aut cataplasmata emollientia, quæ in nonnullis dysentericiæ speciebus ventri admodum profunt, in malignâ non conveniunt, sed eorum loco linteis utendum est, quæ infuso aquosovinoso ex ruta, scordio, & lavendula immersa fuerint. Curandum, ut lintea bene exprimantur, nec abdomini apposita frigesacta relinquantur.

Abstinendum quoque a clysmatibus emollientibus, aut evacuantibus; cum pulsus remisse, & inæqualiter micat, venterque inflatus est, infusum saturatum chamomillæ cum camphora ano injici potest.

Ubi a prædictis auxiliis dejectiones alvinæ non minuuntur, sed pulsus, & vires magis concidunt, ut nullus inflammationis accedentis metus supersit, enemata N. 32. ex decocto radicis tormentillæ, addito gummi arabico, & camphora tentare licuerit.

Anno millesimo septingentesimo sexagesimo secundo multi ad nosocomium Fratrum misericordiæ deferrebantur dysenteria affecti, neglectique. In plerisque ob summam debilitatem nullus amplius evacuationibus locus erat: alii, primis viis purgatis, adeo copiosa excrementa dejiciebant, ut, remediis laudatis nihil proficientibus, mors instare videretur. Multis horum sequens medicamen profuit.

℞. Conserv. rosar. rubr.

Syrup. myrtill. aa. dr. vj

Pul. rad. torment. dr. j.

---- ipecac. dr. β.

Opii pur. gr. iv.

Misce exactissimè.

Sumat singulis, aut alterâ quâvis horâ drachmam unam.

Hoc idèd usus remedio sum, quòd fore sperabam,

fabam, ut ipecacuanha motum peristalticum minuat, & opium vomitum prohibeat.

Nondum enim eo tempore ipecacuanhæ cum opio connubium ex Geoffroy & Pringle mihi innotuerat.

Nonnulli singultu molestissimo corripiebantur, qui, addito moscho, illicò levabantur. Verùm, cum existimarem, ob imminutas alvi excretiones cessavisse singultum, à moscho abstinui. Sed brevi iterum rediit, qui, exhibito rursus moscho, evanuit.

In dysenteria, nullis remediis cedente, cum vitium in ultimo solùm intestino inest, Hermannus van der Heyde clysmata frigida cum aceto, ex velica injecta, commendat: sed videndum, an non exulceratio in intestino recto adsit, cum inde dolor augeatur.

Quod dysentericos maximè symptoma vexat, tenesmus est, qui varia poscit auxilia.

Initio morbi sæpe minuitur cremore hordei, decocto althææ, aut seminis lini ano injecto; si progrediente malo mucus pellucidus, tremulus, gelatinæ similis deponitur, rheum in substantia prodest: cum verò una cum alvi fecibus purulenta excernuntur, aut ab ulcere tenesmus proficiscitur, præter clysmata ex lacte & amylo, modica addita terebinthina, præter aquas item spadanus cum lacte, sequentes pilulæ egregiè conducunt.

℞. Gummi. arab. unc. β.

---- oliban.

Extr. agrimon. aa. dr. j.

Terebint. coct. vel.

Balsam. de Mecha dr. β.

Fiant pilulæ gr. iij. consperge pulvere liquiritiæ.

Sumat tres, quater, aut quinquies per diem.

Ad diarrhæam purulentam diriores compescendam, torrefactas glandes quercus commendavit Rosenstein.

Si dolores valde urgent, paregorica poscuntur; sed clysmata ex opio parata circumspectione egent. Vidi à xx. guttis laudani ob lumborum & inguinum dolores acerbos ante eruptionem catameniorum injectis, anxietatem summam & paralytim levem inferiorum artuum successisse, licet fomenta & clysmata emollientia præmissa fuerint. In viro tetano laborante a grano opii per clyisma applicato eisdem eventus animadverti.

Nonnunquam, superato jam morbo, a facibus duris tenesmus oritur, sanguisque striatus excernitur. Cavendum, ne, quum hæc accidunt, morbum rediisse quis putet, & adstringentia in usum vocet; sed uncia salis amari in libris iv. aquæ solvenda, & sæpius hujus solutionis cyathus hauriendus est, donec mollior alvus excernatur.

Ubi post gravem dysenteriam pertinax admodum alvi obstipatio superest, coalitum, vel excrementum quandam præcludentem, ut Kleinius monet, suspicari fas est.

Qui è dysenteria convaluerunt, quandoque ciborum appetentiâ privantur, flavescent vultu, ac viribus franguntur: his, si amarities oris, & oppressio ad scrobiculum cordis animadvertatur, emeticum: secus tinctura rhei aquosa convenit.

Vitandæ quoque dysenteriae morbo expeditis sunt aeris vicissitudines, nec fructus horæi, nisi caute admodum, concedendi, ne in malum idem recidant.

Anno 1762. multi, qui e dysenteria præmatu-
 ture cohibita tympanitici evaserant, ad Fra-
 trum misericordiæ nosodochium deportaban-
 tur. Hi clysmatibus ex infuso menthæ saturato,
 emplastro de cumino abdomini appposito, infuso
 item menthæ, ore hausto, & sequente mixturâ
 satis facile curabantur.

℞. Aq. menth. unc. iv.

Tinct. aquos. rhei unc j. --- j β.

Elixir stomach. temp. dr. j.

Sumat alterâ quâvis horâ unc β.

In tympanitide verò, aliâ ex causâ oriâ,
 non tam felicem eventum hæc methodus ha-
 buit; verùm alia exhibenda fuerunt.

C A P U T X I I I.

D E

I C T E R O.

Icterus flavus primum, aut niger est, isque
 majore plerumque cum periculo conjunctus:
 dein febrilis, vel apyretus: denique continuus,
 aut periodicus; qui sæpius recurrens nonnun-
 quam in perennem mutatur.

Quandoque è spasmis iræ, herniæ incarce-
 ratæ, colicæ pictonum, denique ab emetico-
 rum, aut purgantium drastico-um vi inductis;
 sæpe crassiori e bile &c. sæpius e viscerum ab-
 dominalium obstructione oritur.

Interdum e dysenteria, præpostere ac per-
 verse curatâ, extitisse morbum regium Bero-
 linenfes observârunt.

Nascitur item e fecum duritie, ut in gravidis, vel e corticis abusu. Qui quandoque, dum per intestina fertur, in massas cogitur indissolubiles, nec motu peristaltico ejiciendas. (a)

Nonnunquam facile curatur, nonnunquam brevi tempore mortem adfert: interdum, ac niger cum primis, longiore intervallo, teste Junkero, ægros tenet. Novi ipse quempiam, ictero nigro laborantem, qui, neglectis omnibus remediis, per complures annos in urbe inambulans, morbosum corpus circumferebat.

Ut plurimum in tympanitidem, non rarò quoque in ascitam abit, ac tum præcipue, cum albam eamque copiosam ægri urinam reddunt, neque respirandi difficultas, aut dextri hypochondrii tumor medicamentis levatur.

Nonnunquam febri lentâ, quæ ictero se adjungit, consumuntur ægri.

Icterus ad quartanam accedens, vel e capitis vulneribus ortus, mali est ominis; ille verò lethalis, qui ex hydrope, aut suppuratione hepatis nascitur.

Alvi fluxu morbus regius solvitur; at cum fæces spumant, foetentque supra modum, & diversissimis coloribus tinctæ sunt, haud procul ab interitu ægri absunt.

Hæmorrhoides fluentes persæpe salutis sunt ictericis, sed id propediem viribusque adhuc firmis fiat; alioquin perniciosæ hæmorrhagiæ, iis præcipue, qui ictero nigro affecti sunt, haberi debent.

Cura pro diversitate causæ, & symptomatum differt.

In recens natis tinctura rhei, sapo venetus, & enemata profunt. N. 33.

(a) Medical. Observ. and Inquiries by a Society of Physic. in London. Vol. IV. P. 123.

In gravidis, quæ recte antea valebant, nonnunquam icterus ex spasmodicis, sæpius autem e duris, & copiosis, quæ intestinum colon occupant, facibus ortum debet. Ille antispasmodicis, hic clysmatibus & medicamentis, alvum leniter ducentibus impugnandus est. Verùm ubi proximis ante partum mensibus accedit, aut venæ sectione, aut partu ipso tollitur.

Ubi icterus, id quod perraro evenit, in febribus intermittentibus per periodos recurrit, rursumque apyrexiae tempore evanescit, cum is, tum febris ipsa cortice propulsatur.

Ira illis potissimum icterum inducit, in quibus, cum valent, copiosior bilis secernitur.

His neque ob amaritiem oris emetica, nec ob spasmos opiata præbenda sunt, sed diluentia, subacida, & si alvus constipata sit, tamarindinata, cremor tartari, ac enemata, cum diætâ tenui sanitatem adferunt.

Icterus ex hæmorrhoidibus, aut menstruis suppressis ortus, cum signa plethoræ apparent, id præcipue postulat, ut hirudines apponantur, vel vena incidatur, semicupia adplicentur, super calida sedeat, ut decocta denique solventia ex gramine, taraxaco, tamarindis, & sale medio exhibeantur. N. 34. Cavendum ab aloë & medicamentis ex eâ confectis.

Ubi icterus è crassiori bile, vel ex obstructis visceribus ortus est, à rheo, tamarindis, vel salibus mediis curationem auspicari oportet.

Nimium meticulosi sunt, qui omnino salium usum damnant in iis, quibus nervi sunt mobiliores. Ego, præeunte Boerhaavio, litteratis salia prospero sane eventu præbui, tum alias ob causas, tum ob hanc præcipue, quod iis sumtis rarius sequatur alvi obstructio, quam alia purgantia post se relinquere solent.

Corpore leniter purgato, ad solventia recurrentum est, additis iis, quæ alvum molliorem præstant.

Cum ægri habitu sunt strictiore, cum pulsus celerior, sitis major, ructusque nidore offendentes animadvertuntur, decoctum ex acetosa, taraxaco, radice graminis, cum salibus mediis, aut succus taraxaci recenter expressus, vel ejus extractum liquidum cum terrâ foliatâ tartari convenit.

Inter decocta solventia illud ex saponaria paratum cetera antecellit, quod ex foliis recentibus, multoque magis e radicibus paratum, ceu sapo spumas agit, maculasque pingues detergit.

Si lentus admodum humorum motus observetur, ægrique e pallido flavescent, pilulæ ex sapone veneto, extractis amaricantibus, gummi ammoniaco, felle taurino, rheo aut massa pilularum cochiarum profunt.

Non nimis magna pilularum dosis unâ vice paranda est, cum diutius asservatæ ita quandoque exsiccentur, ut in corpore non solvantur, sed fere integræ per anum excernantur.

Diuturnus quandoque solventium usus in annosis viscerum obstructionibus requiritur. Nuper virum iisdem, & quidem gravissimis laborantem integræ sanitati restitui, dum per biennium vernali & æstivo tempore succo taraxaci expresso, hyeme pilulis ex gummi ferulaceis, & extractis amaricantibus uteretur.

In tumoribus abdominis durissimis, præter inunctiones, sequens mixtura per longius tempus sumta nonnunquam mirè profuit.

℞. Extract. tarax. liquid.

Terr. foliat. tart. aa. unc. β.

Extr. Conii maculat. Linn. g. x---xx.

Aq. fœnicul. unc. vj.

Syrup. de duab. unc. j.

Sumat omni tri-aut quadrihorio duo cochlearia.

Inunctiones, & memorata solventia absque extracto cicutæ voto non responderunt.

Ubi à solventibus diutius usurpatis viscerum obstructions non emendantur, sed ager debilior redditur, aut corpus extenuatur, ab iis abstinendum est, & præter diætam accomodatam ea solummodo locum habent, quæ alvum apertam servant, secùs præsto hydrops succedit.

In his ægris scirrhi viscerum abdominalium latent, licet tactu, ut e. g. in concavâ hepatis parte residentes, non percipiantur. Veros enim scirrhos omnium remediorum efficaciam eludere existimo.

Legitur quidem apud Hallerum, quod in virgine scirrhus lienis durissimus puerperio solutus fuerit; quæ durities verosimiliùs ab intestino colo facibus induratis distento repetenda videtur.

In ictericis, qui hæmorrhoidibus antea laborarunt, ubi nulla plethora, nullus inflammationis metus, solventibus dictis quidquam extracti hellebori nigri cum fructu additur.

Cum in ictero fæces colore naturali dejiciuntur, amaricantia cum roborantibus utiliter adhibentur. Præ cæteris eminet tartarus chalybeatus, qui nequaquam, ut cætera martialia, alvum comprimit.

Quamvis, flavedine cutis evanescente, morbus quoque superatus videatur, cum tamen excrementa cinerei coloris ejiciuntur, aut scrobiculus cordis oppressus est, extractum taraxaci liquidum, aut si tempus favet, succi herbarum recenter expressi, diutius sumendi sunt, qui oleo super infuso, diu in ampullis conservari possunt.

Sunt, quorum ventriculo præcipue jejuno succi infesti esse deprehenduntur; at si eosdem juri carni, addito vitello ovi, immisceas, sine molestia

quandoque ferunt. Salubres quoque sunt aquæ minerales solventes, veluti Egranae & Carolinae; sed corpus ante purgare convenit, ne anxietatibus & flatibus nimium agri conficiantur. Universim tamen aquæ soteriæ majus emolumentum præstant, cum ad ipsos fontes hauriuntur; namque hujus rei causa & cælum mutandum est, & itinera suscipienda: tum expediti, remotique a domesticis curis agri corpus quoque, dum aquas inter ambulandum bibunt, salubrius exercent.

Ubi sub usu aquarum mineralium appetitus deficit, corpusve languet, desistere ab iis oportet. Boerhaavius author est, nocere aquas minerales in laxiore corporis habitu, atoniâ ventriculi & intestinorum.

Pertinacissimum icterum, pluribus medicamentis frustra oppugnatum diuturno fructuum æstivorum recentium usu levavi. Verum ubi ventriculus, & intestina admodum laxata, sanguisque nimis solutus est, fructus horæi, uti Tissot monet, haud in rem fuerint.

Commendantur a quibusdam in ictero emetica, sed cautè in his ac providè agendum est.

Quamvis enim vomituritiones & nausæe percipiuntur, eæ tamen persæpe morbi symptoma sunt, neque a saburrâ primas vias obsidente excitantur. Tum vero, cum nullus dolor, nullus inflammationis metus adest, neque obstructio insignis observatur, atque purgantia & solventia incassum adhibita fuere, tentari emeticum potest, ut compacta materies concussionibus solvatur, & ad faciliorem excretionem idonea efficiatur. Quandoque purgantibus & solventibus icterus quidem imminuitur, sed vires & pulsus ægrorum collabuntur. Hic solventibus, & evacuantibus supersedendum est, atque ad serum lactis vinosum, vel lenem extracti corticis dosim confugiendum.

Ubi viribus aliquantum confirmatis, alvus dura est, levem tincturæ aquosæ thei, aut unam alteramve salis mirabilis Glauberi drachmam addere mixturæ cum extracto corticis oportet; dein rursus ad solventia transeundum, iisque tam diu utendum, donec vultui, urinæ, & excrementis constet naturalis color, & hypochondria omninò libera, reperiantur.

Neque externè in morbo regio auxilia negligenda sunt.

Quibus hypochondrium tumescit, tactumque paullo immitius, dolet, iis semicupia, cataplasmata, unctiões conducunt.

℞. Spec. emoll. lb. j β.

Sapon. venet. unc. iv.

Conii macul. Linn. unc. ij

Coque in cataplasma.

Clysmata quoque in ictero laudem merentur. Quodsi fæces argillæ similes dejiciantur, agerque habitu sit frigidior, saponem aquâ solutum injicere convenit, ut bilis vices suppleat. Quamquam hæc sapo haud vocari possit, cum alcali destituta sit; tamen, experientia teste, lenta solvit, intestina stimulat, & alvum promovet.

℞. Sapon. venet. unc. β.

Solv. in unc. x. aq. fontis.

Injice.

Cum alvus admodum depressa est, & excrementa velut glutine obvoluta apparent, enema ex terebinthinâ, ovi vitello subactâ, & aqua diluta per sæpe profuit.

Cæterum unctiões, althææ & calendulæ unguento factæ, non minus conducunt; si malum pertinacius resistat, commodè unguenti neapolitani quidpiam admiscueris.

℞. Unguent. alth. unc. iij.

---- calend. unc. ij.

---- neapol. dr. j. β.

Ova cruda a quibusdam in ictero commendata absque successu exhibita fuisse memini. Quin imo nonnullis ea exitio fuere, dum alia remedia negligeantur, quibus adhibitis, fortasse recuperassent salutem ægri.

Cl. Greding belladonnæ ægris administravit. Dedit manè, & vesperi pilulam.

℞. Extr. belladonn. g. xxiv.

Pulv. folior. gr. xv.

F. Pilulæ ponderis semigrani.

Prima post quamlibet pilulam sumtam die, insignis calor corporis, vehementior, crebriorque arteriarum, præsertim temporalium ictus, capitis tenulentia & largus sudor subsequabantur, quæ omnia majore facum viridium, & urinæ excreta copiâ diminuebantur; demum rhabarbaro, & sale amaro morbus penitus sublatus est. (b)

Elapso annis, belladonnæ in pertinacibus viscerum abdominalium obstructionibus tentaveram; paucis profuit; at plures nullum inde levamen percepere.

Quare, nisi in reliquis medicamentis nihil opus sit, vix adhiberi potest; tum vero, & ab hoc desistendum erit, cum appetitus fugit, alvus solutior fuit, & corporis languor invalescit.

Nunc quædam de ictero periodico notanda occurrunt.

Hic quandoque constrictioni spasmodicæ in hysteriis originem debet, licet nuper negatum fuerit, icterum à spasmis oriri posse. (c) Ipse

(b) Advers. med. pract. Vol. II. P. II. P. 319.

(c) An Essay on the Jaundice &c. by William Corp. M. D.

anno 1752. Ictero spasmodico leviori ex irâ laboravi.

Eum adesse id argumento est, si nulla in hypochondriis durities notatur, si ægri antea flavescentem faciei colorem non exhibebant, si copiosam eamque pallidam urinam reddunt; denique si facillime irritantur, & ictero motus animi præcesserunt.

Externe enemata ex carminativis, frictiones abdominis, & unctiones, unguento nervino, carminativo, & balsamo embryonis factæ: interne valeriana, gummiferulacea, asa foetida, amaricantia; & si nulla obstructionis signa appareant, lenia martialia adhibita medicinam huic morbo faciunt.

Nonnulli ægri, quos mars in substantia exhibitus male afficit, ejus extractum commodè ferunt.

℞. Rad. valer. sylvest. dr. vj.

Gumm. ammon.

Extr. trifol. fibrin.

---- mart. aa. dr. ij.

Asæ foet. dr. β.

F. Pil. gr. iij.

Sumat ter per diem iv-vj.

Cum alvus tardior est, rhei quidpiam adjicere convenit.

Vix locus opiatiss est, nisi cum paroxysmo ingruente, exempli gratia, post animi motum vehementiorem, ægri sibi abdomen validius constringi querantur.

Tametsi calculi vesicæ felleæ tum quoque, cum nullus icterus aderat, in cadaveribus quandoque reperti fuerint, existimetque vir summus Hallerus, morbum regium periodicum redeuntem a calculis progigni vix posse, eum tamen præsertim in feminis ab hac causâ observavi. Hæc pon-

duo quoddam, doloremque sentiunt obtusum in regione vesicæ felleæ, qui, etsi acutus non sit, tamen omnia constringit, versùs ventriculum se extendit, & respirare liberè ægras non finit, tum vomitus accedit, aut irritus vomendi, alvumque dejectiendi conatus. Nonnunquam similia symptomata ab amurcâ biliosâ profecta cum Hoffmanno vidi; quandoque tamen, calculis infernè secedentibus prædicta symptomata absque ictero exstitisse memini.

Fortè hi calculi, animadvertente Hoffmanno, quandoque in flexibus intestini duodeni nascuntur.

Calculi fellei, uti Cl. Sabatier animadvertit, simillimi sunt bili exsiccata: ignem faciliè concipiunt, levesque sunt adeo, ut aquæ innatent.

Colicas sæpius redeunt gignunt; verùm, quod mox memoratus vir tradit, ab iis in intestina delatis inflammationes ac choleras ortas esse, id nondum mihi observare licuit.

Cum plethorici sunt ægri, vena aperienda est, ne ingentibus illis nîsibus vasa rumpantur; at ubi spasmus validiores, pulsus debilis, aut gelidus sudor observantur, sanguinem mittere haud oportet.

Emetica prope absunt à periculo, cum vasa hepatis disrumpi possint, dum sanguis abdominis in venam portarum maximo impetu fertur.

Consultius est decoctum hordei cum melle propinare, ut faciliùs vomant ægri.

Profuit in hoc malo decoctum ex taraxaco & radice althææ paratum, addito pauco sale mirabili vel seignette, minori dosi, sed sæpiùs sumtum.

Cl. Bergius in volvulo, & calculo felleo oleum ricini non sine insigni fructu exhibuit. Dum frequentes vomituritiones cum singultibus urgebant, & alia purgantia valida passim fallebant, cochlear unum alterâ quâvis horâ sumere cogebatur æger,

antequam pharmacum aliquid effecerit. In gratiam eorum, quibus oleum displicuit, idem cum mucilage gummi arabici vel vitello ovi in emulsionem redegit. Alii, tribus unciiis pro dōsi datis, in feminis præsertim tenerioribus alvum motam esse observarunt; alii ad v---vj. uncias procedere coacti sunt.

Multis in colicâ piætonum hoc oleum per mercatorem allatum exhibui; sed nihilo majoris efficaciz erat, quam oleum amygdalinum cum niannâ confociatum, quod crebrius, sed majore dōsi, ac Tronchin præcipit, optimo effectu dedi.

Nuper tamen aliquoties in urbe oleum ricini ex seminibus hîc Viennæ expressum in cardialgia N. 35. cum vomitu & pertinaci alvi obstructione cum successu propinavi.

Itaque optandum esset, ut ricini culturâ propagetur, quum in Hungaria vidit Cl. Friburgensis Professor Mederer, (d) cum remedium hoc, gustu non ingratum, ob pretium majus, quo hîc venditur, paucis ex re, & usu esse possit.

Clysmata emollientia sæpius injicienda & cataplasmata ventri admovenda sunt. Semicupia viæ ferunt inquieti ægri.

Omnibus remediis opium antecedit, tum quod summum dolorem mitiget, tum quod spasmos sopiat, fortè ductum cysticum, aut communem constringentes.

Expediit, simul decoctum althææ, vel graminis saturatum sæpius haurire.

Extra paroxysmum succus taraxaci expressus, aut extractum ejus liquidum, cum terrâ foliatâ tartari longissimo tempore sumendum, interjecto aquæ

(d) Hungerbyhler Dissert. de oleo ricini. Friburgi Brisgojæ 1780.

Sedlizenſis aut Bilinenſis uſu, ut alvus indies mollior perſiſtat.

Multis hunc in uſum familiaris eſt aqua aerea, quæ arcani nomine ex Bohemiâ allata venditur; ipſa vero mera ſalis amari in aquâ ſolutio eſt, cui exigua ſelenitæ portio admiſcetur, ut lagena, in quâ circiter 28 unciz aquæ inſunt, ſalis unc. ij. β. & dr. j. gypſi contineant. (e)

Sæpius calculo felleo laborantibus balnei ſulphurei Baadenſis uſus profuit. Plurimum quoque opis attulit equitatio, aut itinera diuturniora inſtituta.

Eſſi cum Cl. Cullen ſentiam, aut peculiarem in ſpecifico à Whitt propoſito, vim ad ſolvendos calculos felleoſeſſe, nihil tamen obſtat, quominus tentari poſſit. Conſtat duabus partibus ætheris vitrioli, & una olei ſtilatitii terebinthinæ. Dantur guttæ xij. -- xx. & ultra ſacchari fruſtulo inſtillatæ. Hæc miſturâ ſumtâ, ſeri lactis clarificati, vel aquæ hordei unc. vj. potantur. Hujus remedii uſus in plures menſes ducendus eſt; & cum aliquanto caleſciat, eodem tempore ptifanæ refrigerantes, & demulcentes cum ejusdem generis diætâ præcipiendæ ſunt.

Qui calculis felleis laborant, nec vitam ſedentariam agant, nec alvum obdureſcere ſinant; omniaque evitent, quæ bilem tenaciorem, & craſſiorem reddunt; nec moeſtitæ locum præbeant, quæ generationi hujus calculi plurimum favet.

(e) Hornſtein Diſſert. 1777.

CAPUT XIII.

D E

HÆMORRHOIDIBUS.

IN curandis hæmorrhoidibus parùm ad summam rei facere videtur, utrum eæ ex systemate venæ portæ, an e vasis hypogastricis, an e venis, aut arteriis fluant.

Aliæ cæcæ sunt : fluentes aliæ.

Utræque viris sunt, & maturâ ætate hominibus, quam juvenibus familiariores.

Experientiâ constat, teneros infantes quandoque hæmorrhoidibus laborasse.

Verum huic referri non debet sanguis, per anum dentitionis tempore fluens, uti aliquoties observavi; qui, ubi primum erupere dentes, sistitur. Nonnunquam tamen vel ob majorem sanguinis profluentis copiam, vel ob summam debilitatem, decoctum corticis peruviani feliciter adhibui.

Nunquam hæmorrhoides animadverti, quæ rite singulis mensibus, catameniorum instar fluxissent, licet id accidisse certis practicum observatis constet.

Causæ hæmorrhoidum sunt plethora, seu illa per totum corpus diffusa sit, sive circa hæc solum vasa consistat, orgasmus sanguinis, tum corporis exercitiis, tum potibus spirituosus inductus; dein sanguinis per venam portæ impeditus transitus; ut cum viscera abdominalia obstructa, aut humoribus spissioribus atrabiliaris referta sunt; denique ea omnia, quæ vasa hæmorrhoidalia comprimunt; ut

gravitas, faeces duræ aut consuetudo latrinis diutius insidendi, aut ea, quæ humores ad vasa hæmorrhoidalìa magis derivant, ut equitatio, abusus aloes, vel piperis &c. item quæ sphincterem iritant, ceu calculi vesicæ, suppositoria, vermes, hîrudines intempestivè adplicitæ; &c.

Inter causas hæmorrhoidum recenferi etiam debet amarorum abusus, quo, teste Spielmanno (a) intestina exsiccantur, alvus obstruitur, & hæmorrhoides excitantur.

Nostrâ ætate homines frequentius Vindobonæ hæmorrhoidibus obnoxii sunt, etsi moderatius vino utantur, quam avi eorum. An ex abusu aromatum, condiendis cibis adhibitorum, an quod rarius corpora exerceant, rhedisque frequentius vehantur?

Hæmorrhoides certis temporibus fluentes, salubriores plerumque vagis sunt. Quibus eæ jam à tenerâ ætate, præsertim copiosius fluunt, illi ræto senectutem attingunt, sed ex hydropè ante, vel ictero intereunt.

Lienosis & melancholicis profunt hæmorrhoides teste Galeno; sed atrabiliariis debilioribus, aut jam cachecticis sæpe exitio sunt, præcipuè si majore copiâ sanguis excernatur.

Noxiæ sunt eæ, quæ febres profligatas subsequuntur, cum plerumque e visceribus obstructis ortum habeant. Lædunt hæmorrhoides tum illos, apud quos supprimuntur, tum eos etiam, quibus abundantius, quam par est, fluunt. E suppressis apoplexiâ, morbi inflammatorii, obstructions viscerum abdominalium, fistulæ & gangrænæ vasorum hæmorrhoidalium oriuntur: ast si prolixius manant, cachexiam & hydropem generant.

Si hæmorrhoides etiam illis, quibus alias ritè defluunt, ita quandoque manare desinunt, ut nulla

(a) Mat. med. p. 195.

propterea functio corporis turbetur, nullis natura medicamentis lacessenda est; cum verò calor, cephalalgia, anxietas circa hypochondria, aut lumborum dolor nascitur, venæ sectio, lenia e tamarindis, crySTALLIS tartari &c. confecta purgantia, & emulsiões nitratae cum diætâ tenui & quiete locum habent.

Cavendum à remediis aloeticis, aliisque, quæ hæmorrhoidibus aperiendis utiles jactantur, ne inflammatio, aut fistulæ succedant.

Ubi verò hypochondria inflata sunt, & corporis habitus flavescit, vitæque prægressa est sedentaria, decoctum e taraxaco, saponaria, tamarindis cum terrâ foliatâ tartari N. 34, præbere oportet.

Si anni tempestas favet, succus taraxaci expressus proficius est.

Et si fructus hora imaturi ad attenuandum sanguinem crassiores in systemate venæ portarum multum valeant, illis tamen, quorum ventriculi & intestinorum compages minus firma est, non adeo profunt; quod uberius ingesti, flatu concitant, quibus intestina tenduntur, venæ comprimuntur, & molestiæ hæmorrhoidales augescunt. Similibus extracta liquida, ut graminis, taraxaci magis commoda sunt.

Cum hæmorrhoides tument, attrectataeque dolent, cataplasmatibus emollientibus utendum N. 36. Multis sequens lenimen attulit.

℞. Micæ panis albi unc. vj.

Pulpæ pomor. acido-dulc. unc. iij.

Coque cum aquâ, donec cataplasmatiss speciem induant; adde

Acet. litharg. gutt. xv--xx.

Nec cataplasmata, neque infusiones nimis calidæ applicandæ sunt.

Abstinentum in ejusmodi ægris ab adstringen-

tibus. Novi virum, qui hæmorrhoidibus cæcis, maximum ab attactu dolorem cientibus, laborabat. Hic applicitis cataplasmatibus emollientibus, jam plurimum levatus, suadente quopiam, acetum cataplasmati admiscuit. Verum illico tumentes sibi venas vehementer constringi sensit, & acerbis per aliquot dies doloribus conflictatus est.

Quidam hæmorrhoides tumentes, frigidâ lavandas præcipiunt. Quod quidem habere locum initio potest, sed ubi pars affecta, aut inflammata est, aut cum tangitur, valde dolet, malum augetur.

Clysmata facibus eliminandis accommodatissima sunt; sed tres, quatuorve uncias excedere haud debent, ne vasa comprimantur.

Cavendum, ne salia enematibus adjiciantur, sed ad alvum eluendam, manna iis addita plurimum proficit.

Cum hæmorrhoides inflammatae sunt graviterque dolent, conuli e pepone, in suppositoria conformati, applicitique multum laudantur; sed eos, ubi tumor & inflammatio major urget, ob doloris acerbitatem non ferunt agri.

Si dictis adminiculis hæmorrhoidum tumor non emendetur, metusque sit, secuturæ inflammationis; sanguis hirudinibus, aut lanceola educendus est; quod postremum præcipue præferri debet, cum tumor sanguinem grumosum continet.

Ubi nihil adest, quod indicet, sanguinem educi oportere, unguentum linariæ cum quartâ aut sextâ parte unguenti nutriti adhibitum levat, cui, si urgeat dolor, granum opii admisceri potest.

Hæmorrhoidibus cæcis ac tumescentibus curandis nihil esse æque opportunum asserit Ill. de Haen, atque oleum chalybeatum eorum, qui chalybeis instrumentis conficiundis victum exercent.

Quandoque hæmorrhoides internè descendunt,

& a sphinctere ani constringuntur, unde gravia symptomata exsurgunt. Sed hæc infringuntur, cum digito in anum inserto illæ reponuntur.

Si varices flaccidæ sunt, absque sensu doloris, vinum rubrum, qui flores balaustiorum incoquantur, vel alumen vino rubro solutum, externe proficue adhibetur.

Postquam nihil his omnibus profectum est, exstirpationem Cel. Schemucker utilissime instituit, & ligaturæ anteposit, ex qua dolores gravissimos, constrictiones intestinorum, & spasmos mortiferos exortos fuisse, de Haen vidit. Ego tamen deligationis cum successu institutæ memini.

In multis hæmorrhoides, ut verbis Cel. Frank utar, non tam ob sanguinis, per abdominalem morbum, circulationem impeditam; quam a solius tunicæ intestinalis intimæ laxitate, & venarum anovicinarum atoniâ speciali, a multis causis facile extricabili, intumescunt. Hinc sola sæpe saccorum ejusmodi tunicæque anopropendentis, & infiltratæ vel callosæ exstirpatio intestinale hunc morbum, rectè monente Ill. Theden, (Neue Bemerkungen und Erfabrungen I. Th. S. 56. 59.) radicitus tollit.

Hæmorrhoidum supra modum fluentium, indices sunt, fractæ vires, facies pallescens, pulsus debilis & inæqualis. Rard hîc venællectio conveniens fuerit, cum frequenter hydrops pectoris inde sequatur.

Hæmorrhagia ex vasis externis orta, quæ quidem rarius occurrit, bolo armeno, vino rubro soluto, & pannis linneis applicato, vel spongia, aceto imbuta; vel linteis carptis, aqua aluminosa madidis, facile sistitur.

Si profundius in recto hæreant vasa, sanguinem fundentia, alvo elota, injectiones ex decocto millefolii, vel etiam ex decocto radicis tormentillæ, vel bistortæ conveniunt.

Commendantur quoque clysteres, & semicupia frigida, sed hæc, cum ægri exhausti sunt & habitus corporis frigidus observatur, vix suaserim.

Laudant item nonnulli suppositoria, ex adstringentibus v. g. corticibus granatorum parata; sed hæc ab ægris, cum nimium irritent, vix feruntur, neque adjumento esse possunt, si mali fons profundius latet.

Hæmorrhoidibus plus nimio fluentibus, interne decoctum millefolii (quod in colica hæmorrhoidali mirum quantum prodest) tentandum; si verò hæmorrhagia urgeat, ad decoctum corticis, vel nonnunquam ad alumen confugiendum erit.

Optimos autem effectus in hæmorrhoidibus nimium fluentibus, & hæmorrhagiâ uteri a vitriolo martis exhibitio observavi. Laudatur in hæmorrhagia uteri $\frac{1}{2}$ grani ipecacuanhæ ter, quaterve per horam data, ut spasmi minuantur, & hæmorrhagia sistatur. Commendaverat jam ante ipecacuanhæ in cohibendis hæmorrhagiis vim, egregius cœteroquin, sed in condendis aphorismis præcox Baglivius. Quibusdam eam salubriter adhibui, sed in plurimis, cum eventus non præsto votis respondisset, præcipue hæmorrhagiis cum periculo urgentibus, ad vitriolum martis confugi.

Opium haud congruit, quod humorum prægassum, & alvi obstipationem auget; &, ubi viscera abdominalia infarcta sunt, obest. Tum solum locum habere videtur, cum tenesmus observatur à stimulo in intestinis ortus, qui fluxum sanguinis ciet, excitumque sustentat.

In chronico hæmorrhoidum fluxu immoderatione e laxatis visceribus diuturnum rhei usum, & lenia martialia parcè præbenda Cl. Tralles commendat.

Ubi limaturâ ferri sumtâ alvus nimium præcluditur, præcordiorum anxietates, vel cardialgiæ

nascuntur, Cel. Tralles saccharum cum cremore tartari marti addendum suadet.

Quibus verò hæmorrhoides rhabarbaro irritabantur, pilulas ex extracto millefolii cum limatura martis exhibui.

℞. Extr. millef. unc. j.

Limat. mart. non rubig. dr. ij.

℞. pil. gr. iiij.

Sumat ter per diem iiij--v.

In nimio hæmorrhoidum, inveteratoque fluxu, quem cachexia comitabatur, hydropis metum adferens, continuatum balnei Pyrwartensis usum admirabiles prorsus successus habuisse memini.

Cum vasa vesicæ cum hæmorrhoidalibus nonnunquam communicent, hæmorrhoidum loco miæ cruentus exoritur; cui, si ægri cæterum recte valeant, nihil obmovendum, stimulantia solum, aromatica, spirituosa ac diuretica fugienda sunt. Ubi vero dolor & ardor pubis observabitur, & pulsus plenus, durusque tangitur, tum vena incidenda est, & emulsionēs ac medicamenta leniter alvum moventia veluti ex tamarindis, & manna propinanda.

Ardor inter mingendum gummi arabico aqua diluto, mixtura oleosa N. 37. aut decocto salep N. 38. mitigatur.

Novi, adstringentibus imprudenter exhibitis, inflammationem, & suppurationem lethiferam successisse.

Huc referenda sequens curatio videtur. Monachus quispiam, ante complures annos sæpe hæmorrhoidum fluxu absque incommodo laborans, cum æstuante syrio, iter institueret, vinumque largius biberet, repente miæ cruento afficiebatur; qui & infessibus auctus, & variis pharmacis datis exasperatus est. Demum æger meam opem imploravit. Huic præcepi, ut fellæ pertusæ, quæ ligneo oper-

culo concavo tecta erat, ita insideret, ut vapor aquæ calidæ suppositus, per foramen tenue, in operculo ligneo apertum, anoque respondens, eo tantum perduceretur. Una jussi lintea, aquæ glaciali immersa, regioni pubis applicari; quo facto cum post biduum mictus sanguinis sileret, & vasa hæmorrhoidalia intumescerent, his lanceola apertis, integra sanitas rediit.

Cum hæmorrhoidum vi suppressa urina est, non modò diuretica omnia relinquenda; sed ne moderatus quidem nitri usus tutus esse videtur. Profunt quidem diluentia ac demulcentia, ut decoctum altheæ interne sumtum, & balnea, semicupia, clysmata, aut fomenta emollientia exhibita, sed sæpe cum hæc expectationem omnem fallerent, hiru-dines, perinæo appositæ, levamento fuerunt.

Qui hæmorrhoidibus laborârunt, cavere debent a diætâ siccâ, & alimentis aromaticis, multas fæces aut flatus generantibus, cum quandoque a solis diuturnis flatulentis affectibus hæmorrhoides nascantur.

Cavendum etiam, ne transpiratio supprimatur, namque, frigore incaute admissio, insultus hæmorrhoidales redire solent.

Vitanda deinde alvi obstipatio, ad quam prohibendam plurimum conferunt lenes Sedlicensis aut Bilinensis aquæ doses sæpius sumtæ: neque sequendi sunt illi, qui magnopere metuunt, ne ani fistulas falsæ progignant.

Minus ad hunc finem conducit rheum, quo diutius sumto flatuum incommoda vix tollenda, & alvi obstructionem clarissimi mecum viri observârunt.

Monendi sunt, qui hæmorrhoidibus vexantur, ne anum chartâ bibulâ extergant, sed spongiâ utantur aquâ frigidiusculâ madidâ.

Maximum equitatio hæmorrhoidibus levamen

adfert; sed cum hæ dolent, ferre illam ægri nequeunt: aut certe metuendum, ne inflammatio oriatur.

Qui hæmorrhoidibus fluentibus quondam obnoxii, postea iisdem liberati fuere, modicis egent venæ sectionibus, lenibusque purgantibus, ne alia mala succedant.

CAPUT XIV.

DE

ARTHRITIDE.

INter arthritidem & podagram, ut Ill. van Swieten docet, hoc interest, quod hæc, etsi, cum inveteravit, plures simul, aliosque ex aliis articulos occupet, principio tamen pedes solum petat; quod nil tale opulantibus ingruat, nec diuturni esse primi ejus impetus soleant. Arthritis vero feбри continuâ inchoat, torquetque diutius; at plerumque non redit, complures enim, qui gravius hoc morbo laboravêre, per omnem deinceps vitam immunes ab eo fuerunt.

Dividitur in febrilem, & non febrilem: recentem, & confirmatam: veram & spuriam.

In verâ dolorem sequitur tumor: in spuria tumor, dolorque unâ accedunt.

Arthritis acuta sæpe in chronicam abit.

Haud juvat disceptare, in ligamentisne & articularum capsulis, ut Boerhaavio & Meadio visum: an, ut Hallerus censet, in ipsa cute, vel in nervis cuti subjectis arthritidis sedes figenda sit.

Multùm arthritidis cum rheumatismo convenit , iisdemque pene fontibus utraque derivatur ; veluti e dysenteriis , transpiratione , aut sanguineis fluxibus suppressis , scabie retroacta , abusu spirituosorum , fomiculis , & ulceribus chronicis coalitis , venenis saturnalibus , vaporibus mercurii aut arsenici.

Eodem fere modo uterque morbus solvitur , ut sudoribus , urina mucosa , fluxu alvi , furunculis , pustulis , ulceribus , aliisque exanthematibus.

Hæmorrhoides fluentes licèt morbum non tollant , eum tamen leniunt.

Forte ab arthritide rheumatismus hoc maxime differt , quod hic nec hæreditarius sit , nec contagione contrahatur , neque omnem membri , vel articuli mobilitatem tollat.

Arthritidis conjuncta cum febre , quæ aere humido , frigido frequentius occurrit , eandem , quam rheumatismus , medicinam poscit. (a)

Cavendum , ne febris ob solos lancinantes artuum v. g. crurum dolores pro arthritica , vel rheumatica habeatur , cum hi dolores sæpe saburræ in abdomine hærenti originem debeant , quod nexum nervorum abdominalium consideranti facile patet. Hæ febres institutis largioribus venæ sectionibus , datis diaphoreticis , & neglectis evacuantibus longæ aut periculosæ evadunt.

Urina turbida cum sedimento mucoso , aut furfuraceo arthritidem febrilem levat. Verùm ubi ægri nimiam pallidi & aquosi lotii copiam cum virium detrimento mittunt , decocto corticis confirmandi sunt ; atque ubi hoc nihil proficitur , ad camphoram , & vesicantia confugiendum est.

(a) Commentat. mea de curandis febribus & inflammationibus , C. XXIV. p. 415.

In eo, quem de febribus vulgaveram, tractatu nimiam videri dixeram nitri dosin a Broklesby præscriptam. Id postea experimento Cl. Nicolai comprobatum fuit, qui, cum drachmam nitri dimidiam singulis horis aliquoties sumpisset, frigus quoddam veluti glaciale in ventriculo sensit, continuatque nitri usu appetitum imminui, & ventriculum debilitari expertus est. (b)

In arthritide non febrili potissimum magnesia nitri, aut sale amaro purgandum est corpus, dein in morbi causam investigandum. Ubi a scabie retroactâ malum oritur, flores sulphuris, spiritus fuliginis, decoctum sarsaparillæ vel antimonialia pro diversitate symptomatum, & subjecti locum habent. In arthritide, quæ ex atrâ bile enata est, efficacissimi sunt succi expressi herbarum N. 39. ex taraxaco, acetosa, beccabunga. Si acidum in corpore prædominetur, acetosa loco nasturtium aquaticum admiscere oportet. Incipiendum a minori dosi e. g. ab unciiis tribus, tum ad quatuor & quinque nycthemero progrediendum, si id ventriculus patitur.

Addito aurantiorum succo major expressis succis gratia conciliatur, & eos facilius ventriculus fert. At hos, fero lactis dilutos, propinari nolim, quod vires ventriculi hac admixtione potissimum depri- mantur.

Inutiles videntur conservæ, quæ tertia, aut quarta quavis hora ad drachmam unam aut alteram præbentur, cum æger vix tres, quatuorve succi drachmas intra diem ingerat.

Dum arthritidis ab acido nata est, sapo venetus largiore copiâ cum amaricantibus exhibendus est; sanguineis tamen nocet sapo.

(b) *Recept und Rurarten.* p. 582.

Sapo hispanicus parum a veneto differre videtur: sufficit in usum medicum saponem ex bono oleo paratum adhibere; rejiciendus verò ex sebo rancido vetusto confectus, qui odore & sapore ingrato facile dignoscitur.

Si sapo loco alcali ex borace paretur, una hujus pars, duas olei pressi in saponem pulcherrimum, aquâ facile solubilem, teste Spielmann, vertit, quin borax decomponatur. (c)

Vir 30 & aliquot annos natus summis doloribus lumbaribus & ischiaticis corripiebatur. Nihil externa remedia, nihil demulcentia, aut paregorica ipsa profuerunt; demum recordabar ægrum longissimo tempore spiritu vitrioli diluto usum fuisse; hinc sequentem mixturam tentavi.

℞. Olei amygd. unc. j β.

Syrup. alth. unc. ij.

Vitell. ovor. q. f.

diu simul tritis & subactis adde

Aq. comm. unc. x.

Sal. tartar. dr. β.

Hoc medicamento binis vicibus absumto, dolores immanes tollebantur.

Ubi ex transpiratione suppressâ arthritis absque pulsu pleno & forti existit, tum, si levius malum est, mixtura Hoffmanniana, pulvis Doweri, N. 40. & infusum florum sambuci: si gravius, camphora, vesicantia, decocta sudorifera locum habent.

Oritur & arthritis a chlorosi, & mensstruis suppressis, quæ frictionibus, saponaceis, amaricantibus, myrrhâ, quandoque aloeticis, & balneis sulphureis curanda est.

Nonnullis pulchre profunt aquæ minerales, quæ ferrum, & sal amarum continent.

In arthritide non febrili infulum chamædryos juvit; vidi tamen aliquos, quorum ventriculus inde male afficiebatur.

Egregium hujus morbi remedium aconiti extractum expertus sum. Incipitur a dimidio grano: at si necessitas urget, ad tria, quatuorve ascenditur, quæ tertiâ, vel quartâ quâvis horâ exhibentur. Si pulsus præterea debilis, & pallidior urina observetur, feliciter aconito camphora jungitur.

In arthritide diuturniore egregiæ efficacîæ sunt flores sulphuris cum antimonio, post quos decoctum bardanæ largiter hauritur.

℞. Flor. sulph. dr. vj.

Antim. crud. dr. ij.

Sacch. unc. j.

F. pulvis.

Sumat bis ter per diem drachmam dimidiam.

Delicioribus parari inde rotulæ possunt.

℞. Flor. sulph. dr. vj.

Antim. dr. ij.

Sacch. candidiss. unc. j. β.

F. Pulvis subtilissimus. Formetur cum syrupo kermes rotulæ drachmæ dimidiæ.

Sumat ter aut quater per diem drachmam unam.

Praferuntur flores sulphuri crudo, cum hoc quandoque tenesimum, & tormina excitet, si ei aliæ mineræ admixtæ sint.

Aegris pallido habitu, & imprimis frigido, quos arthritidis iteratò corripuit, sæpius hæ pilulæ profuere.

℞. Flor. sulph. unc. j.

Resin. Guajac. unc. β.

Antim. crud. dr. j. β .

F. Pilulæ gr. iij.

Sumat ter per diem 4---6.

Nullum in arthritide chronicâ decocto sarsaparillâ, & antimonii præstantius remedium animadverti.

℞. Sarsaparill. unc. iv.

Antim. in petia ligat. dr. vj.

Coque in lb. xj. aquæ, ad dimidii consumptionem.

Adde

Liquirit. unc. j.

Sem. anis. dr. ij.

Infunde per octavam horæ partem.

Colatura exhibeatur.

Dosis ingredientium & decocti bibendi pro diversitate agrorum, & morbi pertinacia variat.

Quidam exiguam his remediis efficaciam tribuent propterea, quod antimonium, sulphure adhucdum addito iners evadat. Sed an non ex hac commixtione tertium quoddam corpus, agendi, & efficiendi vi præditum, exsurgere potest?

Boerhaavius nullum ab antimonii decocto fructum exspectat, cum illud humoribus nostris non solvatur; sed equos antimonii usu pinguescere novimus.

Prætereà tam a pulveribus, quam decocto cum antimonio secundissimos successus in nosocomio vidimus. Ut reliqua taceam, virum tractandum habui, qui arsenico sumto, dirissimis doloribus arthriticis, & febre lenta vexabatur, cui in manuum æque ac pedum digitis topi nascebantur, capillique omnes fluebant. Eum ego lacticiniis, pulveribus ex sulphure & antimonio, & decocto sarsaparillæ per annum con-

tinuato, interposito balneorum dulcium usu, integræ valetudini recens restitui.

Sub internum antimonii usum ab acidis abstinendum est, ne parte regulinâ in ventriculo solutâ, vomitus & tormina nascantur.

Monendi sunt ægri, ut, remediis sudoriferis sumtis, corpus probe contra injurias aeris muniant, ne ab humoribus sub cute stagnantibus oedema vel alia mala subsequantur.

Mercurialia, præcipiente Monroo, minus idonea sunt arthritidi, nisi hæc a malo Celtico originem trahat, de quo infra.

Videndum, ne ob unam hanc causam, quod noctu dolores ingravescent (namque & arthriticis accidere hoc sæpe solet) pro venereo malum habeatur. Sex abhinc annis ætate provec-tiore femina, quæ numquam venereo sympto-mate affecta erat, gravissimis doloribus arthriticis, noctu ingravescentibus confictabatur. Qui accersebatur, medicus mercurium primùm dulcem; tum sublimatum exhibuit; unde dolores artuum intolerabiles, febricula lenta & foeda pedum ac nasi ulcera consequebantur. Post hæc vocatus ego flores sulphuris, & decoctum sarsaparillæ cum lacte suasi, quæ sumtis medicaminibus, symptomata decrescebant; verùm cum tardius curatio procederet antimonium addidi: ex quo brevi ægra penitus convaluit.

Narcotica pertinaciorem arthritidem reddunt.

In arthritide febrili, quamvis venæ sectio præmittatur, opiata nocent. Raulinus post primas statim phlebotomias vespere narcotica in rheumatismo suavit; sed hæc curandi methodus, ut Ill. van Swieten observat, haud e sententia cessit. (d) In valde sensibilibus, ubi metuendum,

(d) T. V. p. 668.

ne ob vehementiam doloris convellantur, opium, si febris ablit, tentari potest.

A nonnullis oleum terebinthinæ in arthritide commendatur.

℞. Olei terebinth. dr. ij.

Mellis unc. j.

Sumat mane, & vespere, quantum duo cochlearia coffeâ capiunt.

Profuit hoc quidem, testante (e) Herz, in affectionibus coxæ sine febris, at non in reliquis arthriticis doloribus. Neque sensum doloris in affectâ parte inde ortum, nec vim remedii diaphoreticam vir supra memoratus observavit.

Superatâ arthritide, cum magna ægros debilitas afficit, aut sudoribus corpus diffluit, decoctum corticis peruviani frictionesque conveniunt.

Varia in arthritide commendantur externa adjuvamenta. Sic in pertinacissimis lumborum doloribus septem vel octo cucurbitæ, non scarificatæ, loco affecto, vel circa eum applicitæ sæpius profuere.

Contra dolorem ischiaticum jam olim repetitum vesicatoriorum usum ad partem dolentem commendaveram, (f) nunc id accuratius Cotunnus dilucidavit.

Quidam frigida applicari volunt; sed cavere ab his tyrones jubet Piquerius, (g) quod ea malum ad alias persæpe partes transferant, & convulsionem non rarò efficiant, celeriter necantem.

(e) *Briefc an Nergte II. Cammlung.*

(f) *Eyroqua* noxia, & utilia. Friburgi Brisgojæ 1751.

(g) T. I. p. 105.

Cæterùm ægros, alioquin recte valentes, absente febre, cum dolore ischiatico premerentur, qui diaphoreticis exhibitis, & calidis applicatis pertinaciter resistebat, frigidissimis fomentis levatos sæpius vidi.

Si acerbiores inde dolores accessère, relictis frigidis, ad fomenta tepida denuo redii.

A cataplasmate ex sapone, arnica, & cicuta egregios effectus in arthritide, rheumatismo, imo in pleuritide animadvertimus, quæ tempore humido, frigido occurrebat. N 41.

Laudatur quoque moxa, qua olim Augustæ Vindelicorum secundo eventu usi sunt. Ea lanugo est artemisiæ, quæ ficta in conos incendiatur, ut leniter deflagret; nec nagnum dolorem testante Purmanno & van Swieten, affert. Cutis antea mundanda, pilique radendi sunt.

Nocet tamen, ubi pars rubet, & inflammata est, in doloribus vero profundis ad dissipandos humores frigidos & serosos valere poterit; quamquam cum Olao Borrichio existimem, inunctionem artemisiæ factam haud majore, quam ipsa vesicantia, vi ad medendum malo pollere.

Arthritide fugatâ, partibus debilioribus, præcipue œdematosis, corroborandis vinacea sub forma balnei sicci vel cataplasmatibus commendantur; sed ea ex uvis dulcibus, non verò acribus expressa esse oportet.

Ut reditus morbi prohibeatur, in iis præcipue, qui aeris vicissitudinibus expositi sunt, diuturnus balnei sulphurei, veluti Baadensis, usus necessarius est.

Balneum, quod Frauenbaad vocant, efficacissimum est, & plus sulphuris, quam reliqua, testante Braun, (h) continet.

(h) Transact. philos. 1670.

Juvant quoque balnea hæc sulphurea in paralyfi post arthritidem remanente.

Similibus quandoque profuit electrificatio, præcipue ubi sudor validus, calor insolitus, & commotio in parte affecta cum levamine totius corporis brevi subsequebatur.

Mirabar sæpe, pauperes quosdam, qui sustinendis in balneo paralyticis victum exercent, non raro ducentis per annum lavacris sine noxa uti.

Qui arthriticis, & rheumaticis affectibus obnoxii sunt, ingruente autumno, corpus densioribus vestibus munire debent; tunc enim animadvertente Celso, (i) fere meridianis temporibus calor est; nocturnis atque matutinis, simulque vespertinis frigus. Præcepit id jam Hippocrates, licet in calidâ græciâ degeret.

Plures rarius arthritide vexabantur, ubi subuculam laneam nudo corpori applicatam gestabant.

Quibusdam balnea frigida morbum prævertendo profuerunt; nonnullos tamen inde pejus affectos vidi, & novissimis observatis constat, quod licet incolæ septentrionalis Americæ infantes sæpius frigidaæ aquæ immergant; multi tamen adultorum ex morbis inflammatoriis pereunt per vicissitudines æris contractis. (k)

(i) L. II. C. I.

(k) Histoire des Découvertes faites par divers savans Voyageurs &c.

CAPUT XV.

DE

PODAGRA.

Multi, velut Cullen (a) podagram a largiore acidorum, & acescentium usu repetunt; cui sententiæ van Swieten non omnino adstipulatur, quamvis det, eam a vinis acidis nonnunquam oriri posse.

III. Linneus rusticos in Sueciâ a podagra¹ immunes vivere existimat, quòd vino non utuntur, sed cerevisiam hauriunt. At rustici nostri, & plebæi toties vino acido abutentes podagra vix corripuntur. Testatur quoque vir supralaudatus, nullas podagricis molestias a frugibus cujuscunque generis creatas fuisse, quamquam eæ in acidum abeant.

Verosimilius est, morbum hunc a victu plenissimo, neglectis corporis exercitationibus, nimio veneris usu, & immoderata mentis intensione nasci. Certè fatuos rarò podagra vexat.

Quod tamen ad superiores mali causas adtinet, fateor, nosse me¹ fratres duos, podagrico patre genitos, quorum alter, etsi sobriè viveret, pessimè hoc morbo cruciabatur: alter omnibus aeris injuriis expositus, veneri, & bacho ultra modum indulgens, nunquam podagrâ laboravit.

(a) P. 211.

Morbus non caret suspitione contagionis; id quod canes cum podagricis dormientes, vel pedes eorum lambentes confirmant.

Rarò fœminæ hac ægritudine corripiuntur; rariùs e viris macilenti.

Juvenes longè facilius, quam senes, curantur, sed vix grandævi fiunt.

Si dolores constantes sint, longiorem id senibus ætatem præfagit.

Qui multum vel sudant, vel mingunt, rarò podagra torquentur.

Sudor morbum levat; is tamen, qui sæviante dolore anxius exprimitur, teste Kleinio, non juvat.

Nullam Nieuhoff fidem meretur, qui, postquam Japoniam aliquoties adiisset, affirmare non dubitat, eam gentem ob frequentiore Theæ usum nullo arthritico morbo affligi, cum Kaempferus adeo methodum describat, quâ usi Japones, arthriticas & podagricas partes corporis moxa inurant.

Arthritici tandem hydropici aut apoplectici intereunt.

Temperent sibi a venere senes podagrici; novit enim Cl. Ludwig quosdam, qui, cum arthritici matrimonium inivissent, immoderato veneris usu graviores morbos, brevique lethales insultus experti sint.

Cum nulla sit podagræ hucusque reperta medicina, pauca abmodum ejus tractandæ præcepta occurrunt.

Sanguis rarissimè mittendus est; quamvis inflatæ sint venæ, pulsusque plenior tangatur.

In sanguineis tamen, quibus vires constabant, dolorem hirudinibus loco podagrigo admotis, illicò profligatum fuisse memini.

Ubi lautior vita præcessit, & lingua sordida, majorque calor deprehenditur, mixtura e salibus mediis, & roob sambuci aliquoties purgare corpus oportet; quamquam Sydenhamus & leniorum catharticonum usum damnet.

Sudorifera sub initium morbi comprimis nocent sanguineis; a fortiore sudore arthritici dolores non rarò intolerabiles fiunt, & sudoriferis extra paroxysmum datis, quandoque invita natura validissimi paroxysmi excitantur.

Opiata haud conveniunt, nisi tam faciles irritatu sint ægri, ut convulsio metuatur, vel ubi violentia paroxysmorum remisit, & morbus identidem recrudescens noctes præ dolore insomnes reddit, præsertim ubi ægri atate proVecti, & podagrâ sæpiùs afflicti fuerunt, Optimè panno lanco pars affecta tegitur. A topicis repellentibus & anodynis applicitis metastases lethales, ab acribus inunctis rigor, immobilitas, aut inflammatio partium, ab emollientibus nimia relaxatio producit. Itaque tumor diutiùs durat, & morbus eo celerius revertitur.

Immersis in frigidum pedibus, primum arthritidis, teste Heistero, (b) accessit: dein gravissima mala, morsque ipsa consecuta sunt.

Finitis paroxysmis, cum tumor articulorum remanet, frictiones aptæ fuerint.

Nodi & tophi nondum inveterati cedunt quandoque lixivio alcalino, ita temperato, ne partem rodant.

Laudatur in podagra quassia; sed multiplici experientiâ doctus sum, tantundem in morbis

(b) De aquæ laudibus nimium suspectis. Helmstadii 1745.

præstare gentianam, quantum quassiam, exoticum illud, & majoris pretii remedium.

Interdum alium profuisse fertur, sed id cum Cl. Spielmann inefficax reperi.

Nec diuturnus decantata olim pareiræ pravæ usus podagricis profuit. Immortalis Boerhaavius (c) de hoc remedio ita scribit: Pareira prava parùm efficit, multùm laudatur. Cur? Rara est: commendatur a medicis nugacibus, qui arte vacui semper quærunt quid, quo dato, ultimum fecisse, nihilque omisisse videntur.

Multum quoque celebratus est pulvis Ducis Portlandiæ, qui partibus æqualibus radicis aristolochiæ, gentianæ, summitatum chamædryos, & chamæpytios constabat. Dosis erat drachma una, matutino tempore sumenda. Aristolochiæ longæ radix podagram quidem lenit, sed vitam plerisque utentium minuit, ut Boerhaavius observat. (d) Cælius Aurelianus podagricos, amaris abusos, apoplexiâ extinctos vidit, & Cl. Cullen e centum, qui pulvere ducis Portlandiæ usi fuerunt, intra unum alterumve annum nonaginta ac imprimis apoplecticos obiisse testatur.

Cum multi existiment, eandem podagræ, & calculi materiem esse, cum alter alteri morbus sæpius aut jungatur, aut succedat, aquam calcis commendârunt. Sed factopericulo, res præter spem evenit.

Paucos ante annos resina guajaci, in taffia soluta, tanquam specificum quoddam depræ-

(c) Epist. ad Bassandum Francisci I. Archiatrum. p. 166.

(d) Epist. ad Bassand. p. 71.

dicabatur. Præbetur inde singulis diebus mane cochlear unum, jejuno ventriculo, tum bibitur jusculum lactis. Verùm præterquam quod junioribus & sanguineis spirituosa non conveniant, nonnullis gravissima etiam mala e prædicti pharmaci usu creata sunt.

Fortassis vita frugalis, ut recte Cl. Grunne-
rus animadvertit, & corporis motus, ab Eme-
rigon, qui prædictum remedium publici juris
fecit, commendatus plus profuere, quam lau-
datum jam a sæculis guajacum.

Tassia spiritus vini rectificatus potest substitui.

Complures tractavi podagricos, nodis affec-
tos, qui cum remediis usi essent mox referen-
dis, per plures annos interdum, aut nullo om-
nino paroxysmo, aut lenibus certè, innoxiiisque
insultibus corripiebantur.

Calidioris temperiei ægris vernali & autum-
nali tempore per duas tres septimanas indies
unciam unam, aut alteram roob sambuci exhibui,
altero tempore exceptis æstivis mensibus
quotidie gr. xv---xxv. florum sulphuris porrexì;
podagricis frigidioribus pulveres ex sulphure,
& antimonio propinavi, illis verò, qui tumidulo
& pastaceo corporis habitu præditi erant, pi-
lulas ex resina guajaci, floribus sulphuris, &
antimonio suasi, prætereà strigili instituendas
frictiones commendavi.

Damnat quidem Cl. Warner flores sulphuris
in arthritide, quod primas vias relaxent, sed
nunquam inde malum effectum expertus sum.

Nec timendum est ab antimonio exhibito,
ut Tronchin voluit, colicam pictonum succe-
dere; contrarium enim cum expertissimo Strack
observavi.

Materies podagrica, cum regressa est, peri-

culi plena generat symptomata. Si ventriculū petit, anxietates, cardialgiam, & vomitus : si pulmonem, catarrhum suffocativum, aut asthma; si caput, apoplexiam, aut paralyfin progignit.

Extant exempla podagricorum, qui cum acidum liquidum, aquosum, viridescens, atque adeò acre evomissent, ut fortissimi mineralis acidi acrimoniam æquaret, malo suo liberati fuere. Nihilofecius haud quemquam fore reor, qui, si tuendæ valetudinis artem vel a limine salutavit, emeticum præbeat in podagrâ retrogressâ. Imo etsi ructus, & anxietates circa præcordia observentur, a purgantibus, quibus nil tutius nosse se Lieutaud asserit, hic abstinendum est, nisi forte insignis ingluvies præcessisset. Cæteroquin ad spirituosā, camphoram, moschum, vinum Tokainum, hispanicum recurrere oportet.

Pedibus antea affectis, picem burgundicā, aut vesicantia applicare convenit.

Si repulsa podagra ventriculū petat, vel acetbi dolores vexent eos, qui ultra modum sensibiles fuerint, opium, sed caute ac moderate dandum est.

In catarrho suffocativo senum, cum regressa podagra est, vesicantia ad femora, vel inter scapulas apposita, tum gummi ammoniacum, spiritus salis ammoniaci, & camphora internè locum habent.

In cardialgia scutum stomachicum aromaticum epigastrio applicare decet.

Si inter paroxysmum podagricum diarrhœa oritur, & æger cæterum recte valeat, relinquenda est; sin vero vires imminuantur, aut alia mala symptomata observentur, illico compescenda est, cum subito neceat.

Meritò diætâ tenuior in podagra commendatur, cum constet, quosdam, qui amissis opibus, ad summam egestatem adacti, tenui victu utebantur, immunes a morbo fuisse: eosdem, cum lautius postea & mollius corpus curarent, rursus podagræ obnoxios esse factos. Verumtamen consuetudinis universim, ætatis, & virium habenda est ratio.

Podagricis veteranis, paroxysmo aliquantum imminuto, vinum non sine secundis successibus indulgi. Neque in aliis tamen victus tenuior illicò in meliorem convertendus est, cum sæpe paroxysmus hâc ratione acceleretur.

Diætâ lactea vix commendanda videtur, cum lac, uti Hallerus (e) docet, adultos debilitet, iis vero, qui vino largius utuntur, aut debili sunt, laxaque fibra, minus opportunum esse constet. Eandem Ill. Zimmermann (f) negat convenire posse ægris, qui aut spasminis obnoxii, aut infirmo sunt ventriculo.

Quandoque dolores diætâ lacteâ ad tempus minuuntur, sed iidem mox vehementiores redeunt, pedumque debilitatem inducunt, toto vitæ tempore duraturam. Quare in junioribus solum, aut iis, qui paucis paroxysmis infestati fuerint, tentari poterit.

Quidam podagricis esum piscium commendant; sed plures novi Carthusianos sævissima podagra vexatos, quamquam ex ordinis instituto perpetuo carnibus abstinerent.

Legendus est de podagra Celeberrimus Cullen.

(e) T. II. P. II. p. 143.

(f) P. II. *Bon der Erfahrung* p. 264.

CAPUT XVI.

D E

MORBIS VENEREIS.

QUæ sæpius redit gonorrhoea, plerùmque doloris minus, at plus in curando difficultatis habet.

Quo propius malum vesicæ collo residet, eo pejus habendum est; cum vero in prostata, ac cumprimis in vesiculis feminalibus hæret, frequenter omnem curationem respuit.

Cum gravior dolor, aut febris urget, venæ sectio, cataplasmata, foveæ mollientes, remedia demulcentia; ut, decoctum althææ cum paucis nitro, & emulsa conveniunt.

Anno 1753. quo tempore nondum antiphlogistica methodo nostri utebantur, gonorrhoeam admodum dolentem sanavi decocto althææ cum nitro, tantâ copiâ exhibito, ut intra 24 horas decocti libras octo cum nitri semuncia hauriret æger, brevique convalesceret.

Caute tamen nitrum præbere decet; si enim majore, ut a me factum erat, copia propinetur, aut demulcentibus non satis diluatur, irritare, mictumque cruentum ciere valet, uti Cl. Tode observavit. Quare, si magna stranguriæ vis, vel ingens inter mingendum dolor animadvertitur, nitro prorsus abstinendum, & solis demulcentibus, ut radice salep, althææ, gummi arabico utendum est.

Possunt lenia evacuantia, velut aqua angelicæ

interponi, non ut multum purgetur corpus, sed ut laxior alvus perftet. Mercurialia tamen, aut fortiora, ut scammonium, non expediunt; vitanda item spirituosa & stimulantia; quin etiam major corporis motus.

lis, qui in hoc gonorrhoeæ statu versantur; gravissima e balsamicis mala enata vidi.

Ubi verò gonorrhoeæ magis inveteratæ juncta est urethræ exulceratio, interdum mercurialia requiruntur; imo, cum internis remediis morbus resistit, injectiones mucilaginosæ cum lenioribus mercurialibus locum habent.

Cum ægris debilibus, aut valde irritabilibus copiosa materia limpida non sine acuto dolore, pulsuque frequenti effluit, corticem cum aut sine opio pro symptomatum diversitate Cl. Schwediaur commendat; quin & nonnunquam opium, cum clysmatibus emollientibus, præcipit, ut frequentes ægrorum & cum dolore conjunctæ erectiones impediuntur.

Sollicite indagandum, an nihil omnino inflammationis subsit; quæ, si adesset, cortex haud omni periculo vacaret.

Fortasse ægris adeo irritabilibus tutius foret decoctum salep, aut emulsio cum laudano interne data, quam clysmata cum opio injecta.

Ad frequentiores erectiones mitigandas emulsio camphorata laudatur. Forte ad hunc scopum sola emulsio largius sumta sufficit.

Multis ad perfectam curationem necessum esse videtur, ut in albam mutetur materia ex urethra effluens, quæ tamen interdum ad finem curæ usque flavescens perseverat.

Gonorrhoea laborantibus, si nullus urinæ ardor, nullus in urethra calor, vel in erigendo dolor sentiatur: si fluxus materiæ minuatur,

eaque crassior evadat, pilulæ ex gummi arabico, mastiche cum modica terebinthina cocta, aut balsamo copaivæ N. 42. opportunæ erunt.

Si gonorrhoea, quæ e relaxatione ortum habet, perduret, cujus rei indicium id præbet, si, cum vel urethra premitur, vel stylus introducitur, aut ultimæ post mictum lotii guttæ exprimuntur, omnis dolor absit, pilulæ superiores, addito extracto tormentillæ, vel pulveres ex extracto martis, & tormentillæ parati profunt.

His nihil proficientibus ad injectiones adstringentes, ut, ad decoctum corticis vel tormentillæ transire licet.

Si candelæ applicantur, in principio nec mole crassiores sint, nec longo tempore relinquuntur.

Damnandæ sunt injectiones saturninæ. Novi complures, quibus eæ atrocissimos abdominis, artuumque cruciatus excitârunt. Atque cum hos medici pro doloribus, e lue venerea ortis, haberent, infausto consilio mercurialia maxima dosi porrigebant; unde factum, ut ægri demum insanabilibus nervorum morbis implicarentur, aut phthisi consumti interirent.

Est quoque gonorrhoea sicca, ubi parietes urethræ velut concrefcere incipiunt, & dolor inter mingendum intolerabilis percipitur; hîc contracta urethra, ejusque muco expresso mitigatur, & injectionibus emollientibus, ac mucilaginosiis utendum est.

Grave malum, urinâ penitus suppressâ; quod, si a residuo tumore glandularum urethræ, antea inflammatarum, & postea discussarum sit ortum, candela, aut chorda immissa, mechanica quadam ratione juyatur. Eodem modo adplicitæ

tum quoque conveniunt, cum canalis a plicis, vel crassitie membranarum urethrae coangustatur; non rarò tamen litus mercuriales, loco ægro externe adhibiti curationem accelerant.

Quidam in gonorrhoea inveterata laudant interne tincturam cantharidum, aut injectiones ex oleo terebinthinæ. Hi novam inflammationem excitare velle videntur, ut malum radicitus evellant; verum ejusmodi stimulantia, ac præcipue tinctura cantharidum, quamvis cauta manu exhibita, nonnunquam stranguriam, dolores pergrandes, atque gravissima mala pepererunt.

In phymosi, quæ balneis, fomentis emollientibus, aut discutientibus; item præputio, carptis linteis aut spongia impleto, sanatur, rarissime incisio lateris necessaria est; neque, dum fit, malum sæpe aufert. Itaque graviore in casu, vel in phymosi scirrhusa circumcisionem potius instituere oportet.

Condylomata potissimum in immundioribus spectantur. Minora, vel fungosa aquæ calcis, aut alumini cedunt.

Si veruccosæ sint naturæ, plus aluminis, vel solutionem hydrargyri in acido nitri, aut mercurii sublimati applicationem poscunt: majora sæpe cultro auferre oportet.

In ablatis, quæ crebrius recrescunt, decoctum radicis tormentillæ vel bistortæ applicare convenit.

Pulvis sabinae condylomatibus inspersus vix memorabilis est efficaciae.

In bubonibus, cum vires exorbitant, minuendæ eæ sunt, locumque habet curatio antiphlogistica: bono effectû mixtura ex salibus mediis & roob sambuci corpus leniter purgatur;

cum vero pulsus est debilis, cum vix febris percipitur, neque æger quosdam ferè dolores sentit, alimenta majore copiâ concedenda sunt; quin &ortex & vinum rubrum viribus erigendis conveniunt.

Si circumferentiæ bubonis non inflammati, induratae & quasi callosæ sint, optimo successu bis de die iv. aut v. gr. calomelis cum salivâ subacti iisdem infricantur, & emplastrum ex cicutâ cum gummi ammoniaco imponitur. Idem locum habet, dum bubone, post suppurationem factam, aperto, durities in circumferentia major perstat.

Quantum fieri potest, cavendum, ne bubones incidantur, aut lapis causticus iis admoveatur; qui enim sponte sua aperiuntur, citius multo ac felicius coalescunt.

Videndum quoque, ne aperti bubones filis carptis, aut turundis obturentur; hæc enim compressione & margines callosi efficiuntur, & ulcera malignæ speciei generantur.

Cum e bubone ulceroso materies effluit ichorosa, simulque vires dejiciuntur, nocent mercurialia; at nutrientia, ut decoctum corticis cum lacte, vel decoctum ex antimonio, & sarsaparilla profunt.

Ex numerosissimis venereis, qui per annum & dimidium in Nosocomio generali degebant, duo solummodo bubone gangrænofo laborabant.

In hoc statu cortex peruvianus & camphora aceto antiseptico soluta, tum interne, tum externe, tempestivè adhibenda sunt.

In testiculis venereis præter balnea emollientia, vapores, & repetita clysmata, etiam cataplasmata emollientia genitalibus cum fructu applicantur; ubi tamen suspensorio utendum est.

Rarò inunctiones locales conveniunt, nisi chorda spermatica admodum intumeat.

Cum testiculi induruerè, neque remediis ullis cedunt, quidam gonorrhoeæ inoculationem commendant. Verum hæc in statu inflammationis, & teste adhuc dolente pessime noceret.

Novi duos, qui durissimis testiculis præditi erant. Hi antea gonorrhoea laborarunt, quæ balsamicis remediis, & adstringentibus suppressa fuit. Cum eam denuo contraxissent, emollientibus & debita gonorrhoeæ curatione, tum mercurialibus, non ore solum sumtis, sed externe etiam applicitis, penitus convaluere.

Adversus ulcera venerea, præcipue faucium, in cachecticis corporibus, cum tenuem atque acrem ichorem continebant, sequens pulvis bis, ter, quaterve per diem sumtus profuit.

℞. Extr. gratiol.

Pulv. fœnic.

Lapid. cancror. aa. gr. v---viij.

Hoc remedium plerumque per salivæ & urinæ vias agit, rarius purgat, rarissime sudorem pellit; quod si fiat, de cephalalgia potissimum conqueruntur ægri.

In morbis venericis cutaneis, in scabie, quin & herpete pertinacissimo infusum scordii saturatum ad ℥j. ter quater, imo sæpius de die sumtum cum balneis mire juvat: quandoque in scabie venerea pulvis scordii adjumento est, sed tardiùs infuso agit.

In cancris venericis lardaceis, & non lardaceis efficacissimum erat sequens remedium.

℞. Succ. cicut. unc. ij.

Calomel. dr. jß.

Sæpius de die, cum siccatum fuerit, linteis carptis adplicetur; hyemis tempore extractum

cutæ subrogari in succi locum potest, sed tardior tum curatio erit.

Cavendum quoque in cancris venereis, ne intempestive saturnina adhibeantur. Vidi ipsemet a balneis penis in gonorrhoea, ubi saturnina magnâ copîâ admiscebantur, membrum sensu omni atque erigendi potentia privatum fuisse, quin dolores etiam inguinum, perinæ, & artuum accessisse; qui ægrum sæve admodum, & complures anno torquerent.

Præter decocta, cataplasmata, & balnea emollientia flores sulphuris interne adhibiti maximo levamini fuere.

Neque tamen hinc arguero, saturnina omnia, externe adplicita, obesse; imo ea in malis quibusdam cutaneis præclaram opem præstant, sed circumspectione opus est.

Ad luem ipsam sanandam, imo etiam ad alia symptomata tollenda frictio mercurialis sæpe requiritur, quam balnea præcedere debent, nisi nimium viribus deficiantur ægri.

Videndum, an sebum recens sit; tum in frigidiore loco unguentum servandum, & absque terebinthina parandum est, ut cutis pustulæ præcaveantur; id quod facilius obtinetur, cum e butyro cacao conficitur unguentum.

Vitanda est salivatio.

Eam camphora, unguento neapolitano addita, non impedit.

Scorbuticis vix, aut certè non sine maximâ circumspectione mercurialia conveniunt.

Salivatione incipiente, quoniam in ore ulcuscula nasci solent, cavendum, ne ea pro siphiliticis habeantur, ususque mercurii continuetur.

Salivationem exorientem supprimunt balnea tepida, diæta tenuis, potus mucilaginosus.

clysmata, & lenia evacuantia; sed caute ultimis utendum, ne vis mercurii omnis in intestina irruat, & diarrhoeam colliquativam suscitet, qua juvenem, nobili ortum prosapia, brevi è medio sublatum vidit Boerhaavius.

Cavendum, ne ægri nimis frigidè tractentur; nam sæpe hac de causa, vel ex aere nocturno incautius admissio, humores nimia vi in intestina feruntur.

Quod cum sit, clysmata emollientia, decocta demulcentia, ut salep, vel mixtura cum gummi arabico, & opiata præbenda sunt.

In nimia salivatione sulphur interne adhibitum, & camphora profunt: & si ductus salivæ nimium relaxati sint, neque os nimio opere doleat, gargarisma ex decocto tormentillæ peropportunum fuerit; si verò corpus ex salivatione nimium fractum debilitatumque sit, lenia martialia congruunt.

Videndum, ne ægris debilioribus diæta nimium tenuis administretur.

Cum ægri inter frictiones valde debilitantur, aut multum sudant, cortice peruviano egent.

Qui vero, vel negotiis, vel aliis causis impediti, frictionibus uti nequeunt, iis mercurius gummosus Plenckii commendandus est.

Quandoque gummi arabici plus, quam Cl. Auctor præcipiat, addendum erit.

Habet id commodi hoc remedium, ut a ventriculo plerumque faciliùs feratur. Quodsi salivationem cieat, eadem observare oportebit, quæ paullo ante diximus.

Sæpe frictiones non profunt: alii eas ferre nequeunt, sed mercurio interne cum levamine utuntur: nonnullos contra mercurius interne sumtus lædit, sed iis frictiones opportune sunt.

In ægris, qui nervos admodum irritabiles habent, vel hæmoptoe laborarunt, cautissimâ manu mercurialia danda sunt; in venereis aneurismate simul affectis ea plane interdicit Oosterdykschacht, cum mercurii abusus quandoque aneurismata efficiat.

Plures lue venerea affecti, ac pro desperatis habiti, cum aliquoties frictionibus mercurialibus, debite institutis, extra Nosocomium absque fructu usi essent, apud nos adhibitis aliis auxiliis sanabantur.

In tophis, & carie præter inunctiones mercuriales, si iisdem ægri non antea usi fuerunt, æthiops antimonialis, interpositis purgantibus, & largo potu sarsaparillæ secundæ decoctionis insignem opem attulit.

Æthiops antimonialis, cujus efficaciam in tineâ capitis, scrophulis, strumis & scabie expertus est Cel. Baldinger (a) etiam in doloribus artuum vehementibus, & fluore albo malæ notæ ter, quaterve die sumtum juvat. Addi tamen plus sulphuris debet, quam Huxhamus præcepit.

℞. Flor. sulph. partes ij.

Antimon. crud. in tenerrimum pulverem contusi part. iij

Mercur. viv. part. iv.

Misceantur exactissime longo & assiduo tritu.

Tentatæ etiam fuere pilulæ e mercurio vivo & resina guajaci confectæ, sed non eadem, qua æthiops, virtute pollent.

Decoctum ligni juniperi cum antimonio paratum N. 43. bubonibus induratis, testiculis, iisque, qui scrophulosis simul affectionibus laborabant, salubre fuit.

(a) Hist. med. mercur. & mercurialium. P. I. p 47.

Omniū præstantissimos effectus a decocto ex antimonio & sarsaparillâ vidimus.

Rutty (b) affirmat, decocta lignorum præferenda esse, cum malum in ossibus hæret, quòd eorum actio ad ossa usque pertingat.

Lazarus Riverius luem cum exostosis decocto guajaci & antimonii curavit. Henricus III. galliarum rex sudore, decoctis lignorum excitato, absque hydrargyro sanatus fuit.

Famosus Udalricus de Hutten novem annis lue torquebatur, undecies absque effectu salivationi submissus, decocto guajaci curabatur.

Cel. Fordyce decoctum sarsaparillæ commendatum cum ossa squammosa præcipuè læsa sunt, vultque frictiones mercuriales prius adhiberi; idem in scabie venerea, aut quoties ægri ante mercurio vel absque debita methodo, vel sine fructu usi fuere, salutare esse meritò contendit.

Citius, faciliusque agit apud eos prædictum decoctum, quibus antea mercurius propinabatur; quamvis plures quoque sanaverim, nullo seu interne, seu externe adhibito mercurio.

Idem remedium in tophis, scabie venerea, præcipue in doloribus osteocopis maximam utilitatem adfert. Tum verò lecti calore sudor exspectandus, & primæ antea viæ expurgandæ sunt. Sumitur pondere ℥ ij---iij. quater per diem.

Decoctum sarsaparillæ ex priore decoctione residuæ potui servire potest.

In valde emaciatis decocta sudorifera minùs conveniunt.

Lenia purgantia cum mercurio dulci inter decocti usum optimo successu propinantur; semper

tamen virium, symptomatum, & morbi vehementiæ ratio habenda est.

Miram quoque vim in phthisi & tabe venereâ debellandâ exseruit decoctum ex antimonio & safaparilla paratum. Verum a minore dosi v. g. unc. ij. incipiendum, quæ altera, aut tertia quavis hora sumatur. Nonnunquam tamen vel hæc quoque portio, quamvis exigua, pectoris oppressionem inducit, quæ, nisi leni facta venæsectione, & exhibito simul lacte tollatur, ulteriorem prædicti decocti usum vetat.

Si ægri viribus sint valde fractis, corticem peruvianum præbere, atque lac etiam, nutriendi causa, addere oportet.

Nonnulli in phthisi venerea lac capræ commendant, cui frictiones mercuriales factæ sint. Verùm sæpius a frictionibus ejusmodi capræ fauces tumescere solent; quare alimenta respuit, & ad lactandum inepta efficitur.

Pthificis, & scorbuticis venereâ labe infectis infusum malti pulchre prodest.

Dexterrimus, & in curandis morbis venereis multum versatus Nosocomii generalis chirurgus Zeller observavit, sanationem in malo celtico affectis, quorum pupilla valde dilatata est, tardius procedere. In ejusmodi ægris lingua ut plurimum impura est, neque antivenerea profunt ante, quam solventibus, & leniter evacuantibus corpus sæpius purgetur.

Sollicite quoque in id inquirendum est, an non alius cum lue morbus conjunctus sit; persape enim omnis medicinæ vis ac efficacia lue opponitur, ea vero symptomata, quæ suam originem alteri morbo debent, negliguntur; quo fit ut in deterius ruant ægri.

Quidam, in curanda lue venerea, mercurium

sublimatum corrosivum, spiritu frumenti solutum, laudant, quidam eum rejiciunt.

Abrahamus Gordon (c) egregiam se ejus opem ac vim vidisse testatur. Nosocomii ad S. Marcum quondam physicus Locher, jam fato functus, retulit, omnes fere, qui lue venerea affecti erant, mercurio sublimato corrosivo sanatos fuisse; verum acta succica nos docent, sublimatum pluribus quidem exhibitum fuisse, sed uni, alterive solum profuisse, multos denuò in idem malum recidisse, alios omnino levatos non fuisse, immo malo hypochondriaco, pectoris pravis affectionibus, vomituque vehementi correptos, etsi aqua cinamomi, camphora &c. adderentur.

Parisini funestos effectus post usum sublimati internum viderunt. (d)

Wathen testatur (e) dolores nocturnos, exostoses, & cutis eruptiones minui, quidem hoc medicamine, sed paullo post recrudescente.

Russi, (f) qui cæteroquin mercurii sublimati usum commendant, insinuant tamen, eum absque balneo non profuisse. Simul decoctum sarsaparillæ celebrant, cum nonnulli mortui fuerint, quibus sudor non exprimeretur.

Novi equidem paucos, quibus sublimatus auxilio fuit; plurimis tamen nocuit, & contractiones membrorum, nervorum insanabiles morbos, hæmoptyses, & phthises lethales ejus usu provenire vidi. Fortè in hominibus robustis, aut iis, qui pastaceo

(c) Medical observations and inquiries. V. I. 1758. p. 369.

(d) Mémoires de l'Académie Royale de Chirurgie T. IV. à Paris 1768.

(e) Observ. pract. de lue ven.

(f) Petersburg Journal. Mai 1780. p. 321.

sunt habitu, quandoque locum habere posset; at in ægris valde irritabilibus, vel debili pectore præditis, in tussi item sicca, & hæmorrhagiis meritò ejus usum damnat Ill. Baro Störck. (g)

In Nosocomio generali mercurii sublimati usus internus meo consilio, ductuque exolevit.

Improvide lactantibus exhibetur causticum hoc ac violens remedium, quod teneræ pusillorum fabricæ omnino non convenire videtur. Timendum etiam, ne infantes copiosiore salivæ secretionem, quæ frequenter inde sequitur, suffocentur.

Periculosius isto remedium esse sublimatus videtur, cum mica panis in pilulas formatus, quem expertissimus de Mertens sinistros plane exitus habuisse vidit; quapropter illud tamquam perniciosum remedium rejicit.

Fortè interdum minus infausus effectus præstitit, cum, observante Baldinger, (h) pilulæ serius, interdum non solutæ, vomitu ejiciantur.

A pilulis keyserianis, quæ virtutem suam omnem mercurio debent, soluto in aceto concentratissimo, colicas gravissimas, hypercatharses, & febres lentas enatas observavi.

Laudatur quoque in lue venerea Lobelia longiflora in decocto, sed caute adhibendam esse Ill. Murray (i) præcipit. Ego, cum nulla ejus copia Viennæ fuerit, nihil quidquam de virtute hujus remedii asserere possum.

Cl. Budensis Professor Winterl, literis Viennam missis retulerat, morbos venereos in Hungariæ confinibus a mulieribus ope radicis Astragali exscapi sanari. Itaque Ill. B. de Störck, cui plurima in

(g) T. II. p. 264

(h) P. II. p. 34.

(i) P. 516.

re medicâ debemus, quam humanissime a me petiit, ut hujus medicamenti usum in Nosocomio generali tentarem; cui petitioni ut satisfaceremus, quantocyus exhibuimus, & sequentia observavimus.

Cum nulla dosis, neque methodus sumendi medicamenti determinata esset, hæc formulâ sum usus:

℞. Rad. astragali exscapi unc. β.

Coque in XV. unc. aquæ, donec s̄b j. supersit.

Sumat æger tepide mane, ac vesp̄ri.

Decoctum istud satis gratum saporem præse fert, atque ad infusum liquiritiæ prope accedit.

Cum hujus radice copiam tantam, quanta ad plura capienda experimenta necessaria foret, non obtinuiss̄m, en sequentes quatuor observationes.

Femina, 48 annos nata, cum arthritide, & tribus tophis, quorum unus exulceratus erat, caput obsidentibus ad Nosocomium 26. Julii 1785. deportabatur. Præmisso purgante, decocto astragali usâ, prima hebdomade 6---7 vicibus in dies purgabatur: altera & tertiâ septimana minuebantur alvi excretiones, at mictus frequentior, cum copioso sudore nocturno, qui ad integram usque sanationem perduraverat, successit. Dolores arthritici brevi fugabantur; tophus vero exulceratus simplici medela externa curabatur quartæ ab adventu hebdomadæ spatio: reliqui duo, nulla extrinsecus adhibita ope, prima Septembris omnino evanescere, & ægra jam incolumis e nosocomio exiit.

Altera 20 annos nata, tophis dolentibus non paucis affecta, partu paullo ante edito, 28 Octobris in Nosodochium deferabatur. Hæc primis quatuor diebus nullam ex usu decocti mutationem sensit, at dein per sex dies purgatione frequenti, cui cephalalgia conjuncta erat, corripiebatur; purgationibus postea & vehemens sudor

nocturnus, & mictus copiosus supervenit, quin & alternantes ventriculi dolores accessere. Demum agra 5. Decembris sana ad suos rediit.

Famina item, 50 annos nata, quæ herpete, ulcere venereo, & rheumatico dolore affecta erat, 6. Octobris usum dicti antea remedii inchoavit. Hæc primis octo diebus aliquoties in dies purgabatur; dein lotium colore naturali, magna copia excrevit, denique 19. Novembris Nosocomium reliquit; cæterum penitus perfanata, si genu excipias, quod parum mole auctum, sed indolens remanserat.

Denique juvenis 21 annorum 7. Octobris Nosodochium adierat, qui bubonibus duobus induratis, sed admodum inæqualibus laboraverat. Postquam decocto astragali uti cœpit, primis quinque noctibus vehementer sudavit; sudorem mictus copiosissimus excepit, ægerque 30. Octobris sanitati restitutus est.

Nullus istorum agrorum, quantum sciscitando expiscari licuit, mercurialibus antea remediis usus fuerat.

Eo, quo hæc scribo tempore; duo venerei radice astragali, denuo mihi transmissa, cum successu fruuntur.



FORMULÆ.

Nro. 1.

℞. **A** Q. commun. unc. x.
 Arcan. dupl.
 Acet. vini \overline{aa} . unc. β .
 Nitr. pur. dr. j.
 Roob sambuc. unc. ij.

Nro. 2.

℞. Camph. gumm. arab. subact. gr. j.
 Nitr. pur. gr. v.
 Sacchar. \mathcal{D} . j.
 M. F. Pulvis.

Nro. 3.

℞. Sak. amar. dr. vj.
 solve in iv. unc. aquæ.
 Pro clysmate.

Nro. 4.

℞. Tartar. emet. gr. vi.
 Aq. commun. unc. iv.
 Pro clysmate.

N. 5.

℞. Gumm. ammon. vitello ovi
 soluti dr. ij.
 Extract. enul. \mathcal{D} . ij.

Aq. hyssop. unc. viij.

Oxymell. scillit.

Syrup. de hyssop. aa. unc. jss.

Nro. 6.

℞. Aq. rub. idæi unc. ix.

Succ. citri.

Sal. mirab. Glauber. aa. dr. vj.

Syrup. rub. idæi. unc. ij.

Nro. 7.

℞. Cort. peruv. ruditer tuss dr. x.

coque per horam in aqua commu-
ni ad colaturam lb. j.

D. pro clysmate.

Injiciantur iv. unciaë pro dosi.

Nro. 8.

℞. Camph. gr xv.

Pulv. gumm. arab. dr. j.

mistic, & in mortario vitreo diu
tritis, adde

Aq. meliss. unc. iv.

Syrup. kermes. unc. ss.

Nro. 9.

℞. Folior. aurant. unc. j. & dr. vj.

in aquâ comm. unc. xx. decoque
per 2 vel 3 horas, vase clauso,
Colaturæ adde

Vini rubr. unc. x.

Sacch. q. s. ad gratiam.

℞. Folior. aurant. unc. j.

infunde aquæ fervidæ lb. jß.
bull. per momentum, stent in leni
digestione per 8 horas
Colaturam exhibe.

Nro. 10.

℞. Rad. valer. sylvest. dr. vj.
Gumm. galban.
--- sagap. aa. dr. jß.
Asæ foetid. dr. j.
F. pilulæ gr. iij.

Nro. 11.

℞. Cort. peruv. unc. j.
coque per horam in aquâ communi
adde
Flor. verbasc. unc. ß.
Rad. liquirit. dr. vj.
infunde per octavam horæ partem
Colaturæ unc. xiv.
adde
Syrup. papav. alb. unc. j.

Nro. 12.

℞. Extract. trifol. fibrin. dr. vj.
Gumm. ammon. dr. ij.
Rhei. elect. dr. j.
F. l. a. pilulæ gr. ij.

Nro. 13.

℞. Kermes miner. gr. j.
Sacch. alb. ʒ. j.
Extract. liquirit. gr. iv.

M. F. Pulvis.

Nro. 14.

- ℞ Gumm. ammon. aceto scill.
 soluti dr. ij.
 Aq. hyssop. unc. vj.
 Syrup. hyssop. unc. jss.

Nro. 15.

- ℞ Flor. sulphur. dr. j.
 Gumm. arab.
 — tragac. aa. dr. jss.
 Extract. liquirit.
 Sacchar. aa. dr. ij.
 Kermes miner. gr. ij---iv.
 M. F. Pulvis.

Nro. 16.

- ℞ Rad. symphyth.
 Herb. agrimon.
 — Urtic. minor. aa. unc. j.
 coque per quartam horæ partem
 in aqua.
 Colaturæ unc. xiv.
 adde
 Syrup. papav. rhœad. unc. j.

Nro. 17.

- ℞ Alum. crud. gr. iij—vi.
 Gumm. arab. gr. viij.
 Sacch. Θ. j.
 M. F. Pulvis.

Nro. 18.

- ℞ Aq. flor. rhœad. unc. viij.

Gumm. arab. unc. β .

Alum. dr. β .

Syrup. diacod. unc. j.

Nro. 19.

℞. Rad. polygal. amar. unc. ij.

coque per quartam horæ partem
in lb. j β . aquæ.

adde

Rad. liquirit. dr. vj.

in funde per octavam horæ partem.

Colaturam exhibe.

Nro. 20.

℞. Lichen. island. unc. j.

coque per $\frac{1}{2}$ hor. in aqua comm.

adde

Rad. liquirit. dr. iiij.

infunde per $\frac{1}{8}$ horæ partem.

Colaturam unc. xiv. exhibe.

Nro. 21.

℞. Stipit. dulcamar. unc. ij.

Sciff. & leviter tus. infunde s. q.

aq. fervent. per $\frac{1}{2}$ hor.

dein momento ebull.

Colatur lb. ij.

adde

Oxymell. scill.

Syrup. hyssop. $\overline{3a}$. unc. j.

Nro. 22.

℞. Scill. maritim. leviter siccat. unc. j.

huic adfunde

Vini boni unc. xvj.

stet infusio hæc per horas xxiv. in
loco moderatè calido, vase tecto.

Colatum coquatur cum duplo sacchari
unâ ebullitione in syrupi consistentiam.

℞. Acet. scillit. partem unam sacch. alb.
partes duas, facta unica ebullitione
remove ab igne.

Nro. 23.

℞. Scill. recent. unc. β.

Cort. cinnam. unc. j.

infunde in lb. ij. vini boni austriaci.

Nro. 24.

℞. Cort. peruv. dr. vj.

Limat. mart. non rubiginos.

Theriac. diateffar. aa. dr. ij.

Syrup. de cinnam. q. s. ut fiat

electuarium molle.

Nro. 25.

℞. Cort. peruv. unc. j.

Herb. trifol. fibrin. dr. vj.

Limat. mart. non rubiginos.

Cort. cinnamom. aa. dr. ij.

F. cum lb. ij. vini austriaci generosi vinum
medicatum

Nro. 26.

℞. Herb. Major.

— Rut.

Flor. lavend. $\overline{\text{aa}}$. unc. ij.
infunde vino rubro hungarico per
20 horas.

Colatura lb. ij. cum aqua calcis
commisceatur.

Nro. 27.

℞. Tinct. mart. aperitiv. Glauber. unc. iv.
in his solve
Extract. helleb. nigr. dr. ij.

Nro. 28.

℞. Malti in molendina fracti lb. β.
coque s. q. aquæ $\frac{1}{4}$ horæ.
Colatura refriger. lb. iv.
D. U.

Nro. 29.

℞. Aq. meliss. unc. viij.
Succ. terr. catech. dr. iiij.
Camphor. gumm. arab. solut. gr. viij.
Syrup. kermes. unc. j.

Nro. 30.

℞. Rad. serpent. unc. j.
affunde desuper aquæ servidæ lb. jβ.
stent per xij. horas in loco moderate
calido infusa.
Colaturæ adde
Sacch. unc. β.

Nro. 31.

℞. Cort. simarub. dr. ij.
Coq. in lb. ij. aquæ ad tertiæ partis
consumtionem.

Nro. 32.

℞. Rad. torment. unc. β.

coque per. $\frac{1}{2}$ horam in aqua communi.

Colaturæ lb. j.

adde

Gumm. arab. unc. β.

Camphor. gr. viij.

Injiciantur 4 unciae pro una vice.

Nro. 33.

℞. Aq. fœnic. dr. vj.

Tinctur. rhei aquos. dr. ij.

Sapon. venet. vitello ovi subacti gr. xvj.

Syrup. de cichoreo unc. β.

℞. Aq. commun. unc. j.

Sapon. gr. x—xv.

Mell. dr. j.

M.

Nro. 34.

℞. Rad. taraxac. cum toto unc. iij.

Tamarind. unc ij.

coque per $\frac{1}{4}$ horæ in aqua.

Colaturæ lb. jβ.

adde

Sal. mirab. Glaub. dr. vj.

Syrup. de duab. q. s. ad gratiam.

Nro. 35.

℞. olei ricini unc. iij.

Syrup. alth. unc. ij.

Vitell. ovor. q. s.

diu tritis, & subactis

adde

Aq. commun. unc. x.

Nro. 36.

℞. Specier. emoll. ℥. β.

Coque cum s. q. aquæ in cataplasma.

Nro. 37.

℞. Aq. font. ℥. j,

Syrup. alth.

Gumm. arab. $\overline{\text{aa}}$. dr. iij.

℞. Olei amygd.

Syrup. alth. $\overline{\text{aa}}$. unc. ij.

Gumm. arab. dr. ij.

Aq. comm. unc. x.

Nro. 38.

℞. Rad. falep dr. jβ.

coque per $\frac{1}{4}$ horæ in aqua.

Colaturæ ℥. jβ.

adde

Syrup. alth. unc. j℥.

℞. Rad. satyr. in pulverem redacti unc. ℥.

solve in x. unc. aquæ calidæ

adde

Syrup. de symphyth. unc. j.

Nro. 39.

℞. Taraxac. cum toto partes iij.

Acetos.

Beccabung.

} recentium $\overline{\text{aa}}$. part. j.

exprimatur succus ad unc. iv.

adde

Succ. aurant. unc. ℥.

Nro. 40.

℞. Nitr. pur.

Tartar. vitriol. \overline{aa} . unc. iv.Pulverata & mista injiciantur successive in crucibulum candens, & fluat massa per $\frac{1}{2}$ horam.Massæ huic refrigeratæ, & pulveratæ adde,
Opii pur.

Rad. ipecacuanh.

--- liquirit. \overline{aa} . unc. j.

M. F. Pulvis subtilissimus.

Nro. 41.

℞. Farin. fabar. ℥b. β.

Sapon. venet. unc. iv.

Herb. cicut.

--- arnic. \overline{aa} . unc. jβ.

c. s. q. aq. fontis in cataplasma.

Nro 42.

℞. Gumm. arab. unc. β.

Mastich. dr. ij.

Extract. torment. dr. j.

F. cum terebinthina cocta pilulæ gr. iij.

Nro. 43.

℞. Antimon. in petia ligat. dr. vj.

Lign junip. ℥b. β.

coque in ℥b. xj. aquæ ad dimidii
remanentiam; ad finem coctionis
adde

Rad. liquirit. unc. j.

Cum nonnullæ ex his formulis ad gratiam majorem conciliandam ejus sint pretii, ut facilè pauperibus propinari non possint; proximè pharmacopœam, in usum Nosocomii generalis, editurus sum.

42
16

